

ਨੀਵ ਸੀਝ

ਬਿਮਲਾ ਏਮਾ ਮਿਸ਼ਰੀ



नोव सोज़

For Library
of Bhagavan
Gopinath
Jee

अर्पण



पनुन्यद्वन टाठ्यन गुलालन अँक्य् येम्य् दिलुक दोद वुज़ुनोवुम
बेय, येम्य् दिलुक सोज़ व्वतलोवुम आशवासन रैणा
तु तनिष्क वेनी कौलस । बोड आय तु
थदनपाय ऑस्यूनख ।

— बिमला —



येमि शारु सोम्बरनि हुंघ् सौरी हकूक छि

नाव :	नोव सोज़
तहरीर :	बिमला ऐमा मिसरी
नागरी कॉशुर	
शवद करन वोल् :-	पृथ्वी नाथ कौल (सा)
कुल सफु :	256
कुल तेदाद :	पांछ हथ (५००)
छापन वॅरी :	२००९
सर वरक :	रविन्द्र साधु
म्वल :	200/- स्वयं
छापखानु :	जे० के० आफसेट
कमप्यूटर :	पृथ्वीन एन्ड सन्ज ' नई दिल्ली/जम्मू ।
पब्लीशर :	लेखिका चानु
किताब कति हैकि मीलथ :	155 सफस प्यठ जु

वुज़िनि लग्या थोप

यिथु पॉठ्य वुपबालस अँन्दर कनि लावु छु जोशस यिवान तु

येतिथुय वथ बास्युस तँत्यथुय छु न्यबर नेरनुक संज़ करान तु वक्तस
प्यठ छु सोरुय कँह छॉन्थि छुनान तु अदु छु सु त्वतान य्वहय हाल छु
अँकिस लिखॉर्य सुन्दि हकु ति सुति येलि वछव नज़रव क्यो वथ्यव
कनव डीशिथ तु बूज़िथ अँद्धपँखिव्यन हालातन प्यठ सरान सोंचान
छु । सुति छु यिम व्यचार तु खयालात पनुनि अनुमानु व्यछुनॉविथ
पनन्यन तु परद्यन बावनु बापथ बैकरार आसान । सु छु पनुन्य् यि मनु
बावथ यूत पिल्युस तु त्यूत जल्द करुन यछान । तस छु बासान जि चेर
लगनु किन्य् यिनु अँहँन्ध् यिन अमारु बँरुत्य् व्यचार लोलु हँत्य् नाद तु
चुकि चैपि बँरिथ दादु बिदाद वछिसुय मंज़ दफन सपदन । सु छु बोज़न
वॉल्य् सुंद तलाश करान तस छु बासान जि योदवय न सु पनुन्य् यिम
भाव दौयमिस ताम वातुनावि तस छु पनुन पान ग्वनाहगार बासान । तस
छु यि महसूस सपदान जि दयन नय अँमिस यिम खयाल रछिनुक तु
रँछरावनुक बानु आसिहे ज़ोनमुत । दयि सुंद यि बानु ज़ानुन छुन मखोलु
बँल्यकि छे अख बँड कथ । अथ युग्य आसुन ति छु क्वदरतुक द्युत,
युस खाल खाल मनशान नसीब छु आसान । अँमिस लिखॉरिस ति छु
यि दँय द्युत वरतावुन तु सँही पॉठ्य कामि लागुन बोड फर्ज़ तु खास
कर्तव्यज़ानुन ।

इन्सॉनियत फॉहलावनस, माय तु म्वहबत तु यखलास तु बाँय

बंदुत,सम्भुचार तु मिलचार,हिशर तु कुन्यर,पजुत तु पजर, तँहजीब
फॉन्फलावुन, ईमान्दारी सान यिमन अवसाफन तु ग्वणन हुंज सँही
व्यछुनय तु वखनय करुन्य छि अँकिस लिखॉरिस लूकन हुंद टोठ तु
हर दिल अजीज बनावान । वतनदोरी देश बैखती, वतनुक लोलु तु
वतनुक रुचर कांछुन छि अँमिस समाजस तु दीशस मंज यजथ बखशान
तु कदुर खारान । शहरियत तु अख अँकिस अकार बकार युन
समोजी कदरन हुंज वजाहत,समोजी बिदतव निशि अवाम आगाह
करुन,पनुन्य परम्परा,तु सभ्यता आम लूकन हुंदिस ज़ेहनस ताम
वातुनावुन्य, मजहबी रवादोरी छि अँकिस लिखॉरिस श्वहरत, तु थोद
मकाम दिवान । यिमव ग्वणव अलाव छि अँमिस क्वदरतक्युन नज़ारन
तु न्यामचन हुंज सनाखॉनी ति मटि । नमी,हलीमी बेयि सुंदिस द्वखस
स्वखस मंज पजि मनु शरीक सपदुन तु बेयन ति अमिच प्रेरणा करुन्य
पजि अँम्यसुंद कोल आसुन । तेलि सपदन अँमि सुंजु तखलीकु मकबूलि
आम ।अँहन्ज शखसियत कॉबिलि तॉरीफ बनावनस छि ह्योर कुन
वँन्यमुल् जज़बु आसुन् स्यठाह अहम तु लॉजिम ।

रूज व्वन्य अँहन्ज प्वख्तुकारी तु फनकॉरी तथ खॉतरु छु
चरि चोर मुतालु तु तबा आजमॉयी निहायत ज़रूरी व्वस्तादु तु वतहावुख
छांडुन तु अमि फनुच ज्ञानकॉरी हॉसिल करुन्य तु अमि फनुक्युन
लवॉजिमातन हुंद अँलिम प्रावुन छु अँहिन्द ताबनाक तु रोशन मुसतकबलु
बापथ सख ज़रूरी । पोज तु कामयाब अदीब या शॉयिर छु कोमुक
रँहबर आसान । अमिस प्यठ छे कोमस,मुलकस तु समाजस नज़र
आसान तु अँमिस निशि छे रुच व्वमेज तु आशि आसान । तमि सारिकुय
कदुर करुन छु अँमिसुन्द फर्ज ।

हैरि कनि वॅनिमुत्सु सॉरी न्वक्त् छि म्वलुत्सु यिमन हनिज़
रोशानी मंज़ आयि मे बिमला जी हुंज़ि यथ सोम्बरनि मंज़ शॉमिल
तखलीकन मंज़ अँकिस कामयाब शॉय़रु सुंद् बेशतर असार बोज़नु ।
यिमन मंज़ छे आमदुच व्वय दुंक्क गछान । चाव तु शोक छुस बर बुकु
आमुत । नज़रु छस वछु, तु कन छिस वॅथ्य । ह्यस छिस आयि । दिल
छुस स्यठुहय नर्म । कॉन्सि हुंद स्वख तु जान्यूर छुस पज़ी व्वलुसावान ।
कॉसि हुंद द्वख तु क्रेछर छुस वदुनावान । पनुनि दीशुक तु पनुन्यन
लुकन हुंद चुक छुस नालु फॅर्ययाद करनस प्यठ मजबूर करान । तिव्याज़ि
जुल्म, तु अत्याचार छिस बारव दिवुनावान । क्वदरतक्यन नज़ारन तु
मोजिज़ातन हुंज़ अँकॉसी छस दॅद्यमुतिस बदनस शौहलथ पावान ।

पनुनि वतनुक्यन गोशन गोशन हुंज़ लोलु बावथ छस दिल
रंज़ुनावान । यिम सॉरी ग्वण वुछिथ छु बासान जि बिमलायि हुंदिस
फॅरिस तु मॅरिस मंज़ छु अख पोज़ ग्वणमात जिंदु जुवान । वुनि छे
अँहँन्ज़ यि ग्वडनिची शारु सोम्बरन । तु ब्रॉह ब्रॉह कुन छु रुत तवका ।
ओ शर्त छु यिज़ि कूशिश थवि बराबर जॉरी त शोकस दियि नु हँदुग्रुंडम ।
अँहन्दिस कलामस मंज़ छु शारुत पूरि पूर मूजूद । म्यानि खयालु रोज़ि
ओहंदमॉदान नज़्म तु सुति जदीद आयिच नज़्म । तिव्याज़ि वुज़िन्य
छस अछेन्त्य व्यचार शकलावुन ति छुस वुसवार । व्वन्य गव योदवय
अँमिस वारयाह कालु प्यठ शार वनान छु वोतमुत, मगर तिति छिस
शॉयरी लवॉज़्यमात, ओरूज़ हँछनुच कूशिश जॉरी थवन्य । ति क्याज़ि
फन हँछनस मंज़ छु संजीदगी तु मुसलसल रियाजुक खास दखल ।

बहरहाल छु अँमिस ज़ेहन ताज़ु तु कुनि ति ठरि वरि वरॉय छे

पनुन्य मनुबावथ करान । लेखनस छेन कुनि रंगु पॅत्य् यिवान । तमि तलु छे आश जि ▼बिमला ✽ प्रावि श्वहरथ तु नाव बेयि मकाम । अदबी हलकन मंज़ यिन अँहन्ज़ रचनायि विज़ि विज़ि म्वलुनावनु । म्योन दिल छुस यिय यछान तु यँहय आँही करान ।

दपान छिना जि रुत्य् संसकार छि रुत्य्नु बुज़र्गन निशी प्रावनु यिवान । पनुन्यन जिठ्यन तु मौलिस माजि हुंघ् रुत्य् ग्वण तु रुत्य् संसकार छि शुस्यन ति वरासतस मंज़ तरान । क्वकुर तछान तु पूत्य् हेछान । यिमु छे अज़माविमचु कथु । बिमला मिस्त्री छे कॅशीरि हुंदिस अँकिस व्वस्तादि कॉमिल स्व० जानकी- नाथ मिस्त्री सॉबुन्य् टॉठ कूर । स्व० मिस्त्री सॉब आँस्य् श्रीनगरुकिस मशहूर पब्लिक स्कूल नैशनल स्कूलुक्य् वारयाहस कालस हैड मास्टर रूद्य्मुत्य् । यिम आँस्य् थदि पायिक्य व्वस्ताद आसनस सुत्य् जान लिखॉस्य ति । बकोलि बिमला जी यिहुंज़ु छि दँहकुह दसी किताब तु गाइड बेतरि छपेमुच तु तॉलिबि अँलिम आँस्य् यिमु किताबु बडि चावु सान मॅल्य् ह्यावान तु यिमन रछि करान । तिम आँस्य् जॉनदार महल कॉठ्यहलु रोज़ान । परनावनुकि पेशि अलावु आँस्य् यिम श्रूच्य बटु तु यज़थ मंद शहरी ति । भगवान नाव आँस्य सुब शामु ह्यावान । पूज़ा पाठ करान । प्रथ भोमवारि बटुवारि आसु यिहुन्दि गरि भजन मंडलियि लगान । राँत्य् रातस ओस भजन कीर्तन सपदान । बिमलाजी हुंज़ माताजी ति आँस बँखति भावस सुत्य् लय ख्वय । दशवय बाँच आँस्य सुबहन तु शामन सॉनिस बहलि पायि भक्ति कवि स्व० कृष्णजुव राज़दाननि लेछिमचु लीलायि ललुव्य्

ललव्यू परान । जॉहिर छु ज़ि बिमलाजी ति ऑस यिमन भजन
मंडलियन मंज़ चावु सान दिलचस्पी निवान । नैतीजि द्राव ज़ि अँमिस
सनेयि यि गुंगुराय । अदु पतु द्राव तथ तर ति । कालेज तु यूनिवर्सिटी
मंज़ परन कालु प्यठय रोट अँम्य अथस मंज़ कलम । ग्वडु ग्वडु
ल्यूखुख हिन्दी या अंग्रीज़ी पॉठ्य यिहुन्ज़ु रचनायि छपेयि मैगज़ीनन
मंज़ । तु वारु वारु कैहन पत्रिकायन मंज़ ति ।

दपान यिहुन्घु पिताजी स्व० जानकी नाथ मिस्त्री ऑस्य भगवान
गोपीनाथजी सुंघु जान बँखुत्य । तिम ऑस्य प्रथ आथवारि यिहुँदिस
आश्रम खरयार हॉज़री दिनि वातान तु तति प्रार्थनायि तु भजन मंडलियन
मंज़ दयि नाव जपान । बिमलाजी ति ऑस यिमन सुत्य् बराबर तोर
गछान । यिथु कँन्य बडेयि अँमिस ति भगवान जी सुंघुन पादि कमलन
हुंज़ बँखती । सनु १९६९ कोरुख बिमला ज़ियि खांदर तु वॉच यि
स्व०टी०एन० ऐमा सुंदिस गरस मंज़ । खांदर सपदुस यिहन्दिसय
सुपुत्र श्री शिभन किष्ण ऐमा सॉबस सुत्य् । यिम ऑस्य इन्जीनियर बने
मुत्य् ।

बिमला जीयि पोरल्यूख तु एम० ऐ० पास कॅरिथ लॅजिस बैंकस
मंज़ मुलॉज़िमथ । येति यिम तरकी करान पंजाब नैशनल बैंकुकिस
अँकिस शाखस मनेजर बनेयि तु अँथ्यू औहदस प्यठ सपुज़ सुख् रूयी
सान रिटायर ति ।

पनुनिस कारुबारस सुत्य् सुत्य् ऑस यि येलि फुर्सत यियिहेस
तु पनुन्य जज़बात तु व्यचार कलमबंद करान दफतरस मंज़ ति फुर्सतकिस
वक्तस मंज़ पनुनि रचनायि लेखान तु अखतुय पनन्यन सॉथियन

बोज़नावान । यिथु पाँठ्य थँव यिमव यि कूशिश जॉरी । व्वन्य येलि यिम बैकचि नोकरी निशि सुबुकदोश सपुट् तु कँरुख यिम पनुनि रचनायि अँकिस सोम्बरनि हुंज़ि शकलि छाप कँरिथ बाज़र कडनुच यछा पूर करुन्य् । यिमव छु वारयाह कँह ल्यूखमुत । आज़ाद नज़्म हैकि युहुंद मॉदान सॉबित सपदिथ । यि छु म्योन खयाल ति क्याज़ि बिमला जियि छे व्यचारन हुंज़ गुथ ।

यथ किताबि छु यिमव नाँव सोज़ नाव द्युतमुत । यि नाव छु पँज़्य पाँठ्य बरमहल तिक्याज़ि बिमलाजी छु शारवननुक पनुन अख मुनफर्द अंदाज़ तु आय । यिहंघ्न शारन छु अलग आहंग । म्योन जॉती खयाल छु योदवय बिमलाजी शॉयरी हुंद फन ब्रॉह पकुनावुन येछि तेलि छुस मुतालु ति करुन तु मेहनत ति । शॉयरी लवॉज़्यमातन, औरूज़न वज़न, कॉफियि रिदीफ बेतरि वोरु हैछिन्य् । तिक्याज़ि नसरस छि पनुन्य् लवॉज़्यमात आसान तु शॉयरी पनुन्य् । यिमन चीज़न हुंद छु पनुन अख हिसाब आसान । मै छु अँकिस बुज़र्ग शायँरस निस बूज़मुत ज़ि शार गछि स्वनर काटस प्यठ पूर पाँठ्य तोलुन । तेलि हैकि शार पानस वराँय बेयिस कॉन्सि हुंदि दस्य् ति ग्यवनु यिथ या साज़स खॉरिथ ।

बहर हाल छे यिहुंज़ यि ग्वडनिची शारु सोम्बरन । यथ मंज़ छे अलुपलु शीथ रचनायि यिमन मंज़ व्यनँच तु आराधनायि नज़्मु, गज़लु तु लीलायि शॉमिल छि । यिमव अलावु छि यथ मंज़ हथ शथ चु पँट् ति दर्ज ।

वचन आयि वँन्मृत्य् बिमला जियि हुंघ् कँह शार तु चुपँट् छि यिहुंज़ि व्वंदु बावँच हुंद अख बिदून रूप किताब छे जान तु ज़खीम ।

सूफियानु इशारु तु धार्मिक भावनायि छि यिहंदन शारन मंज़ नैन्यु त
टाकारु । यिहंद रुजहान छु रुत करुन तु रुत स्वरनुक तौकीद करान ।
वुनि छुसनु पाबंद लेखनुक कामयाब अंदामु अथस मंज़ पूरपौठ्य आमुत
। अमापोज़ कूशिश तु यत्न छु शर्त । यथ सोम्बरनि मंज़ दर्ज शारव
मंज़ दिमु बु तुहंदि मौल अननु खौतुर पनुनि चारि मूजूब मँज़्य मँज़्य
कैह शार । मगर जान गछि अगर किताब हुंद यियि पूरि पूर मुतालु
करनु ।

परन वॉलिस चलि च्यड तु यियस यड ।

शार छि यिथु पौठ्य :—

ग्वरु सुंद नाद रचनायि मंज़ :—

वोननम ग्वरु भौल्यु छे लोलस ग्रख
ग्वरु दारस छिय तौर्य यल पख
ल्वति मु कदम तुल शौहलि यिनु ग्रख
व्वलु जल जल पख ब्रौह कुन पख
अज़ ग्वरु लोलस लँजमि सख् ग्रख
भ्रम दिथ अँनिनस यथ संसारस,
व्यवु हारस मंज़ आँडुरावनस
वुडवुन बुलबुल वुडि मंज़ इशारस
शोक छुम प्रारुहस दीदारस

✱

मनु सेतारस तार वायिनावतम,
लोलु मिज़राब तथ फिरुनावतम ।

पज़ुरक्यन स्वरुनय लय रटनावतम
येमि भवसुर मेति तारतम अपोर ॥

✱

भगवान गोपीनाथ जी हुन्दन चरणकमलन अर्पन
कैरुमुत्यव भावव मंज़ अख हना :—

ग्वरु कदमन प्यठ ड्यकु गॅहॅनोवुम,
यी वोननम तय ती कोरमस,
बब गोम ख्वश तय व्वश चॅलिम सॉरी ॥
लागुहय टाठि बबस चॉर्य चॉरी ॥

✱

सरु कैर्य कैर्य कमु द्रायस ग्वरु दारस चायस,
हरु-हरु सौरुम, नियम पोलुम अदुहय पेयस पायस
ग्वरु शबदस गूरु कैर्य-कैर्य ललुनोवुम पूरु हय ॥
हय प्रभातस पूरु वुछमय क्याह छु नूरुय नूरु हय ॥०॥

✱

शिव शंकरु सुंद दान करनावतम,
शिवु शिवु शम्भू परुनावतम,
बिमसह मे असलुच ज्ञान करनावतम ॥
हरु हरु गंगे बोलुनावतम ॥०॥

✱

यि गरु बार समपॅती धनु द्वार,
छु त्रॅविथ येत्य् गछुन संसार ।

दितम दान भगवत मायायि दर्बारय ।
मे वनतय मॉज बु कति प्रारय ॥०॥

✽

येति तूल प्रथ कॉन्सि पानस छोनये,
बेनिये ब्योन ब्योन छि साहूकार ।
अथ कथि कोनय छु कांह सननुये ॥
बेनिये ब्योन ब्योन छि साहूकार ॥०॥

✽

आरुबॅल्स्य् द्रायस मायि हय वॅजिनस,
अॅन्ड् अॅन्ड् फिरविथ रंदि कडॅनस ।
वेथि हुंज़ि गुथि मंज़ ग्वतु द्यावुनॉवनस ॥
आरस प्यठ हय तंबुलॉवनस ॥०॥

✽

सोंतु फवजेयम पोशि थॅराह,
रॉछदर तस कॅन्ड्य रूद्य ।
हर्दन सॉल कोरुम वाव हालन ॥
चै क्याह खबर छय हालन हुंज़ ॥०॥

✽

यि हा सोंतु वाव आमो,
पोशन फुलय लॅजमो ।
चावु टेकु बटन्य् संबालो ।
यियमना लालु सालय ॥०॥

✽

रंगु बँगलन तति हून्य् वुंगुनौविख,
 वुम्बरि हुंज़ सॉन्तुनथ त्रावुनौविख ।
 जंदु खुमुनय मंज़ गरु करुनौविख ।
 येति दुर्दानु हो नैद्री सॉविख ॥०॥

✽

छांडुनि द्रायस बो गुलिस्तानस,
 लालु गुलि लालु ऑस्य् पान पॉरान ।
 सखरान तिम ति ऑस्य इस्तेकबालस ॥
 मे हय बूज़ लालु यियि सालस अज़ ॥०॥

✽

फँकीरी कँरुम वॉन्सि खरचावनसुय,
 बाँगरुम नु कौन्सि खुलु पॉठ्य ।
 च़ेय क्युत बिमलायि सोर थोव जमाह ।
 चु अख दमाह यिखना ॥०॥

✽

फुलुया लँजिमुच छम लोलु बागस,
 बुलबुल तु कोस्तूर्य छि बोलि करान ।
 अमि हालु गछुमा हॉर बो ज़ाये ॥
 यियिना म्याने राये ज़ांह ॥०॥

✽

मे द्युतमुत ओसथमु मॉज लोलु बागाह,
 मे कँरमस बागवॉनी बाग सगुवुम ।

फुलय द्रायि बागुसुय च़ेय नाद द्युतथम ।
सु त्रॉविथ छावनय आयस दवॉनी ॥

जगत ज़नुनी भवॉणी राजरॉनी ॥० ॥
तैलि ओस शूबान माल्युन^{*} म्योन,
येलि तति ओसुय टोठ बब म्योन ।
शोलु मारुवोन तय गाह त्रावुवोन ॥
तैलि ओस शूबान माल्युन म्योन ॥० ॥

✱

ललद्यद र्वपद्य तु रेशिमोल तँतिये,
ब्रोठुकनि रुच द्यद तु बैयि अरिनिमाल
सारिवय प्रुछहम अख कुनुय सवाल.
तोह्य द्रावु तोत तय नियाज़ सॉन्य कतिये ॥
लँतिये बोज़तय तिहिन्ध् विलज़ार ॥० ॥

✱

छु मा रोज़ान रुफ तय तीज़ मनशस,
फटान मोहँमायि कायायि डुब डास सपदान,
सु आसान अँन्दुस्य मूमुत दीह ज़िदंय,
पज़्यस पायस प्योनुय ल्वक चारुसुय मंज़ ।
पज़्यस लागुन चोन यूग द्वदहन ॥
छु वक्तन क्युथ मे पानस डास कौरमुत ॥० ॥

✱

बु लोल बरान चु डोल दिवान,
 चु वन पानय यि छा शायं ॥
 बु प्यार करान चु नु रछ सनान ॥
 चु वन पानय यि छ शायं ॥० ॥

✱

यनु प्यठ कूर द्रायि मालिनि गरे,
 तनु प्यव प्रथ कोरि बस चालुनये ।
 प्यठय बानु चोलुनय पोंपरचि लले ॥
 तनु प्यव प्रथ कोरि चोलुये ॥० ॥

✱

मे साई दिज़ि सोबूरुक दान,
 बु चालय अदु खस्यम नतुहान ।
 दि ताबुक लाब मे सबरु सब्जी ॥
 दया करतम दितम मे बॅखती ॥० ॥

✱

कुन पान ह्यथ सोज़ोथस योर,
 नॅख्य तुलुम रिशतन हुंद गोब बोर ।
 बॉर खरस गोब बोर सारुन छुम ॥
 वनतम वुनि कूत चालुन छुम ॥० ॥

✱

पगाह गेवि कोस्तूर कम गीत सुबहस,
 पगाह बेहै बुलबुल बैयि सानि डबि प्यठ ।

पगाह पोशि नूल हावि नोवुय नोव तमाशा ॥
मे पगहच छे आशा पगाह तोशि दुनिया ॥० ॥

✽

होशुक पोश यस सुलि गरि फ्वले,
रामु रामु श्रुरामु द्वहदिश स्वरे ।
सुय येमि भव सरु नावि तारु तरे ॥
होशुक पोश यस सुलि गरि फ्वले ॥० ॥

✽

सु अकि दोहें आव मे ब्रोंठ कने,
मे योरु बॉव्मस मलालु कात्याह ।
बु बुकु आयस बरबुकु आयस ॥
अँछव व्छम मे अँशय चालु काँचाह ॥० ॥

✽

मो कर पानु पानय, परु जुवु रामु रामय ।
करु जुवु रामु रामय ।
परु जुवु रामु रामय ॥

✽

वैसिये तोरय नादाह आमय,
ग्वरु दारस हय अचुनुय प्योम ।
अचुनुय हय प्योम ग्वरु द्वारस मंज़ ॥
आरस मंज़ हय नचुनुय प्योम ॥० ॥

✽

चेय नॅख्य् पॅख्य् माल्युन वॉर्युव ओसुम,
 गरु ओसुम मातामालु तॅत्य् ओसुम ।
 हंगु मंगु माल्युन वॉर्युव न्यूहम ॥
 आलुवन कन चु दारतम मे मॉजय ॥०॥

✱

चु पॅद्य्

द्यानु ब्योल ववुन गछि मनुकिस डूरिस,
 ज्ञानु गंगाये ग्वतु लायुनुन
 मल तय अज्ञान द्वबि कडुन्य छलुनय
 मॉल् लोचरिथि ल्वति ल्वति पटकुनुय ॥

✱

पनुनुय सीर गछि नु बावुन गॉरस,
 अँन्दरिम कथ गछि अन्दरुय थावन्य,
 सुय गोव मन लागुन मंज द्यानस,
 अन्तः करण दयिनाव ज़पुनावुन्य्

✱

अँन्दरी वॅन्य् दिन्य् पनुनिस मकानस,
 लोलु सान वातुन थानस तान्य्
 गुलज़ार तेलि फ्वलन कुलि जहानस,
 परमु प्रेयम सुत्य् खसख व्यमानस

✱

संतोषि बागस गुम् दितु सग
वश कर विषयि तु रठ मनस वग
बॅखती सुत्य् लगिय स्वखुनय लग
चौरिथ अदु ह्यकख प्रोन तय ज़ग

✽

पज़ि मनु युस पुशिरि ग्वरसुय पान,
तॅस्य् ग्वर छु कासान ज़न्मुच हान,
येछि पछि ग्वर पाद पूज़ि लोलय
गांगल कास्यस कस्यस कल्याण

✽

धर्मकिस शमहस करि युस गथ
कर्म यात्रायि तस यियि अथुवथ
युस मनुश नु क्रेयायि रोज़ी पथ
सुय प्रावि श्वबु दर्शुन गछयस सथ

✽

लालन वोन दितु लाल लबुहन
सौदरस थाह मार दुर खारुहन,
हरकॅच छे बरकथ वथ अज़माव,
परमु पद पानय अदु प्रावुहन

✽

रिंद सॅन्दि आँयि ज़ाल ज़िंदय पान
जीरख छि पानस शव मानान

विषयन तमुहन दाह गछि द्यावुन,
लगजिश म्वकलिथ शिव बनि पान,

✱

कल कर पानो दयि सुंदि द्यानुच,
अद चुय प्रावख ज्ञान प्रकाश
ज्ञानु किन्यु क्रैयि हुंज व्यद नॅनिरावख
पतु नो रोजी चे कांह अभिलाश

✱

मय गछ द्वलाबन हु कुस तु यि कुस,
अॅम्यु हुम्यु तु येम्यु कुस तोर अजताम,
पनुनी नाव छय पानु तारु तारुन्यु
रामु नावु हमुतुलि यियी अंजामय,

✱

बहरहाल कोताह ति कॅर्यतन मनुश, यथ तनि लॅग्युमत्यु ज़र्ब
हय मॅहलामु कॅर्यु कॅर्यु बॅलुरावि अमाह दिलस यिम छ्वख लॅग्यु
तिम छिनु सॅहल सॅहल बलान । अदु तिमनुय छ्वकन हुंज दग छि
बिमलाजियि हुंघन अकसर बॉतन मंज सदा दिवान । खॉर बु वनु
ऑखरस प्यठ यी ज़ि नोव सोज़ छु लेखिकायि हुंज ग्वडनिच कूशिस
ऑसिथ ति अख जान कूशिश । भावु बॅरुच यि सोम्बरन छे पज़ी दाद
मंगान । भगवान जियस जय जय कार ।

पृथ्वी नाथ कौल सायिल

१३८-शारिका विहार

जोम-१८००१३

मे छु यूतुय वनुन

मे छु यूतुय वनुन ज़ि शार वनुन्य् कोर मे तेली शरू येलि बु कशमीर यूनीवर्सिटी हुंदिस हिंदी विभागस मंज़ हिंदी एम०ए करान ऑसुस । ग्वडु ग्वडु ह्य़ाँयि मे हिंदी भाषायि मंज़ुय शार वनुन्य् तु कवितायि लेखनि । म्याँन्य् ग्वडनिच हिंदी कविता सपुज़ कश्मीर यूनिवर्सिटी हुंदिस मैगज़ीनकिस हिंदी भागस मंज़ प्रकाशित । मैगज़ीनस ओस नाव वितस्ता । मे छुन यि नाव वारु पाठ्य च्यतस ति प्यवान । म्यानि कवितायि ओस धुंधले सायेह्ल शीर्षक । अमि विज़ि ऑसुस बु एम०ए किस ग्वडनिकिस कलासस मंज़ परान । म्याँन्य् यि कविता कॅर सारिवुय पसंद तु अथ प्यठ तोर मे यूनिवर्सिटी हुन्दि हिन्दी शोबु तर्फ़ र्वपु सुंद त्वगमु (रजत पदक) ति । प्रोफेसर भूषण लाल कौल तु डाक्टर रमेश शर्मा, जियन कॅर मे स्यठाह स्यठाह होसलु अफ़ज़ाँयी । येमि सुत्य उत्साह तु शौक हदु रोस हुस्यव । यि ओस १९६७-१९६८ सन् । यि कविता छपेयि बिमला मिस्त्री नाव । हुपॉरय ऑसस बु पनुनि कॉशरि ज़बॉन्य् मंज़ ति कुनि कुनि शार वनान मगर यिम कॉशिर्य् शार तु कवितायि ऑसुस बु फुटजन मंज़ुय गंङ्ग्य गॅन्ड्य् थवान ।

सन् १९६९ ई० कोरुख मे खांदर । अद अमि पतु बनेयस बु बिमला मिस्त्री प्यठ बिमला ऐमा । मगर मे यूताह पनुनि टाठि मालिन्युक मिस्त्री नाव पसंद तु टोठ ओस त्यूतुय ज़ोनुम ऐमा ति पनुनय । तनु यि

केंछाह म्योन छप्योव सु छप्योव बिमला ऐमा मिस्त्री नावय । यिथु पौठ्य न मोठ मे मालिन्युकुय श्रेह तु न वॉर्यविकुय लोल । द्वशवन्य हुंज रफाकत तु शफकत रूज मे सुत्य ।

म्योन माल्युन ओस नु मॅशरुन लायक तिक्याज़ि म्योन पिता स्वर्गवास ओस पुनि वक्तुक अख मशहूर व्वस्ताद तु यज़थमंद शहरी स्वर्गीय जानकी नाथ मिस्त्री । यिम ऑस्य् तौलीमी हलकन मंज़ स्यठाह नामावार । यिम रूद्य श्रीनगरु किस मशहूर पब्लिक स्कूल नैशनल हाई स्कूलस मंज़ हेड मास्टर सुंदि हॅस्य्यतु वारयाहस कालस कॉम करान । यिहुंज़ २०-२२ दर्सी किताब आस शायह सपुज़मच । म्यानि माज़ि स्वर्गवासिनि ओस सोमावती नाव । यिमन द्वशवनी बाँचन ज़न आस सरस्वती म्वखस । य्वतान्य् म्यानि च्यत व्वतर्युक तोलुक छु यिम द्वशवय आस्य् सुबहन तु शामन श्री कृष्ण जुव राजदान तु स्वामी परमानन्द जीनि लीलायि ग्यवान आसान तु प्रथ बटुवारि भोमवारि रातस ऑस्य् पुनि गरि टुंक्पोरि भजन कीर्तन (मंडली) लागान । केंह नौमी गुलोकार तु लीलायि ग्यवन वॉल्य् ऑस्य् ओर यिवान रोज़ान । कुसताम सोमनाथ येमिस आम लुख सुम छकुर्य ऑस्य् वनान, ओस अकसर सोन गुरु यिवान । रॉत्य् रातस ऑस मंडली चलान रोज़ान । चायि तु केंहवु ऑस्य् चलान ।

यि ओस म्योन ल्वकचारुक वातावरण यथ मंज़ मे पुन्यन ज़िठ्यन हुंदिस सायस तल बॅड वॉचुस तु प्रथेयस । ल्वकुट ऑसिथ ति ऑसुस बु ति यिमन नखु नखु रोज़ान तु मंडली मंज़ बयुहुन ओसुम बॅड ख्वश करान । सुबहन ऑसुस कालेज गछान ।

म्याँनिस पिता जियस ऑस भगवान गोपीनाथ बबु संज स्यठाह
श्रपथ तु माय ।तिम ऑस्य् आथवारि दोह ज़रूर तिहुंदि दर्शनु किन्य्
तिमन निश वातान । अदु बुति ऑसुस शीरीन फलि तु लायि म्वछि
लालचि पिता जियस सुत्य् तिमन निश गछान ।अदु यि लोलु ज़ितिन्य्
कर पेयि म्याँनिस मनस केंह तोरुम नु फिकरि ।

वख रूद पकान तु बु ति गॅयस बडान तु सपद्यव म्योन खांदर ।
बु वॉचस अँकिस नॅविस माहोलस मंज़ । यिथ पॉठ्य ज़न कोर्यन
आम पॉठ्य सपदान छु । खांदर सपदुम श्री शिबन जी ऐमा हस सुत्य् ।
यिम पेशि किन्य् इन्जीनियर छितु व्वन्यून छि यिम रिटायर गॉमत्य् ।
यिम छि स्वर्गीय टी०एन० ऐमा तु स्वर्गीया राज लक्ष्मी हुन्द् सुपुत्र ।
ग्वडु ग्वडु ओसनुयिमन म्यानि यथ लेखन वेखन कामि हुंद कांह ति
मतलब बासान । दिलचस्पी मा आसुख हुपॉर्य यावनुक चिकुचाव ।
योदक्य बु ज़ांह यिमनथी लेखुन ह्यमुहॉ तु यिम ऑस्य अकसर
वनान—तुलुनव हसॉ हबुखोतूनि कलम ह् । कुस क्याह ओस
वनान,अमापोज़ मे ह्योत नु कुनि रंगु पोत ।तु मश्क थॅवम जॉरी । दोप
छुना— रॉछिस दोहा तु चूरस च्युहाह् । वक्त गव पकान,बु लॅजिस
बैंकस मंज़ नौकरी । दयन सोज़नम कोरि जोराह । भगवान फोलरॉव्यनख
तु ड्यकु बजि ऑसिन ।

बु गॅयस बैंकुच नौकरी ति करान तु पनुन अयाल ति प्यतरान
। सोरुय गरुबार करान । अमापोज़ सुलि चीर्य रूज़स बु पननि दिलुक्य्
गुबार कलमु कागज़ तारान अदु रॉचुय ज़न गछुहन डॉक्य् ।

पतु येलि कॅशीरि मंज़ आतंकवाद प्रथ अँन्दु फॅहल्योव । लूठ

मार तु नारु वॉरचदात गॅयि दोहँ ख्वतु दोहँ हुरान । ज़िन्दगी जुवन्य गव
मुशिकल तु दुशवार । स्वर्गापुरी बनेयि जहनमु । खोफ तु दहशत
फॉहल्योव सख तु १९९० ईस्वीयस मंज़ आयि अँस्य् ति बाक़ुयन
सुती जुव लर्ज़ु जोम चॅलिथ ।

अतिय प्यठु गव म्यानि शार वननुक नौव दौर शुरु । यि केंछा
मे अमि ब्रोंठ कॅशीरि वोनमुत तु लीखिथ जमाह ओस थोवमुत तु सु
रूद तँती, माजि कॅशीरि हुंज़ि क्वछि मज़ुय । ति क्याज़ि बु ऑसुस
बम्बयि गॉमुच । येलि बु शवलि जनवॅरी १९९० तोरु वापस फीरुस
तु कनन गोम कॅशीरि छुन गछुन । मे ह्योत च्यतु वोतरिस ज़ोर ह्युन अद
यि केंछाह च्यतस प्योम ति कोरुम बेयि दुबारु पनुनि डायरी मंज़ दर्ज ।
यिमव मंज़ यिम जु पांछ यिथ

कॅन्य् छि :-

१. तेलि ओस शूबान माल्युन म्योन-१९८४.

२. निखना पयाम वेसिये-१९८५.

३. तँम्य् मदनवारन चॉवनस मस-१९८७.

४. यीना म्यानि राये ज़ांह-१९८८.

५. गोसु क्याह गोस सु कपॉर्य् द्राव -१९८८.

व्वन्य् यि केंछाह यथ किताबि मंज़ दर्ज छु सुछु तमि वुतशुक
ओहर युस यथ वॉलिंजि सन्य्व तु येम्य् बदनन व्यतरोव ।

पोज़ छु यी ज़ि पनुन गरुबार संबालुन बंकुच नौकरी
करुन्य् मा छु सँहला तु तमि पतु शार वनुन्य् व्यनँच करनि तु लीलायि

लेखनि बॉथ, वाख वननुच लोलुरेह ति व्यतरावुन्य् । यिम रचनायि छे सारेय रॉचन मंजुय लेछिमच । यि केंछाह रातस कापी प्यठ दर्ज करान ऑसुस । सुबहन ज़न ऑसुम वॉलिंग आसान फटुनस आमच ज़ि कांछाह बोज़िहे ।

याद छुम प्यवान ज़ि अकि दोहें ओस म्यान्यून मालिन्य् खांदर । मॉन्ज़ि राथ ऑस । मे ति बोज़नॉव्य् अति केंह वचन तु बॉथ । यिमन मंज व्वलागतुनह् तु नैन्दि सॉविखह् नावुचि ज़ु रचनायि ति आसु शिबन जी ति ऑस्य् अंतिय बोज़ान । यिमन वोथ दार्यव ओश । यिम वेंथ्य् थोद तु आयि हुकु मैनिशि तु कोरहम ड्यकस म्यूठ तु वोनहम मे छा पता ज़ि चु छख यूत जान लेखानह् । यि ओस म्योन मालिन्य् माहोल । अति वोनहख म्यान्यव बेन्यव तु व्यसव—जिजा जी । ऑस्य् ऑस्या अदु यिथय यिम रिकार्ड पलेयर तु कैसेट आन करान तु बहनस (मे) वनान तलय बोज़नाव नोव सोज़ाह ।

बु छस पनुन्यन बायन तु बाबियन श्री भूषण लाल मिस्त्री तु श्रीमती शीलाजी, श्री शाम सुन्दर तु श्रीमती सरला जी, श्री अवतार कृष्ण तु सतोष जी, बेमु सॉब पनुनि बेनि श्रीमती शीला जी तु श्री बाल कृष्ण पेशन, श्रीमती उमा सप्रू तु श्री शादी लाल सप्रू टाठि बेनि ललिता जी तु श्री गंजू सॉब, य्वसु ल्वकटुय येमि संसारु मंजु द्रायम, पनुन्यन बापेंथरन तु ब्यनथरुन हुंद स्यठाह शुक्रिया करान यिम मे प्रथ विज़ि ह्यमथ रूद्य दिवान तु म्यान्यन रचनायन दाद दिथ वनान—स्यठाह जान ह्—स्यठाह जानह् ।

बु छस पनुनि हशि माजि स्वर्गीया राज लक्ष्मी तु हेहरु बाब

स्वर्गी त्रिलोकी नाथ ऐमा सॉबस विज़ि विज़ि स्वर्ग अनान, येम्य मे प्रथ
विज़ि अँकिस कोरि हुंद् पॉठ्य लोल बोर । तिम ऑस्य मे सुब शाम
द्वछि द्वछि ऑही करान । श्री राम कँस्यतन जि स्वय पूशतनम ।

बु छस पनुनि टाछि ज़ॉम देवा बैनि जया जी ठुसू सुन्द शुक्रिया
करुन पनुन फर्ज ज़ानान य्वसु म्योन अख अख वचुन बूजिथ मे म्वनि
तु मीठ्य ऑस करान ।

बु छस पनुनिस टॉठिस देवर जी श्री उपेन्द्र जियस तु यिहुंजि
श्रीमती गिरजा जियि हुंद ति शुक्रिया करान युस उपेन्द्र जी मे थेकिथ तु
लोलु सान वनान ओस चु लेख त, बु ग्यवय ।

बु छस पनुनि टाछि तु ज़िछि कोरि सुचित्रा रैणा तु अँहंदिस
महाराज़ लालस अनिल जियस रुत तु रुचर कांछान यिमव यि किताब
ब्रोंठ पकनाबनस मंज़ मे स्यठाह साथ द्युत । पनुनि दोयमि कोरि सोनाली
कौल तु अँहंदिस महाराज़ मदनस विशाल जियस बोड आय कांछान,
यिम मे लेखनुच तु लेखान रोज़नुच प्रेरणा दिवान ऑस्य । बु छस
पनुनिस पौत्रस उज्जवल ऐमा तु पनुनि टाछि न्वशि सुप्रिया हुंद ति
शुक्रिया करान ति क्याज़ि यिमन ऑस म्यानि ख्वतु चँर कल म्याँन्य
शारु सौम्बरन किताँबी सूरँच मंज़ वुछिनुच । बु छस पनुनि त्वकिच
कोरि दीप्ती तु अँहंदिस महाराज़ अमित जियस ऑही करान जि भगवान
फोलराँव्यनय यिमन सारिनुय तु मैति येछिन यिहुंद बहार वुछुन । बु
छस श्रीमती दुलारी मनवटी, श्री जवाहर मनवटी, श्रीमती रेणुका ऐमा तु
श्री शेलेन्द्र ऐमा, श्रीमती सुगन्धि गंजू तु श्री सुनील गंजू सुंद ति शुक्रिया
। बु छस सारिनुय दर्दिलन वॉर्यविक्यन क्यो मालिनिक्कन हुंद धन्यावाद

करान अगर मे वशफन कांह नाव बाकुयआसि रूदमुत तिमन छस बु
मॉफी मंगान । बु छस खास कॅरिथ पनुनिस टाठिस बॉपथर संदीप
मिस्त्रीयस (युस अमरीकाहस मंज़ छु मगर कॉशरचुक छुस सख
लगाव) द्वछि द्वछि ऑही करान । सु ओस मे पोतुस पथ टेलीफोन
करान वनान—बहनय च लेख तु किताब बु छिपनाव । दय थॅविनस
मूजूद । लछि त्रोगुन आय आसिनस, विक्रमस, विकासस, मनीशस
अशीशस तु सुमति सान । यिन मे मालिनिकिस बरस अचानय ऑस्य
वनान असि बोज़नाव ताज़ बॉथा ।

येमि किताब हुंन्ध् कैंह वचन छि ग्वड्ति छाप सपुद्यमुत्य् कॉशुर
समाचारस, खीर भवानी टायमज़स, मिलचार नाव पत्रिकायन मंज़ ।
येमि सुत्य् म्योन होसलु बड्यव । यिमन रिसालन हुंघन सम्पादकन हुंज़
ति छस स्यठाह शुक्रगुज़ार ।

यवसु कथ मे ग्वडु पज़िहे बावन्य स्व छस बु व्वन्य वनान ज़ि
अँगर नु मे वतुहावुख मेलिहे बु कति करुहा यि किताब छाप करनुच तु
बाज़र कडनुच ह्यमथुय । बु कति अनु स्व ज्यव, तिम शब्द तु सु बाश
युथ बु पनुनिस गाशि तारकस तु वतु हाव-कस श्री पृथ्वी नाथ कौल
सॉयिल सॉबुन धन्यवाद करु यिमव मे कॉशुर श्वद् लिपि मंज़ मायि
बोरुत मदद कोर । भगवान थॅविनख ओर जुव तु दौर कोठ तु मे
हिव्यन बाशि रॅस्यत्यून कॉशुर लेखन वाल्यन रूज़िन यिहुंज़ आश
कॉयिम । यिम छि कॉशरि अदबुक्य् बॅड्य चुक्य्दार यिहुंज़ यिम कामि
छि सारिनुय व्यज़ । यिम छि मशहूर शॉयिर सहॉफी तु लिखॉरय् तु
यिम छिनु कुनि ति तारुफुक्य् म्वहताज ।

ऑखरस मंज़ छु म्योन कर्तव्य बनान पंजाब नैशनल बैंक चन
तिमन व्यसन सँदरन हुंद शुक्रानु करुनयिम मे सुत्य् कॉमआसु करान
तु लंच अवरस बेतरि फुर्सच हुंदिस वक्तस मंज़ आसु बजि आमादगी
सान मयानि नवि नवि रचनायि बोज़ान तु दाद दिवान । बेयि आसु तिम
यथ किताबि प्रारान जि कर तु कमि वक्तु छेपि । यिम गॉयि तमी
बैंकचि व्यसु येति प्यठु बु मनेज़र सुंदिस ओहदस प्यठ रिटायर गॅयस
तिज़न गव पंजाब नैशनल बैंकुक शालीमार ब्रांच ।

ऑखरस येलि म्याँनिस सॉमियस ति मयान्युन रचनायन मंज़
दिलचसपी पॉद गॉयि तु ऑस्ट् व्वन्य् बडु चाव सान म्यानि नवि नवि
रचनायि बोज़नु खॉतरु मे पतय रोज़ान । मयानि अमि कामि हुंज़ि
मालुयि किन्य् ऑस्य् यिम व्वन्य मे गरुचन बाकुय काम्यन मंज़ मे मदद
करान तु मे यथ लेखन कामि खॉतरु मोकु फराहम करान तु वनान गछ
कर चु पनुनी कॉम पूर । अदय मे यथ मकामस ताम वातनु बापथ जुव
जानु मेहन्त करुन्य् । पछय ऑसुम नु यिवान जि यिमन कॉचाह फिकिर
छि म्यानि येमि कामि हुंज़ । अमि सुत्य् म्यूल मे कॉफी उत्साह । भगवान
दियनख रुमुरेशुन आय तु पोशन पाय ।

यि किताब छस बु पनुन्यन् द्वन गुलालन पनुन्यन् द्वशवन्य्
कोर्यन हुंघन शुर्यन आशवासन तु तनिषेक वेनी कौल सुंदि नाव
करान यिम मे पाणव ख्वतु टॉक्य छि । दय थॅविनख वारु वति ।

बिमला ऐमा मिस्त्री

कॉशुर पॅरिव लीखिव यिथु पॉठ्य

कॉशिर्य अछर :-

क,ख,ग,च,छ,ज,ट,ठ,ड,त,थ,
द,न,प,फ,ब,म,त,र,व,श,स,ह, क्ष,त्र,ज्ञ ।

कॉशिर्य स्वर :-

अ,आ,अँ,ऑ,इ,ई,उ,ऊ,अं,ए
ऐ,ओ,औ,व्व,य ।

स्वर	मात्रा	वरताव
अ	मूल स्वर	अख (एक), अज (आज), मस (बाल), बर,(द्वार), कन (कान), पर (पढ़ो),
आ	।	आश (आशा), आव (आया), सास (हज़ार), नाव (नाम),माम (मामा)दान (चूल्हा)
अँ	ः	अँछ (आंख),गॅर (घड़ी), चॅर (चिडिया), मँछ (मवखी) बॅड (बडी),नॅर (भुजा)
ऑ	ँ	ऑल (इलायची),ऑठ (आठ), मॉज (माता),दॉन (अनार) मॉश (भैंस),लॉर (खीरा)
इ	ि	यि (यह),यिम (ये),छि (हैं),ज़िठ (बडी) ति (और, भी) यिछ (ऐसी)छिठ (छींट)
ई	ी	ईद (ईद),शीन (बर्फ),सीर (ईंट),टीन (पीपा), तील (तेल) मीच (नाप) रीथ (रीति)
उ	ु	चु (तुम),बु (मैं),तु (और),सुच (दर्जी) रुख

अ	८	(रेखा), टुख (दौड) कुन (नीव) जु (दो) जुज़ (दौ दौ), चुन (चूरा), तुर (सर्दी), कर (क्रूर), कमथ (मूल्य) तुंछ (कान की बाली) सुत्य (साथ)
उ	७	हु (वह) सु (हु), छु (है), कुल (पेड), वुठ (होठ), गुर (घोडा) कुठ (कमरा) फुट (फुट, टूटा)
ऊ	९	नून (नमक), कूर (कन्या), नूल (नेवला), गूर (गवाला), चूर (चोर) दून (धुनिया) कूट (खम्बा)
ए	८	चेर (देर), हेर (सीढी), जेठ (जेष्ट), तेल, (तिल), चेन (महसूस) चेर (खूबानी) पेछ (पेचिस)
ऐ	८	त्रे (तीन), शे (छः), मै (मुझे), चे (तुमको), बेनि (बहन) वैठ (मोटी) बैयि (दुबारा) खेयि (खायेगा, खायेगी)
ओ	१	ओल (घोंसला), मोल (पिता), चोर (चार), बोर (बिल्ला) कोन (काना) सोन (हमारा), टोठ (प्यारा) लोव (नर्म)
औ	१	होट (गल्ला), वोछ (बछडा), होस (हाथी), कोठ (घुटना) मोट (मोटा) तोन (पतला) दोल (आँचल)
व्व	व	व्वठ (छलांग), द्वद (दूध), ब्वद (बुधि), म्वल (मूल्य) क्वल (नहर, कुल) स्वख (सुख) प्वफ

		(पोफी)द्वस (दीवार) ग्वर (गुरु)
य-	य-	द्यान (ध्यान) द्यल (छिलका) ब्याख (दूसरा)ब्योल (बीज) म्योन (मेरा) ग्यव (घी),छ्यठ (झूठन)प्यंद (गेंद)
-य	च	म्यॉन् (मेरी),चॅल् (भागे),वॉरय् (बारी)फेर्य (कतरे) हॅल् (टेढ़े),नॉल् (नाली),कॅन् (पत्थर) नॅट्य (गढे)
अं	ः	दंद (दांत) मंज (में) स्यंद (सिंधु) वांदुर (वानर) वंदु (जाडा)दांद (बैल) कंज (ओखल)
र	/	ग्रख (उबाल) क्रख (चीख),ग्रंद (गिनती), ग्रक्ख (निगलना)ग्रोन (गोरा)श्रूच (पवित्र)द्रोत (द्रांती)
र	र	चॉर्य (चुने)छॅर्य (खाली)गॅर्य (सिंघाडे), जॅर्य (बहरे) सॉर्य (सारे)यपॉर्य (यहा से), अलमॉर्य (अलमारी)

याद थॅविव :- नावन (संज्ञायन) खास नावन संस्कृत शब्दन,तु हिन्दी शब्दन
सुत्य् छि असली अछर वर्तान्य - यिथु पॉट्य ज़न:-कृष्ण, भगवान, शिवशंकर,
लक्ष्मी, क्षण, मूक्ष, ज्ञान, रॉज्ञना

-पी०एन० कौल सायिल

यथ शारु गौन्दिस मंज़

शुमार	रचनायि हुंद नाव	सफु
01.	ग्वरु सुंद नाद	32
02.	शोक छुम प्रारुहस दीदारस	34
03.	येमि भवसरु तारतम अपोर	36
04.	बबु भगवान	38
05.	मॉज सरस्वतिये बॅविनय जय	41
06.	प्रभातस नूर वुछमय	43
07.	भवसरु नावि तौरिथ गोम	45
08.	बोज़ि वेस्यु ताज़ु अफसानय म्योन	48
09.	मॉज शेरावालिये	51
10.	वेसिये लालु ललुनावुन प्योम	53
11.	शामन कूत प्रारुनॉवनस	56
12.	हर हर .गंगे बोलनावतम	58
13.	कृष्ण लीला	61
14.	अथे यितम बुति तरुहा	64
15.	मे वनतय मॉज बु कति प्रारय	67
16.	मन म्योन बनावतम चुंय स्वंदर	69
17.	शेरि लागय भगवेंती	71

18.	बेनिये ब्योन ब्योन छि साहूकार	74
19.	आरस प्यठ हय तंबुलावनस	76
20.	लालस छारान	79
21.	चे क्याह लालन हुंज़ खबर	81
22.	यँम्बुर ज़लि फोल्य बैयि पोश	83
23.	मे तनु दिलुक करार रोवुम	86
24.	मे हय अँशकु चूरन दिलस नार द्युतनम	88
25.	नियि तस पयाम कुस म्योन	91
26.	तँम्य् मदनवारन चॉवनस मय	93
27.	सोज़ दिलुकुय बोज़ वेसिये	96
28.	वावेला	99
29.	हॉरी व्वलुतय दारि बेहतम	102
30.	दूरि बुलबुल आव	104
31.	मे च़लिहे मलालय	107
32.	नेन्द्रि सॉविख	110
33.	मे हय बूज़ लालु यियि सालस अज़	112
34.	व्वलु गतुन	115
35.	अख दमा यिखना	119
36.	बासन छु अज़ यियि यार	121
37.	बु हय छस प्रारान बालुयारस	123
38.	हा चु मो लाग बे आर	126
39.	यी ना म्यानि राये ज़ांह	129

40.	चलवुन यावुन	130
41.	छि कॉत्याह शाह में बाक्य	133
42.	में छम चॉन्य् आश	135
43.	पोत फेरतो जानानो	137
44.	तैलि ओस शूबान माल्युन म्योन	139
45.	त्यौंगलनार	141
46.	ओर मय आव बॉलिये	143
47.	सोपुन	145
48.	तनु रोट में पानय स्वमनु श्रु राम	147
49.	प्रभात हो आव	149
50.	अन्तः करण ग्वडु नावुन छुम	152
51.	छु वक्तन क्युथ में डास कौरमुत	155
52.	कृष्ण लीला	158
53.	शांदुगॅन्डय तोतु	162
54.	ग्वरु वापदीश	164
55.	बालुयार आम यॅचकॉल्य्	166
56.	तनु प्यठु प्रथ कोरि चोलुये	168
57.	साई भजन	170
58.	वुनि कूत चालुन छुम	174
59.	लोलुनार-१	178
60.	लोलुनार-२	180
61.	पनुन्य् कॅशीर	183

62.	टोठ शामस्वन्दर	185
63.	ज़ामनस लथ लॉयिथ	188
64.	मालिन्यून छम शॉद्य	190
65.	मुबारक कॅर्यतव	192
66.	मे पगहुच छे आशा— १	194
67.	मे पगहुच छे आशा— २	197
68.	चालुन प्योम	199
69.	होशुक पोश यस सुलि फ्वले	201
70.	दिलुक दोद	203
71.	माजि कॅशीरि आलव	206
72.	साई नाथु मो रोज़ दूर दूर	209
73.	दिलबरो कोत चोलहेमो	212
74.	फेशिल माहरेन्य्	214
75.	तॅम्य् ओरु हाव्यनम नज़ारु काँत्याह	216
76.	परू जुवु रामु रामय	218
77.	कृष्ण लीला	220
78.	पाटिव पूच	222
79.	मे छु तस लोलाह बरुनुय	224
80.	आरस मंज़ हय अचुनुय प्योम	226
81.	चुपॅद्य्— अख हथ वाख	229



ग्वरु सुंद नाद

अज़ ग्वरु लोलस लॅजिम सख ग्रख
ग्वर छुम वनान व्वलु जल जल पख
युथनो व्वख गछि नीरिथ बस
ज़ंगन नठ अचि लग्यख टख
व्वलु जल जल पख
व्वलु जल जल पख
अज़ ग्वरु लोलस लॅजिम सख ग्रख

०

ग्वरु मॉल्य वौननम सफर छा सख
ममतायि हुंद् सरफ मा दिवान टख
रोज़तम सनिदान रठतम डख
अथुरॅटिथ पकुनाव कदुम अख अख
अज़ ग्वरु लोलस लॅजिम सख ग्रख

०

डीशिथ यि म्यानि ग्वरु लोलुच ग्रख,
ग्वरु मॉल्य् द्युतुम यथ शरीरस नख
टख द्युतुम ममतायि कुल्फ अख त्रख
दौपनम पख व्वलु जल जल पख
अज़ ग्वरु लोलस लॅजिम रख ग्रख

०

दोपनम ग्वरु मॉल्य् युथनु दिख थख
तति चेनख द्वद्व माजि हुंद ब्रख
व्वलु ब्रोंह कुन पख जल जल पख
अज़ ग्वरु लोलस लॅजिम सख ग्रख

०

वौननम ग्वरु मॉल्य् छे लोलस ग्रख
ग्वरु द्वारस तॉर्य् यलु छिय पख
ल्वति मु कदम तुल शौहलि यिनु ग्रख
व्वलु जल जल पख ब्रोंह कुन पख
अज़ ग्वरु लोलस लॅजिम सख ग्रख

०

अज़ मैति टोठ ग्वरु आम सन्म्वख
वौननम ठहरान छुनु कॉन्सि वख
तन त्रोंव बिमलायि करुन बख बख
यनु ग्वरु लोलस लॅजिम सख ग्रख
अज़ ग्वरु लोलस पज़ि लॅज ग्रख
ग्वरु मोल छुम वनान व्वलु जल पख



शोक छुम प्रारुहस दीदारस

वुफि अकि नेरुहॉ यथ संसारस,
शोक छुम प्रारुहस दीदारस ।
लालस प्रारुहस दीदारस
शोक छुम प्रारु तस दीदारस ॥०॥

भ्रम दिथ अँनिनस यथ संसारस,
व्यवहारस मंज़ ऑडु रॉवनस ।
वुडुवुन बुलबुल वुडि मंज़ इशारस ॥
शोक छुम प्रारुहस दीदारस ॥०॥

लालेचे पपरे तर छुम द्रामुत,
मनुसरसुय छिम फोल्युमत्य पोश ।
लोल सान सोज़हा डालि दिलदारस ॥
शोक छुम प्रारुहस दीदारस ॥०॥

म्वल मे छांजोव यथ लोलु म्वखतस,
प्वखतु च्युनुम नु कांह खरीदार ।
यस वुज़ान पोज़-लोल यिवान शुमारस ॥
शोक छुम प्रारुहस दीदारस ॥०॥

क्याज़ि छुख रोज़ान दूरि दूरि लोलो,
मन म्योन ज़ानतु व्वन्दु शिवालो ।
लोलु मिसाला छय यि बेमिसाल ॥
शोक छुम प्रारुहस दीदारस ॥०॥

रंगदार पोश फोल्य कत्य गुलज़ारस,
अडु फोल्य् बरु गँयि तनु कत्य ।
प्राण म्यौन्य अर्पण चॉनिस नावस ॥
शोक छयन प्रारुहस दीदारस ॥०॥

कौतिहन ज़ीवु द्वारन ह्यनु आयस,
छस छेन्यि पेमुच यित गछु सुल्य ।
बिमलायि ति व्वन्य् मुचर तौर्य् ग्वरुदारस ॥
शोक छुम प्रारुहस दीदारस ॥०॥

वुफि अकि नेरुहा यथ संसारस ।
शोक छुम प्रारुहस दीदारस ॥०॥

✱

येमि भवसुर तारतम अपोर

ग्वरु मालि लगुयो नादाह बोज़तम,
 येमि भवसुर मैति तारतम अपोर ।
 कठिने भवसुर बोठ चुय खारतम ॥
 येमि भवसुर मैति तारतम अपोर ॥०॥

कन थवतु च्युह खंड म्यान्यून नादन,
 शोक छुम मै करुहय पोशि पूजा ।
 प्राण पनुन्य अर्घु कनि लागय व्यद हावतम ॥
 येमि भवसुर मैति तारतम अपोर ॥०॥

संसारु क्रुमनय ववर छुनम रोटमुत,
 ज़ालाह छुनम त्रैवमुत ज़ेठि ज़्यूठ ।
 द्रोंत अथ चु वायतम ज़ाल च़ट नावतम ।
 येमि भवसुर मैति तारतम अपोर ॥०॥

काम क्रूध तय विषयि मदु वालु नावतम,
 मायायि हुन्दि ज़ालु म्वकलावतम ।
 अहंकारु कोह थॉंग्यू मैचि मिलुनावतम ॥
 येमि भवसुर मैति तारतम अपोर ॥०॥

वॉरु खूंखार सुह मतु ग्रज़नावतम,
 द्वयुतु भाव मनि मतु व्वपदावतम ।
 अँन्य् छस प्रैनिरुच ज्ञान करनावतम ॥
 येमि भवुसरु मेति तारतम अपोर ॥० ॥

मनु सेतारस तारु वायिनावतम,
 लोलु मिज़राब तथ फिरुनावतम ।
 पज़रुक्यून स्वरुनुय लय रटुनावतम ॥
 येमि भवुसरु मेति तारतम अपोर ॥० ॥

पज़ि मनु रुत्य् रुत्य् कर्म करनावतम,
 हनि हनि च़ठतम मोहँ माया ।
 बँखती दिथ मुक्ती दिवुनावतम ॥
 येमि भवुसरु मेति तारतम अपोर ॥० ॥

भ्रमुचे वुनलि मंज़ गाशाह हावतम,
 ज़न्मुक सफर क्रूठ छोटरावतम ।
 शाह दिथ ज़िन्दगी रथि खारनावतम ॥
 येमि भवुसरु मेति तारतम अपोर ॥० ॥

छस मदहोश छस मस नैन्द्रे,
 मै हा नाव यीरु छम मंज़ सोदरस ।

हमखूर रँटिथुय नावि लमुनावतम ॥
येमि भवुसरु मेति तारतम अपोर ॥०॥

पज़रुचि वयतारनी तारु तारतम,
वति बोज़ु नावतम सूहम सू ।
सतुचित आनन्द नगर बिमु वातनावतम ॥
येमि भवुसरु मेति तारतम अपोर ॥०॥

येमि भवुसरु मंज़, कठिनि भवुरसु मंज़
येमि भवुसरु मेति तारतम अपोर ॥०॥

✱

बबु भगवान

(भगवान गोपीनाथ जी हुंघुन चरणकमलन अर्पण)

मे हय पोशि ज़ाँचन हुंघु अँनिम बाँरी,
लागुहय टाठि बबस चाँरुय चाँरी ।
यँचकॉल्यु दिचुनम बबुनय वाँरी ॥
लागुहय टाठि बबस चाँरुय चाँरी ॥०॥

सुलि प्रभातन वेंथिथ गरि बो द्रायस,
थानस वॉचसस ह्यथ द्वदु दूर्य ।
बॅखुत्य् ऑस्य् मेय सुतिन ननुवॉरी ॥
लागुहय टाठि बबस चॉर्य् चॉरी ॥० ॥

गणपतयारु हेचमय ताज़ पोशि डॉली,
सोमयारु अँनिमय द्वदु वॉरुय मे ।
तुलुमुलि खॉरिम व्यनुकी बॉरी ॥
लागुहय टाठि बबस चॉर्य् चॉरी ॥० ॥

खरयारस मंज़ ध्यान दोरमसय,
बजि श्रद्दायि कोरमस गॅजगाह ।
जयजयकारु ग्रज़ वॅछ च़वापॉरी ॥
लागुहय टाठि बबस चॉर्य् चॉरी ॥० ॥

चायस यैलि बो बबुसुन्द गुरुतय,
तति तॅम्य् कॅरनम दया दृष्टी ।
पाप तॅम्य् गॉलिनम शाप चॅलिम सॉरी ॥
लागुहय टाठि बबस चॉर्य् चॉरी ॥० ॥

ग्वरु कदमन प्यठ ड्यक गॅहनोवुम,
यी वोनूनम तय ती कोरमस ।

बब गोम ख्वश तय व्वश चॅलिम सॉरी ॥
लागुहय टाठि बबस चॉर्य चॉरी ॥०॥

बबु भगवान हय ल्वलि ललुनोवुम,
पादन कॅरिमस म्वनि तय मीठ्य ।
ल्वति ल्वति बॉव्यमस द्वख तय दॉदी ॥
लागुहय टाठि बबस चॉर्य च़ारी ॥०॥

मनुसरु फोलिमय पोशि अम्बॉरी,
व्वलसुनस आमय लोलुक बहार ।
डीशिथ बबन दोप कासय हय खॉरी ॥
लागुहय टाठि बबस च़ार्य च़ारी ॥०॥

डीशिथ ग्वरन म्यानि लोलुच रेह,
बबु भगवानस गन्योव म्योन श्रेह ।
गम तु फिकिरु कासनच हैचुख ज़िमुवॉरी ॥
लागुहय टाठि बबस च़ार्य च़ारी ॥०॥

ब्रोंठु कनि रूज़सस अथ दॉर्य दॉरी,
दोपमस मैति दितु बबु केंछुह ।
तोरु शॉन्ती लवु दिच़नम च़वपॉरी ॥
लागुहय टाठि बबस च़ार्य च़ारी ॥०॥

सन्त्वष्ट बब गोम करॅनम मे यॉरी,
दोपनम सन्तोषस करय आबियोरी ॥
भावनायि निर्मल सग थवय जॉरी ॥
लागुहय टाठि बबस चास्य चॉरी ॥०॥

✱

मॉज सरस्वतिये बॅविनय जय

यनु आयिहम म्वखस द्रायम नूरु फॅतिये
मॉज सरस्वतिये बॅविनय जय ।
ठॅहराव कॅरिथय वास करत येतिये ।
मॉज सॅरस्वतिये बॅविनय जय ॥०॥

ग्वडन्य् मॉज करुहॉय चॉनी बु त्वता,
छख कोमल तय स्वंदर कौंचाह ।
इंजि मन थवतम मंज पूजाये नेतिये ॥
मॉज सॅरस्वतिये बॅविनय जय ॥०॥

गछतम मेहरबान मेति अकि नज़रे,
दितु नार छठ म्यानि अज्ञानु बबरे ।
कांठु बबरि गॅयमय सूरय फोतिये ॥
मॉज सॅरस्वतिये बॅविनय जय ॥०॥

अज्ञान कौसिथ ज्ञानु वथ हावतम,
 लोलुकिस शोरस च़ेय त्यम्बर त्रौवथम ।
 रेह लौजिम लोलस वचन द्रायि किथिये ॥
 मॉज सॅरस्वतिये बॅविनय जय ॥०॥

जोनथम बानु पानु नविसरु गॅरथस,
 यिथु कुन्य्थुरान छय क्रॉज बानय ।
 मुर मॉज दोरमय चानि बरनि पठिये ॥
 मॉज सॅरस्वतिये बॅविनय जय ॥०॥

चॉनिस हुकमस तौमील क़ोरमय,
 ॐ भूर भुवः स्वः ज़पनुय ह्यौतमय ।
 बिमस रूज़्यूज़ि हॅछिनावान लौत लौतये ॥
 मॉज सॅरस्वतिये बॅविनय जय ॥०॥

शेरि लागय दोहय अछि पोशि फोतिये,
 पादि कमलन दिमय मीठ्य येति तॅतिये ।
 व्यनु पोश सोम्बरिम हय मे लव हॅतिये ॥
 मॉज सॅरस्वतिये बॅविनय जय ॥०॥

✱

हय प्रभातस नूर वुछमय

होशि बुलबुल चाव बागस वुछ कमिताम चावुहय,
गोशिनय लँज फुलया मेय ताज़ ताज़ ताज़ हय ।
सोर संसार वुछ नेन्द्रि छुय गोमुत अज़ बेदार पूर हय ॥
हय प्रभातस पूर वुछमय क्याह छु नूरय नूर हय ॥०॥

जोशि बुलबुल आव तुलुने पोशिनय व्यूर हय,
क्वल रादन लोलु पनुने पोशिनूलाह फ्यूर हय ।
विगिनि वनुनुन बोज़ुन यितु सोंत कालाह फ्यूर हय ॥
हय प्रभातस पूर वुछमय क्याह छु नूरय नूर हय ॥०॥

अज़ छु कुकिले बोश आमुत, गोश थव कू कू क्याह,
अमर्यतु ज़लु पांचादुरन ग्रज़ छे आरन जाबजा ।
लोलु बॉतन मान लँजमुच छुय ग्यवान कोस्तूर हय ॥
हय प्रभातस पूर वुछमय क्याह छु नूरय नूर हय ॥०॥

ही तु मसवल बेयि यँम्बरज़ल हिकचि कँर्य कँर्य द्रायि बाग,
टेकु बटुन्यन बेद्य मुशकन तय गुलाबन हैनि जाग ।
गिलि टूर्य शायि पथ शायि थोव मस वोफूर हय ॥
हय प्रभातस पूर वुछमय क्याह छु नूरय नूर हय ॥०॥

चन्दुन ह्योतुमय रंदुन पानय मंदुन्य हेचमय मे ब्वद,
वाव सोंतुक कूत शीतल छुय स्वभाव किन्य सु स्वद ।
द्वद मॅन्ध मॅन्ध थॅन्य छि नेरान बेयि ग्यवुकुय दूर हय ॥
हय प्रभातस पूर वुछमय क्याह छु नूरय नूर हय ॥०॥

भाव वुडरन नीज द्रामुच ताज़ु सब्जी फीरमुच,
वन हास्यव राश लोबमुत छखय मॅस्ती फीरमुच ।
रूद थ्यकुवुन रव्यु दैदि तय ललदेदि हुंद सोबूर हय ॥
हय प्रभातस पूर वुछमय क्याह छु नूरय नूर हय ॥०॥

सरु कॅस्य कॅस्य कमु द्रायस ग्वरु दारस चायस,
हरु हरु सौरुम नियम पोलुम अदुहय पेयस पायस ।
ग्वरु शब्दस गूर कॅस्य कॅस्य ललनोवुम पूर हुय ॥
हय प्रभातस पूर वुछमय क्याह छु नूरय नूर हय ॥०॥

ज्ञानु इन्द्रियन ग्राय कॅड्य कॅड्य अन्तः करण श्वद गोम,
द्वन नेत्रन छांफ कौसनम न्यमल मन मे सपद्योम ।
तमुहन फीर नस पथ कुन गव मे विषियन सूर हय ॥
हय प्रभातस पूर वुछमय क्याह छु नूरय नूर हय ॥०॥

मोह नेन्द्रे अँथ्य प्रभातस वुज़नॉवनस बु ग्वरुनय,
दान तय दान बेयि पूजाह हैछि नॉवनस ग्वरुनय ।

दामु दामु द्युतनम लोलुक जाम बर पूर हय ॥
हय प्रभातस पूर वुछमय क्याह छु नूरय नूर हय ॥०॥

सेकि शाठस मेय मुशिक बबुर वॅवथम दिलदाराह द्राख,
दया कॅरुथ बडि बॅडु तु च़कि गमखाराह द्राख ।
दौनी वोनहय बॅखत्य्व यॉरी कॅरथख पूर हय
हय प्रभातस पूर वुछमय क्याह छु नूरय नूर हय ॥०॥

भाग्य मे रुत द्राम पूज़ायि दिच़थम पानय वॉर्य,
चॉनिस वॅथिस विशाल हृदयस बिमु लगहय पॉरय ।
बस कर्मु हीनन ताम यियि नज़रे चानि शोवूर हय ॥
हय प्रभातस पूर वुछमय क्याह छु नूरय नूर हय ॥०॥

✱

भवसरु नावि तारु तॉरिथ गोम

कावु सुन्द टाव टाव मॅशरॉविथ गोम,
वैसिये लालु वुज़ुनॉविथ गोम ।
भवसरु नावि तारु नॉविथ गोम ॥
वैसिये लालु वुज़ुनॉविथ गोम

न्यथ ह्यथ दीहस च्यतु नॅन्य् कॅडनस,
 वावु हालि मंज हययथु नॅन्य थॅवनस ।
 अच्यतु च्यतु कुय चेनु नॉविथ गोम ॥
 वेसिये लालु वुज़ुनॉविथ गोम

नखु ब्यूठुम तय डख पानु रौटनम,
 मोहु अंधकारुच छांफ कौसनम ।
 भ्रमु बॉज्य् गार दूर चॅलु रॉविथ गोम ॥
 वेसिये लालु वुज़ुनॉविथ गोम

दीहि अभिमानस नार दिथ हय गोम,
 जॉलिथ रावुन कुम्बकरण, मेघनाथ गोम ।
 भावुक विभीषण राज प्रॉविथ गोम ॥
 वेसिये लालु वुज़ुनॉविथ गोम

नल नील सुग्रीव भावस बॅसिथ गोम,
 रामु नावुक सोथ गन्डु नॉविथ गोम ।
 राम व्वन्दि ललुवुन हैछि नॉविथ गोम ॥
 वेसिये लालु वुज़ुनॉविथ गोम

फोतु तय मॅवखतु ब्योन ब्योन करुनॉवनस,
 म्वखतु हार हटि गन्डुनुय हैछि नॉवनस ।

धारनायि दान दारु नॉविथ गोम ॥
वैसिये लालु वुज़ुनॉविथ गोम

ह्यथ यी ऑसुस आमच कर्मुक,
व्यतुरुन ती प्यतरावुन प्योम ।
कम कम रंग येति हॉविथ गोम ॥
वैसिये लालु वुज़ुनॉविथ गोम

सॅन्य तय व्वगुन्य बो बदि कडु नॉवनस,
रोवमुत ल्वकुचार याद पावु नॉवनस ।
लोलु नार मनि वुहु नॉविथ गोम ॥
वैसिये लालु वुज़ुनॉविथ गोम

हनि हनि क्रुडु ज़ालव मंज़ु कॅडुनस,
मायायि ज़ालु निशि म्वकुलॉवनस ।
रामु नाव दोजि लेखु नॉविथ गोम ॥
वैसिये लालु वुज़ुनॉविथ गोम

क्रूधक्य तुलु त्यंवगल सरु करुनॉवनस,
अज्ञान ज़ोलनम ज्ञानु तीज़ु सुत्य ।
रुमु रुमु रामु परुनॉविथ गोम ॥
वैसिये लालु वुज़ुनॉविथ गोम

भक्ति भाव मन पनुनुय व्वलुसोवुम,
कोसनम लूब मोह बेयि अंधकार ।
राम शाम ज़पुन व्यछुनॉविथ गोम ॥
वैसिये लालु वुज़ुनॉविथ गोम

‘बिमलायि’ तन मन रामस वंदुन प्योम,
शामस करुन प्योम सोरुय अर्पन ।
श्रु राम पनुन सायि थॉविथ गोम ॥
वैसिये लालु वुज़ुनॉविथ गोम

कावु सुन्द टाव टाव मॅशॉविथ गोम ।
वैसिये लालु वुज़ुनॉविथ गोम

✱

बोज़ि वैस्य् ताज़ु अफसानय म्योन

दोहदिश छख वनान छखुन कैह वनानय,
बोज़ि वैस्य् ताज़ु अफसानय म्योन ।
येमि सुंद बावय छुम सु जानानय ॥
बोज़ि वैस्य् ताज़ु अफसानय म्योन ॥०॥

यस पतु सीता द्रायि लारानय,
लक्ष्मण जियन यस रोट दामानय ।
दशरथ राजुन सु नूरि नारानय ॥
बोज़ि वेस्य् ताज़ु अफसानय म्योन ॥०॥

केवट जी नाव ह्यथ ओस प्रारानय,
ओरु यियम श्रु राम नावि तारन ।
रामजी तस गव भवसरु तारानय ॥
बोज़ि वेस्य् ताज़ु अफसानय म्योन ॥०॥

अहिलिया कनि मंज़ ओंसुय रोज़ानय,
शापुकिन्य् स्वय ओंसनु म्वकलानय ।
रामुन्य पाद लॅगिस नॅन्य् द्रायि पानय ॥
बोज़ि वेस्य् ताज़ु अफसानय म्योन ॥०॥

जसुदा ओंसुय गुरुस मंदानय,
गूपियि कृष्णस थॅन्य् ख्यावानय ।
ब्योन ब्योन रुफ ओसुख हावानय ॥
बोज़ि वेस्य् ताज़ु अफसानय म्योन ॥०॥

कृष्ण रुप कंसस छुय सु मारानय,
रामु अवतारु रावणस मारानय ।

ब्रह्मा विष्णु पोशि वरुन करानय ॥
बोज़ि वेस्य् ताज़ु अफसानय म्योन ॥०॥

पीडा तु संताप सुय हरानय,
तप तु साधना छु स्यद करानय ।
आनन्दु अमस्यथ सुछु चावानय ॥
बोज़ि वेस्य् ताज़ु अफसानय म्योन ॥०॥

मन तय ब्वद सॉन्य डन्जि अनानय,
इन्द्रैय,सानि शोमरावानय ।
अठकल सॉनी वंति लागानय ॥
बोज़ि वेस्य् ताज़ु अफसानय म्योन ॥०॥

युस येति मोहें सेंदि यीरु गछानय,
गतु गीरिस मंज़ ह्यनु यिवानय ।
माया ज़ालु मंज़ु न्यबर कडानय ॥
बोज़ि वेस्य् ताज़ु अफसानय म्योन ॥०॥

रोवमुत ओसुम ह्यस होश पॉस्यज़ानय,
मॅच हिश गॅमुच बॅय मस्तानय ।
होश च़ेय द्युतुथ बिमस तु ड्युंठुम नूरानय ॥
बोज़ि वेस्य् ताज़ु अफसानय म्योन ॥०॥

दोहदिश छख वनान छखनु कैह वनानय,
 बोज़ि वेस्य् ताज़ु अफसानय म्योन ॥०॥
 येमि सुन्द बावय छुम सु जानानय ॥
 बोज़ि वेस्य् ताज़ु अफसानय म्योन ॥०॥

मॉज शेरांवाँलिये

फोटु वॅस्य् प्योम ज्यूत्य् वुछमये,
 म्वखतु गोमय नॉलिये ।
 हय प्रभातस रूप वुछमय ॥
 मॉज शेरांवाँलिये मॉज शेरांवाँलिये ॥०॥

न्यूस्फ रातन च्यथ मे दिचथम,
 नेन्द्र गॅजमय हॉरिये ।
 डॉल्य् ह्यथ लोलुच बु वॉचस ॥
 मॉज शेरांवाँलिये मॉज शेरांवाँलिये ॥०॥

लोल आमुत यॅच मे चोनुय,
 होल जिगरस छुम गोमुत ।
 चरण अमर्यथ दामु चमहय ॥
 ाँज शेरांवाँलिये मॉज शेरांवाँलिये ॥०॥

माय ओसुम छाया अज़ताम,
 माया ज़ालन आवरिथ ।
 यीरु व्यन्यु कॅन्ड्य ज़ाल गॉमय ॥
 मॉज शोरांवाँलिये मॉज शोरांवाँलिये ॥०॥

संसारुक्यु ग्रन्ज रॅस्यु रंग,
 वुछ वुछी व्यसु रेयसय ।
 चेनुनॉवथस रंग चे सॉरी ॥
 मॉज शोरांवाँलिये मॉज शोरांवाँलिये ॥०॥

अज़लय ओसुम कज़ुल कर्मस,
 भूगनॉवथस कर्मु फल चे बुय ।
 ह्यथ अथन क्यथ बारु नेरुहय कॉली ॥
 मॉज शोरांवाँलिये मॉज शोरांवाँलिये ॥०॥

ज़ाग हेचथ लोलस राग द्राव नोन्यु,
 मनुचे तारु लजि वज़ने ताम ।
 साज़ुक सोज़ बोज़तय वनॅहॉरी ॥
 मॉज शोरांवाँलिये मॉज शोरांवाँलिये ॥०॥

माफ कॅरिथ पाप तय शाप गॅल्यु सॉरी,
 प्रज़लवुन म्वख होवथम येलि चे ।

पूरुय् किन्य् सिरियि खोत गाह त्रावॉनी ॥
मॉज शेरांवॉलिये मॉज शेरांवॉलिये ॥०॥

मस नेन्द्रि तुजथस, ह्यसु बुय अँनिथस,
मनु मन्दरस प्योम शोलुवुन गाह ।
दिल फोल बिमस शर द्रास कॉलिये ॥
मॉज शेरांवॉलिये मॉज शेरांवॉलिये ॥०॥

फोतु वेंस्य प्योम ज्यूत्य् वुछिमये,
म्वखतु गोमय नॉलिये ।
हय प्रभातस रूप वुछमय ॥
मॉज शेरांवॉलिये मॉज शेरांवॉलिये ॥०॥

✱

वैसिये लालु ललुनावुन प्योम

कनु तँल्य् लोलु शेछ सुय बॉविथ गोम,
वैसिये लालु ललुनावुन प्योम ।
रसु रसु ह्यसु ह्यसु सुलुनावन प्योम ॥
वैसिये लालु ललुनावुन प्योम ॥०॥

मदुपान हैरि प्यठु ब्वन वालुन प्योम,
 लुहरावुन प्योम मंदोरु तौमीर ।
 ज्ञानु भवुनस हय तोर मुचरिथ गोम ॥
 वैसिये लालु ललुनावुन प्योम ॥० ॥

मुशिकल कोताह हय च़ालुन प्योम,
 हँस्य् पान शैम्य् शैम्य् शुमरोवुम ।
 अँन्दर्युम गुलज़ार फ़ोलु रॉविथ गोम ॥
 वैसिये लालु ललुनावुन प्योम ॥० ॥

लोलुक आमताव व्यतरावुन प्योम
 अपज्युक हावुबाव मँशराव्योम ।
 विगिनि वनुवुन रँस्युल बोज़नॉविथ गोम ॥
 वैसिये लालु ललुनावुन प्योम ॥० ॥

कज़ॉल्य् ज़ामु हय व्वँज़लावुन प्योम,
 गुलाल पानस मलनुय प्योम ।
 पनुनय पान पॉरावुन प्योम ॥
 वैसिये लालु ललुनावुन प्योम ॥० ॥

काम क्रूध लूभ मोह हय त्यागुन प्योम,
 राज़ थालन अन्न शेरुनोवुम ।

ताजु ताजु साल सबि ख्यथ हय गोम ॥
वैसिये लाल ललनावुन प्योम ॥०॥

ब्वछि होत क्वछि ख्यावुनावुन प्योम,
वछस सुत्य् अंगुहीन ख्वनि ललनोवुम ।
लोलस म्वलु म्वलुनॉविथ गोम ॥
वैसिये लाल ललनावुन प्योम ॥०॥

चंगु तय सेतार वायुन हय प्योम,
कनुनुय पर्दु वॅथ्य् त्रॉविथ गोम ।
ललुवुन सूहमसू व्यछुनॉविथ गोम ॥
वैसिये लाल ललनावुन प्योम ॥०॥

संसॉर्य अरुखरि ख्वर् कडुनुय प्योम,
भवुसरु नावि मंज वसुनुय प्योम ।
न्यर्मल भावनायि तारु तॉरिथ गोम ॥
वैसिये लाल ललनावुन प्योम ॥०॥

धर्मु खेति कर्म ब्योल ववुनुय हय प्योम,
लोलु तु मायि सगु नावुन प्योम ॥
शान्त स्वभावु बिमलायि शॉती दिथ गोम ॥
वैसिये लाल ललनावुन प्योम ॥०॥

कनु तॅल्य् लोलु शेछ सुय बाँविथ गोम,
वेसिये लालु ललुनावुन प्योम ।
रसु रसु ह्यसु ह्यस सुलुनावुन प्योम ॥
वेसिये लालु ललुनावुन प्योम ॥०॥

✱

शामन कूत प्रारुनॉवनस

बोज़ि सखी अँमिय घन शयामन,
शामन कूत प्रारुनॉवनस ।
वन्दुनॉवनस जुव सुब शामन ॥
शामन कूत प्रारुनॉवनस ॥०॥

गूकलु तय मथरायि छोरुम,
छँन्डिथ त्रोवम बिन्द्राबन ।
अकि अकि वॉचस कृष्ण धामन ॥
शामन कूत प्रारुनॉवनस ॥०॥

ज़ैर्य लँजमय श्रेहे आबशारन,
लोलु आगुर नोन अज़ द्राम ।

वैजसु शयामा राधे शामन ॥
शामन कूत प्रारुनॉवनस ॥०॥

दवि वॉचुस तँहन्धन थानन,
वुछुम गोविन्दुन कौदु मंजु ज्योन ।
बर मुचुरनु आयि कौदखानन ॥
शामन कूत प्रारुनॉवनस ॥०॥

बैय खूचस त्रटु तूफानन,
बुथि द्रायस वुजुमलु वावन ।
वति रँछनस पानु गूपालन ॥
शामन कूत प्रारुनॉवनस ॥०॥

मँचुरॉवनस बैयि ब्रोमरॉवनस,
म्वरली वादा तँम्यु बोज़नॉवनस ।
लोलु नादन कन थावु नॉवन ॥
शामन कूत प्रारुनॉवनस ॥०॥

मँचँगयस तस पतु पतु लारान,
छारान तु गारान दन तय राथ
पँक्यु पँक्यु हय छुम थँकुरॉवन ॥
शामन कूत प्रारुनॉवनस ॥०॥

कलि तँहन्जे गोकल वॉचस,
जसुदा ऑस तस हुब ललवान ।
'बिमय' मोहनस चीरु रठ दामन ॥
शामन कूत प्रारुनॉवनस ॥०॥

बोज़ि सखी अँमिय घन शयामन,
शामन कूत प्रारुनॉवनस ।

हरु हरु गंगे बोलुनावतम

येति छुख पानय तोत मे वातुनावतम,
हरु हरु गंगे बोलुनॉवनम ।
छोद्व्य पॉद्व्य सेज़ तय रुच वथ हावतम ॥
हरु हरु गंगे बोलुनॉवतम ॥०॥

हरी हरु रोज़तम कन दॉर्य दॉरी,
हरतम सॉरी पाप तय शाप ।
शापन म्यान्यन सूर करनॉवतम ॥
हरु हरु गंगे बोलुनावतम ॥०॥

बे होशस में होशि फिरुनावतन,
 होशदार बुलबुल जोशि वुडिहे ।
 थख द्यव कड़हॉ पानु संबुलावतम ॥
 हरु हरु गंगे बोलुनॉवतम ॥०॥

बुलबुल बिचोर त्रेशिहोत मतु थावतन,
 आरुहोत मारुमोत तडपान छुम ।
 अमस्यतु गंगुजल सुति चावनावतम ॥
 हरु हरु गंगे बोलुनॉवतम ॥०॥

हरु छुख पानय शर मेतिकडतम,
 अर्मान तु अमार कड़नावतम ।
 पार्वत जॉनिथ मेति पॉनु वरतम ॥
 हरु हरु गंगे बोलुनॉवतम ॥०॥

गूपी जॉनिथ रास खेलनावतम,
 वरतम रुकमनी दार कृष्ण अवतार ।
 क्वबजायि लति अकि कोब हजर कासतम ॥
 हरु हरु गंगे बोलुनॉवतम ॥०॥

च्यथ चेनुनोवथम कम छ्वरु छ्वरु,
 बुलबुलस म्याँनिस लॅग्य अरुसर ।

हर कृपा करतम भवसरु तारतम ॥

हर हर गंगे बोलुनॉवतम ॥०॥

अंधकारुक कुल प्योम अज़ पथरु,

फल वलु रौस्तुय ओस गोमुत खरु ।

मूल लूभ कडतन संतोष द्यावतम ॥

हर हर गंगे बोलुनॉवतम ॥०॥

शानन हुंद गोब बार लोचरावतम,

दीहि अनिगटि ग्वफि चोंग हावतम ।

ज्ञानु गंगायि मंज़ ग्वतु द्यावनावतम ॥०॥

हर हर गंगे बोलुनॉवतम ॥०॥

शिव शंकरु सुंद द्यान करनावतम,

शिवु शिवु शम्भू परुनावतम ।

‘बिमस’ मे असलुच ज्ञान करनावतम ॥

हर हर गंगे बोलुनॉवतम ॥०॥

येति छुख पानय तोत मे वातुनावतम,

हर हर गंगे बोलुनॉवनम ।

छोद्व्य पॉद्व्य सेज़ तय रुच वथ हावतम ॥

हर हर गंगे बोलुनॉवतम ॥०॥

कृष्ण लीला

मायि ग्रख लँजिमय, लोल मैय वुज़्योम,
लोलु भावय यियमना ।
अँछ लोसम प्रारान श्याम स्वंदरस ॥
ग्रायि मारान यियमना
लोलु भावय यियमना ॥०॥

शिवनाथुन सुय इष्ट भगवान,
संकट तय कष्ट सारिनुय कासान ।
म्यान्यन करनि व्वन्य निवारन ॥
करनि मोहन यियमना
लोलु भावय यियमना ॥०॥

मोहचव रॉचव यिछँ करुँस मस,
गाश युन तामथ आम मा ह्यस ।
वुज़नावन मैय तमि मचि नैन्द्रे ॥
बालु चन्द्र जल यियमना
लोलु भावय यियमना ॥०॥

पापन हुन्ध् छिम ख्युमत्य् डेर,
 श्वभु दृष्टी कस्यम त्रकुन्य सेर ।
 करिहे सखरा लागि हेनु चेर ॥
 गूवर्धन दौरी यियमना
 लोलु भावय यियमना ॥०॥

कालसर्फन फँहलोव येलि फन,
 सारि यमुनायि कँरुन ज़हर मिलुवन ।
 अथ्य् अन्दर कृष्ण वोत बिद्राबन ॥
 लूसस प्रारान व्वन्य् यियमना
 लोलु भावय यियमना ॥०॥

ब्रह्मा येम्य सुंज अस्तुती छु करान,
 शंख चँक्र बैयि पदम छुय धारुवन ।
 जुव वंदुहस तथ शामु रंगुसुय ॥
 राधे श्याम यियमना
 लोलु भावय यियमना ॥०॥

पाद लागिहेम यथ शेरे,
 ज़न्मन हुन्द तमना मे नेरिहे ।
 चशामु वथुरावस बु हेरे ॥
 टोठ नन्दुलाल यियमनालोलु भावन यियमना ॥०॥

व्यसमरु छस वनु कस शर मेमा द्राम,
 बर मुचरिहेम दपुहॉ बोल बजा आम ।
 ज़न कौदस मे तौर्य यलु गछुहन ॥
 बासिहेम बालु कृष्ण यियमना
 लोलु भावय यियमना ॥०॥

कृष्ण नाव आभूषण ज़ोनुम,
 शोकु तय चावु सुय नौल्य त्रोवुम ।
 लोगुम वीगिस नचुनाह ज़न ॥
 पान वथुरावस वतन नन्दन यियमना
 लोलु भावय यियमना ॥०॥

शामु रूपु हनि हनि छसन छारन,
 अज़ हय सुय मंज़ मनि छसन गारन ।
 यी स्वरान सपज़ुम शामुल्य तन ॥
 फेक्यन माज़ खसिहेम यियमना
 लोलु भावय यियमना ॥०॥

बूज़ुम कनव र्वनिनुय हुन्द श्रवन्य,
 ह्यस फ़्यूरुम 'बिमस' रुमन रुमन ।
 लोलु जोशि बुथज़न छुम व्वशलन ॥
 बुकु लोलु ओश आम यियमना
 लोलु भावय यियमना ॥०॥

अथे यितम बुति तरुहा

श्रु रामु यितमो कुनि वति अथे,
 रथे खसिहे म्योनुय ज़नुम ।
 दर्शुन हावतम छुहम चुय कते ॥
 अथे यितम बुति तरुहा ॥०॥

चित्र ज़ून पछि नवम दोह ज़न्म ह्योतथो,
 माता कोशल्यायि राम अवतार ।
 रावुन तु दुथ अदु मॉरिन तते ॥
 अथे यितम बुति तरुहा ॥०॥

माता कोशल्यायि रोछनख क्वछे,
 कैकीयि माजे द्युतुय वनवास ।
 सीता तु लक्ष्मण रूढ् सुत्य् सुती ॥
 अथे यितम बुति तरुहा ॥०॥

तपु रेश वति वति डंडकवनकी.
 कोरथख व्वधार बूजथक व्यनती ।
 ज़ांह मा तिमय डॅल्य् पनुने वते ॥
 अथे यितम बुति तरुहा ॥०॥

दशरथ राज़नि राज़य पोत्रो,
 दामानु येम्य रोदुय रोछतन हो ।
 सायि मेति करतम वुज़मलि त्रटे ॥
 अथे यितम बुति तरुहा ॥०॥

हा रघु क्वलके रघुनन्दनय,
 पोश हो लागय म्वख हावतम ।
 अँन्दस्युम प्रेयमु भाव वुछतु अकि लटे ॥
 अथे यितम बुति तरुहा ॥०॥

यँचकाल वोतुम प्रारान चानि सते,
 खारान मनुसरु छस पम्पोश ।
 वाहरॉविमय तिम च़ेय वति वते ॥
 अथे यितम बुति तरुहा ॥०॥

व्वन्य् मतुसॉ त्रावतम अडुवते,
 भवसरुसुय मेति तारतम अपोर ।
 तैलि यिम प्राण मे लगन बाल बछे ॥
 अथे यितम बुति तरुहा ॥०॥

च़ौक्य् च़ौक्य् बेर ज़ेवि सुतिन चुशिमय,

मीठ्यतय मोदुस्य सोम्बरॉव्यमुत्य्छिम ।
पनुनि श्रद्धायि ख्यावुहथ ब्वकि ब्वके ॥
अथे यितम बुति तरुहा ॥०॥

पनुनी वासना तांडव करान छम,
शमु दमु पानय शोमरावतम ।
नार दिवु नावतम दीहि लॅकाये ॥
अथे यितम बुति तरुहा ॥०॥

अॅछ मे लोसम यितम रामु अथे,
रथे खसिहे म्योनुय ज़नुम ।
दर्शुन हावतम छुहम चुयकते ॥
अथे यितम बुति तरुहा ॥०॥

✽

मे वनतय मॉज बु कति प्रारय

देंजुम तन लोलु अमारय,
 मे वनतय मॉज बु कति प्रारय ।
 वसान छम लोलु अँश्य चालय ।
 वनय कस कुस सन्यम मॉजय ॥
 मे वनतय मॉज बु कति प्रारय ॥०॥

रॉगिन्यायि रूपु छख तुलुमुलि गाम,
 चें निशवातान मे सपदुम शाम ।
 यिनय दिख चीर्य वातनुच पाम ।
 बु सर पादन वंदय मॉजय ॥
 मे वनतय मॉज बु कति प्रारय ॥०॥

वनय कोताह मे क्याह गुदर्योव,
 कनव बोज़तम हना मॉजय ।
 बनान येस्य् छुय सुय छु बावान ।
 शरण आयसय ख्वरन मॉजय ॥
 मे वनतय मॉज बु कति प्रारय ॥०॥

तगिहैम हय जगि आसुहा थ्यकान,
 पनुन्य बैङ्ग्य कारनामु व्यछनान ।
 येति कौन्सि नय कौन्सि हुंज कथ छे व्यचान ।
 व्यपन बानु मेय दितम मौजय ॥
 मे वनतय मौज बु कति प्रारय ॥०॥

च बोजतय अख अर्ज म्योन बस
 बु नय लौर ऐश्वरी तु द्यारन छस ।
 मिथ्या सोरुय यि जोनुम हय ।
 दियम सन्तोष धनु मौजय ॥
 मे वनतय मौज बु कति प्रारय ॥०॥

मंगान युस यि दिवान तस ती,
 दिवान छख कर्मभूगुक फल ।
 तगान नय छुम मंगुन चैय केंह ।
 मे त्यागुक वर दितम मौजय ॥
 मे वनतय मौज बु कति प्रारय ॥०॥

मे लोलन चॉन्य् जॉजनम तन,
 लगान कुनि कुन छुमनय मन ।

‘बिमस’गोछ न्यर्मल सपदुन मन ।
य्वहय वरदान दितम मॉजय ॥
मै वनतय मॉज बु कति प्रारय ॥०॥

दँज़म तन लोलु अमारय,
मै वनतय मॉज बु कति प्रारय ।
वसान छम लोलु अँश्य चालय ।
वनय कस कुस सन्यम मॉजय ॥
मै वनतय मॉज बु कति प्रारय ॥०॥

मन म्योन बनावतय चुय स्वंदर

मॉज लोल वुज़िहेम अन्दरुय अन्दर,
मन म्योन बनावतय चुय स्वंदर ।
पाद चॉन्य् रटुहॉ हृदयस अन्दर ।
गरु म्योन बनावतम अख मंदर ॥
मन म्योन बनावतय चुय स्वंदर ॥०॥

सुलिगरि वँथिथुय द्यान चोन करहा,
तनुमनु स्वरुहा चोन श्वभ नाव ।

लोलु गंगि हुंज़ु लवु पानस दिमहा ।
 श्रोचिहम काया अँन्दरु न्यबर ॥
 मन म्योन बनावतय चुय स्वंदर ॥०॥

मोहँ नैन्द्रि कुनि पौठ्यन वुज़नावतम,
 श्रु कृष्ण गूपियो बोज़नावतम ।
 पनुनिस गरस प्रक्रम करुनावतम ।
 शोलुनावतय म्योन मनु मन्दर ॥
 मन म्योन बनावतय चुय स्वंदर ॥०॥

चँक्रीश्वरस पावि पावि ह्योर खारतम,
 यि शरीर दवनु दोरन लोचरावतमे ।
 ल्वति ल्वति तमु तमु हेरि खारनावतम ।
 दमु दमु वुज़हैम मनु हर्र हर्र ॥
 मन म्योन बनावतय चुय स्वंदर ॥०॥

तपु ज़पु यि शरीर कमु कडुनावतम,
 स्मरणि पनुनि कुन लागतम मन ।
 वति वति हटारि हटारि मतु फेरुनावतम ।
 पनुनि गरि सेर गछुन बनि बेहतर ॥
 मन म्योन बनावतय चुय स्वंदर ॥०॥

आवा गमनु किन्य यँच छस थँचिमच
 थख कडहॉ बैयि मतु थँकरावतम ।
 असलस फरुँहस ब्यन हैछि नावतम ।
 छेचिरस तु श्रोचरस वनतम परख कर ॥
 मन म्योन बनावतय चुय स्वंदर ॥०॥

ऑन्करुन तु गॉज़रुन मैति मँशारावतम,
 द्वयतुभाव मनुकुय म्वकलावतम ।
 हिशर तु समुच्चार प्रज़नावतम ।
 'बिमलायि' हावतम पालुन कुन्यर ॥
 मन म्योन बनावतय चुय स्वंदर ॥०॥

शेरि लागय भगवँती

वेरि चानि अँनिमय छॉर्य छॉरी,
 शेरि च़ेय लागय भगवती ।
 मुशकुदार रंगाबु रन्य मे हय च़ारी ।
 कोठ्य लूसिम यिम सॉर्य सॉरी ॥
 शेरि च़ेय लागय भगवती ॥०॥

नेहे गटि गरि बो द्रायिसय,
 प्रक्रमस बु चॉनिस आयिसय ।
 अन्य छस मै प्रेनिरुच ज्ञान कर ।
 गटि मंज़ गाश हाव भगवती ॥
 शेरि च़ेय लागय भगवती ॥०॥

द्वदर हामि थखा मैय कोडमय,
 सेन्धिवानि तन तति नॉवमय ।
 निर्मल, निषबोध निषेकाम ।
 थावतय यि मन म्योन भगवती ॥
 शेरि च़ेय लागय भगवती ॥०॥

ज़ून पेंछ ऑठम दोह छुय चोन,
 अनिगटि भक्तय् यिवान दर्बार चोन ।
 वेंथरु वेंथरु बेंगु बेंगु लागान पोश ।
 अष्टा दशभुजा मॉज भगवती ॥
 शेरि च़ेय लागय भगवती ॥०॥

षठचेंक्रु रुप नागस मंज़ चोन वास,
 शूबान क्याह छु आस चोन खास
 नाबुद्य रंगु अमर्यतु ज़लु मॉज ।

म्वख हावतम भौज भगँवती ।
शेरि च़ेय लागय भगँवती ॥०॥

यँचकाल गोम च़ेय प्रॉस्य प्रॉरी,
डेडि चानि वातान लॉस्य लॉरी ।
क्रेंज़लि पोन्य् गोमय सॉस्य सॉरी ।
अथुरोट मे करतम इष्ट दीवी ॥
शेरि च़ेय लागय भगँवती ॥०॥

ल्वकुच़ार मॉजॉय गोम नीरिथ,
छ़ालु मॉस्य मॉस्य धूरिथ फीरिथ ।
'बिमलायि'व्वन्य गन्योव राग चोनुय ।
सेज़ सँहल वथ हाव दिम गँती ॥
शेरि च़ेय लागय भगँवती ॥०॥

वेरि चानि अँनिमय छ़ॉस्य छ़ॉरी,
शेरि च़ेय लागय भगवँती ॥

बैनिये ब्योन ब्योन छि साहूकार

येति तूल प्रथ कॉन्सि पानस छोनये,
 बैनिये ब्योन ब्योन छि साहूकार ।
 अथ कथि कोनय छु कांह सनुवुनये ॥
 बैनिये ब्योन ब्योन छि साहूकार ॥०॥

लोलस येलि आसि ग्रख लॅजमुचये,
 बावुन गछि लोलुक तपु चार ।
 ज़लुवुनि लोलुक मज़ छुय ब्योनये ॥
 बैनिये ब्योन ब्योन छि साहूकार ॥०॥

लोलस नय गछि म्वल करुनुये,
 हंगसुय मंज़ पज़ि ललुवुन यार ।
 लोलु नार बछि मंज़ पान त्रवुनुये ॥
 बैनिये ब्योन ब्योन छि साहूकार ॥०॥

आलमस फीर्य फीर्य ग्यूर यिवुनुये,
 तोति छिनु लबान दिलुकुय करार ।
 यारु दोद सीनस सूर करुनुये ॥
 बैनिये ब्योन ब्योन छि साहूकार ॥०॥

योत कुत्य् आयि तय कौत्याह गॅये,
 अथ कथि अज़ताम द्राव मा सार ।
 राज़ रूद राज़ुय अथनु कांह सौनुये ॥
 बेनिये ब्योन ब्योन छि साहूकार ॥०॥

पान पनुनुय गछि सरु करुनये,
 अँज़रावुनुये सौरुयँ न्याय ।
 ओंमची स्मरण च्युत फिरुवनिये ॥
 बेनिये ब्योन ब्योन छि साहूकार ॥०॥

असतुचि हॉन्कुलु गछन च़टनिये,
 कामु क्रूधु यँदीलन टख द्युनये ।
 ज़ानु इन्द्रियव गछि साज़ वायुनये ॥
 बेनिये ब्योन ब्योन छि साहूकार ॥०॥

बस गछि सतुकुय व्यचार करुनये,
 अन्तः करण गछन शौज़रुनिये ।
 अख ओंकार गछि त्वलि ललुवुनये ॥
 बेनिये ब्योन ब्योन छि साहूकार ॥०॥

आदि प्रभातस गछि व्यथुनये,
प्रज़लान आसान छु ज्योति स्वरूप ।
रवनिदार श्रवन्त्य'बिमस'गव कननये ॥

बेनिये ब्योन ब्योन छि साहूकार ॥०॥

येति तूल प्रथ कौन्सि पानस छोनये,
बेनिये ब्योन ब्योन छि साहूकार ।



आरस प्यठ हय तंबुलॉवनस

मनि छुम वनि कुस तस दिलदारस,
आरस प्यठ हय तंबुलॉवनस ।
आरु बँठ्य बँठ्य शिहिलिस शोहजारस ॥
आरस प्यठ हय तंबुलॉवनस ॥०॥

ग्वडुनी पानय शीरनस पुरनुस,
पतु बुय मंज़ मारकन कँडनस ।
तारुकन मंज़ कूत असुनॉवनस ॥
आरस प्यठ हय तंबुलॉवनस ॥०॥

ज़ूनि तैम्य् चूनि क्याह जरिनम दामनस,
 वातुनॉवनस अदु तारुकन मंज़,
 मारकन मंज़ किथ शुब्रॉवनस ॥
 आरस प्यठ हय तंबुलॉवनस ॥०॥

क्युमखाब अँतलास तनि लागनॉवनस,
 जामु क्याह ऑसिम ज़रकॉरी ।
 क्रैहन्यारस व्वज़जार कर नॉवनस ॥
 आरस प्यठ हय तंबुलॉवनस ॥०॥

आयि आयि साज़ सिंगार करुनॉवनस,
 व्यसुरॉवनस सुत्य ब्रोमरॉवनस ।
 दोहली शॉल्य् तारख वुछिनॉवनस ॥
 आरस प्यठ हय तंबुलॉवनस ॥०॥

राज़ु गव चंगु नयि साज़स मस,
 सासु बज़ तारु वज़नवेमस ।
 श्वरं श्वरु ग्रज़ वेंछु प्रेयम आबशारस ॥
 आरस प्यठ हय तंबुलॉवनस ॥०॥

त्यूताह लोल पानय बरुनॉवनस,
थलि थलि पोत चालिहय वुछमस ।
गछि कुठिसुय गछ हय करनॉवनस ॥
आरस प्यठ हय तंबुलॉवनस ॥०॥

आरबॅल्य् द्रायस मायि हय वॅज़िनस,
अॅन्द् अॅन्द् फिरविथ रंदि कॅडनस ।
वेथि हुंज़ि गुथि ग्वतु द्यावनॉवनस ॥
आरस प्यठ हय तंबुलॉवनस ॥०॥

लोलुकिस बागस सॉल करुनॉवनस,
मुशिक अदफर सुत्य् मुशकॉवनसे ।

पोशि ग्वन्दुर हिर्श बिर्मु शेरुनॉवनस ॥
आरस प्यठ हय तंबुलॉवनस ॥०॥
मनि छुम वनि कुस तस दिलदारस,
आरस प्यठ हय तंबुलॉवनस ॥०॥

✱

लालस छारान

हय वेस्य लालस छारान तु गारान,
 प्रकरम हय जेठ्योम, प्रकरम हय जेठ्योम ।
 लालु ओस छारुन पनुनिस धामस ।
 अँन्ध् अँन्ध् नचुनुय प्योम ॥
 प्रकरम हय जेठ्योम, प्रकरम हय जेठ्योम ॥०॥

ब्रोंठु कनि बिह्थि टॉठिस लालस,
 थलि थलि वुछोम तस थलि थलि वुछोम
 बाँज्यगार वख ओस थख दिथ द्रामुत ।
 कायायि लुरुपार हय बास्योम ॥
 प्रकरम हय जेठ्योम, प्रकरम हय जेठ्योम ॥०॥

च्यथ मे दिचमय पनुनिस मनुसुय,
 पँतिमुय च्यतस पाव्योम, पँतिमुय च्यतस पाव्योम
 ल्वकुचार ओसुम अथव माँज द्रामुत ।
 व्यन्य सुय मचर याद प्योम ॥
 प्रकरम हय जेठ्योम, प्रकरम हय जेठ्योम ॥०॥

दून्य् दिच्च दुननाह दुन्य् राँवनस तय,
 सुथ रस तोसु वँस्य् प्योम सुथरस तोस वँस्य् प्योम,
 तँतिथुय त्यम्बुर पैयि कपसे डारस ।
 गासु गेजि नार वुह्योम ॥
 प्रकरम हय ज़ेठ्योम, प्रकरम हय ज़ेठ्योम ॥०॥

व्वदरुचि वासनायि बूभस दम गोम,
 शमदम वँसिथुय प्योम, शम दम वँसिथुय प्योम ,
 लालन हॉवनम दयि गथ पानय ।
 बखतावार बास्योम ॥
 प्रकरम हय ज़ेठ्योम, प्रकरम हय ज़ेठ्योम ॥०॥

यनय सूहम शब्द व्वन्दि ललनोवमय,
 अनहद नाद बोज़योम, अनहद नाद बोज़योम,
 होशि पम्पोश जोशि फ्वलुवुन बास्योम ।
 अमि नादु मन व्वलुस्योम ॥
 प्रकरम हय ज़ेठ्योम, प्रकरम हय ज़ेठ्योम ॥०॥

सन मे दिच्चनम अँय् टॉठ्य् लालन,
 सँन्य्चूर लाल दिथ गोम सँन्य्चूर लालु दिथ गोम,
 लोलुक व्यवहार किथ वरतावान ।

‘बिमलायि’ वनिथय गोम

प्रकरम हय ज़ेठ्योम, प्रकरम हय ज़ेठ्योम ॥०॥

हय वेस्य लालस छारान तु गारान ।

प्रकरम हय ज़ेठ्योम, प्रकरम हय ज़ेठ्योम ॥०॥

चै क्याह लालन हुंज़ खबर

पान बिहिथ छुख कोहन तु बालन,

चै क्याह खबर छय हालन हुंज़ ।

कौत्यहन गोमुत येति ज़ेरु ज़बर ॥

चै क्याह खबर छय हालन हुंज़ ॥०॥

पोशि कुजि फोलुम पोशि चमन,

छावनुक तुस स्यठाह बोश ।

वक्तन त्रॉवनस तेज़ तबर ॥

चै क्याह खबर छय हालन हुंज़ ॥०॥

सोंतु फवजेयम पोशि थँराह,

रौछदर तस कँन्ड्य रूद्य ।

हरदन सॉल कौरुम वावुहालन ॥

चै क्याह खबर छय हालन हुंज़ ॥०॥

ज़ून द्रायि शोलुवन्य ग्रायि मारान,
 तारुकन सुतिन लॅज गिन्दने ।
 नाल वोलनस कालु ओबरन ॥
 चै क्याह खबर छय हालन हुंज़ ॥०॥

सुय टोठ यावनराय द्रामो,
 मॉस्य मॉद यावुन सुतिय ह्यथ ।
 अडु छोव बोरमस लोलु मेय थालन ॥
 चै क्याह खबर छय हालन हुंज़ ॥०॥

ज़ामुत्य् ऑसिम चोर गबर,
 मार्कन मंज़ ऑस्य शोलुमारान ।
 तारुकव मा हैच ज़ूनि खबर ॥
 चै क्याह खबर छय हालन हुंज़ ॥०॥

तोतो गछतो म्याने माये,
 बाल कृष्णस यिय वनतम ।
 'बिमलायि' हैज़िहे चु खबर ॥
 चै क्याह खबर छय हालन हुंज़ ॥०॥

पानु बिहिथ छुख कोहन तु बालन,
चै क्याह खबर छय हालन हुंज ॥०॥

यॅम्बुरज़लि फोल्य् बेयि पोश (आज़ाद नज़्म)

तलय वुछतु वेसिये कोत गव जिगर गोश,
मे बासान यॅम्बुरज़लि फोल्य् बेयि पोश ,
कुल्य कॅट्य् होशि यिन थर्यन अज़ फवलन पोश,
मे बासान येम्बुरज़लि फोल्य् बेयि पोश ॥०॥

ज़ानि दय कर तु कोत गव सु जिगर गोश,
वन्य्स कुस बुलबुलन चलुन छा रवा,
सु हय म्यानि लोलु बागुक टोठ बुलबुल,
करान लोलु बूल्य् तय बेयि बोल बोश,
बेहोश कॅरनस हफ हिश पैमुच छस,
तलय वनतु वेसिये कोत गव जिगर गोश ।
वन्यस कुस बुबुलन चलनुय रवा छा ॥०॥

यि कति सना आयि तेज़ वावु ग्राया,
डुविथ नियन गुल सॉन्य् कोरनख सफाया तु मूल प्राटुनॉविनस,

छि ग्रख अज़ माजन लोलस च्वापॉरी,
 परेशान सॉरी, लाचॉर्य बिचॉरी,
 रँछिथ आश छय तिमु ज़ि यिन गुल सॉरी फीरिथ यपॉरी,
 तवय अँछ तिमन दुर छि लँज़िमुच सारिन्य,
 छि प्रारान बेनि छय गिंदन बॉय बारुन्य,
 रन्यन् चेशमु लोसेयि बॉचन दिवान वँन्य,
 सबुर ह्यथ छि सारेय प्रारान बाहोश,
 तलय वनतु वेंसिये कोत गव जिगर गोश ।
 वन्यस कुस बुबुलन चलनुय रवा छा ॥०॥

छुहय नार लोगमुत यथ पोशि वारे,
 छि येमि वारि हुंछ गुल आमुत्य् ज़दस मंज़,
 छु सोसुन फ्यूरमुत अज़ पोशि मरगन,
 छु ज़न हरुद लोगमुत सोंतकॉल्य गोशन,
 यपॉर्य त्राहि त्राहे हुपॉर्य हा खुदाया,
 यि कँम्य् सुंज़ अँछ लँज यि कँम्य् सुंद व्वहव फोर,
 यि स्र्वगापुरी सॉन्य् गँयि वुछ वुजारय,
 छु ठप कार बारय, सपुछ लाचारय,
 लगुहन नु यिम चँल्य् तिम गँयि रोपोश,
 तलय वनतु वेंसिये कोत गव जिगर गोश ।
 वन्यस कुस बुबुलन चलनुय रवा छा ॥०॥
 छि अज़ होशि डॅलिमुत्य् सानि बागुकी गुल,

छि थपु थारि चॅल्मुत्य वन हारि बुलबुल,
 तलय लोलु आलव दिहखना च्वपॉरी,
 मोटुख बोल बोशिय गॅयख बोलि मॅशथुय,
 खबर लॅग्य् तिम कमन छालनु तु बालन,
 कमन सैकिल्यन् सॅहरावन लॅगी तिम,
 प्यवान आसनखना च्यतस शालमॉर गोश,
 तलय वनतु वैसिये कोत गव जिगर गोश ।
 वन्यस कुस बुबुलन च़लुनुय रवा छा ॥०॥

हतय सालु अनुहोख तिम खानुमॉली,
 फेक्यन माज़ खसि ख्वश गछन माजिमॉली,
 ग्वडन्य् जोयि बारन तु आरन आब होखमुत
 मगर रतु दॅरियावव ग्रज़ुन व्वन्य् छु ह्योतमुत,
 दिवान व्यथ छे नालय नागन वुज़िन्य् बीठ,
 तछुन अज़ छु वोथमत बिमन वछ छु च़ोटमुत,
 च्यतस छिस पैमुत्य् गुलाब तय गुलालय,
 तवय रूदमुत मा छुस हाल तय होश,
 तलय वनतु वैसिये कोत गव जिगर गोश ।
 वन्यस कुस बुबुलन च़लुनुय रवा छा ॥०॥

मे तनु दिलकुय करार रोवुम

सु फंद कॅरिथ हय यार चोलुमय,
 मे खन्दु कॅरिनम जिगरस वैसिये,
 मे तनु दिलकुय करार रोवुम ।
 सु यनु दूस्चोम दिलदार वैसिये ॥
 सु फंद कॅरिथ हय यार चोलुमय ।
 मे चाख कॅरिनम जिगरस वैसिये ॥०॥

लोलु बागुच ऑसुस यॅम्बरज़ल,
 लॅजिमुच ऑसुम बर्जस्तु फुलय
 तॅम्य् वोय चूरि चूरि मूलन द्रोत ।
 वुछतम छाल निथ यार कोत गोम
 सु फंद कॅरिथ हय यार चोलुमय ।
 मे चाख कॅरिनम जिगरस वैसिये ॥०॥

बु अँशकु तॅम्य् सुन्दि बॅनिथ अँशकुपेचान,
 वलुनय बु आयस लोलु रज़ि पानय,
 खबर रशकु म्याने स्वनि कमि ब्रोमरुम ।
 तंबुलॉविथ न्यूनम कोत सुय गोम ॥
 सु फंद कॅरिथ हय यार चोलुमय ।
 मे चाख कॅरिनम जिगरस वैसिये ॥०॥

सु यनु चोलुम हय रसु रसय,
 तनु मा छस बुय पनुने ह्यसय,
 अमि स्वनि सनु हय कोरनम जिगरस ।
 तलय सु छारुन करार वेसिये ॥
 सु फंद कॅरिथ हय यार चोलुमय ।
 मे चाख कॅरिनम जिगरस वेसिये ॥०॥

सु दिलबर कोत गव यि गरु त्रॉविथ,
 पॉरॉवुन साज़ म्योने कस सनु स्वने,
 मे र्वनि दामनस चाख दित्यमय ।
 बरबुकु येलि आव मे लोल वेसिये ॥
 सु फंद कॅरिथ हय यार चोलुमय ।
 मे चाख कॅरिनम जिगरस वेसिये ॥०॥

मे येलि ऑसिम हय नूर फोतिये,
 तॅम्य् यॉर्य तुल्य् क्याह नाज़ मेतिये,
 'बिमलायि'अज़ साज़स सोज़ डोलुम ।
 गुलालु फोलमुत अमा सु कोत गोम ॥
 सु फंद कॅरिथ हय यार चोलुमय ।
 मे चाख कॅरिनम जिगरस वेसिये ॥०॥

✱

मे हय अँशकु चूरन दिल चूरि न्यूनम

मे हय अँशकु चूरन दिल चूरि न्यूनम,

यार चँलिथ गोम ।

पुचुपार कौरनम, वुजारु कँरनस ॥

हाय चँलिथ गोम ॥०॥

मेहय अँशकु तसुन्दे अँशकु पेचान गोम,

खसलथ दौरुम रज़ि हय पान खार्योम ,

हुब तस अलनु तु वलनय आयस ,

नालुमति सुय मे रचोम ।

पुचुपार कौरनम, वुजारु कँरनस ॥

हाय चँलिथ गोम ॥०॥

छायि गित्य् छुम करान मॉर्य मॉंद म्योनय,

सु म्योन टोठ यावन राय,

अती व्वतलान छुम अँती व्वडान सुय ,

छस पशान यि क्याह गोम ।

पुचुपार कौरनम, वुजारु कँरनस ॥

हाय चँलिथ गोम ॥०॥

रूनिदार स्वनसुंज़ बंगरि मे लाजेम,
चूनिदार पा ज़ेब जान,
श्र्वनि श्र्वनि तंबलाव्योम व्यसराव्योम ।

सु हय ग्राय कॅरिथ गोम ।

पुचुपार कोरनम, वुजारु कॅरनस ॥

हाय चॅलिथ गोम ॥०॥

आमुत बरबुक लोल तसुन्दुय,
चशमु छम दुरलॅजिमच,
छम चूनि जरिमच जूनि डबितय ,
यनु तसुन्द युन बास्योम ।
पुचुपार कोरनम, वुजारु कॅरनस ॥
हाय चॅलिथ गोम ॥०॥

क्याह वनय यारो छुम ना मशान,
चोनुय श्रेह तय माय ,
वला पोत फेरतम मिनथा थवतम ,
वुनि छु दूरुचर अबलवोन ।
पुचुपार कोरनम, वुजारु कॅरनस ॥
हाय चॅलिथ गोम ॥०॥

छुख क्याज़ि सना दिवान कन डोलुय,
 लोलुय सख हा आम,
 छिम कुत्य् लॅग्य् मुत्य् छ्वख यथ जिगरस ,
 तिमय हावनुक शोक गोम ।
 पुचुपार कोरनम,वुजारु कॅरनस ॥
 हाय चॅलिथ गोम ॥० ॥

अॅम्य् लोलु नारन सूर मे कोरनम,
 वह्य् नूर हॅरिथ प्योम,
 छस नूरबॅरुचुय हूर आरुक्कुचुय,
 क्रेशिनॉविथ हय दूर्योम ।
 पुचुपार कोरनम,वुजारु कॅरनस ॥
 हाय चॅलिथ गोम ॥० ॥

बोरमुत 'बिमलायि' लोलु मस मलुर्यन,
 शोक चावुनावुहन दिलदार,
 थोवनम नु मन्ज़ूर द्युतनम नु दीदार,
 अर्मान ललुवुन प्योम ।
 पुचुपार कोरनम,वुजारु कॅरनस ॥
 हाय चॅलिथ गोम ॥० ॥

नियि तस पयाम कुस म्योन

लोल आमय यारि जानान सुंद,
नियि तस पयाम कुस म्योन,
होल गोमय लोल जिगरस ।
बोजि हाल कुस सना म्योन ॥
नियि तस पयाम कुस म्योन ॥० ॥

कोरमुत ओस असि वादाह,
रोज़व तु अख अँकिस दूर,
नखु आव नु निशि सुनय रूद ।
ख्वनि ललुवहन बु नुन्दुबोन ॥
नियि तस पयाम कुस म्योन ॥० ॥

वुछि कुस छु सु कथ शहारस,
कॅम्य् चोव तति मोदुर मस,
दॅप्यतोस छि बरनु आमृत्य् ।
कम जाम चैयि हे रंबुवोन ॥
नियि तस पयाम कुस म्योन ॥० ॥

कॉचाह वॅजिस बु हनि हनि,
 अँम्य् यॉर्य सुन्द्य् अमॉरी,
 दॅप्युतोस क्याज़ि दिथ गोम ।
 यिम नारु तॅत्य् मै ललवोन ॥
 नियि तस पयाम कुस म्योन ॥०॥

यॅचकाल गव मै प्रारान,
 छारान बु शालु मारन,
 छिम ना मै छावु आमृत्य ।
 लोलु बानु यियि करसु असुवोन ॥
 नियि तस पयाम कुस म्योन ॥०॥

पॉरोव मै पान पनुनुय,
 शूरुम यि राजु रंग क्याह,
 यियि हे तु छाविहे सुय ।
 हुसनुक शबाब फ्वलुवोन ॥
 नियि तस पयाम कुस म्योन ॥०॥

छुन पय यि त्योल कॅमिस प्यव,
 कमि स्वनि वोटुनस फोल,
 पर मस मोदुर तॅमिस लोग ।

बरु गव मे बाग मुशकुवोन ॥
नियि तस पयाम कुस म्योन ॥० ॥

ललुवुन 'बिमस'यि अर्मान,
थोवनस तँम्य् यारि जानानन,
यियिहे व्वन्य् पँतिमि प्यारे ।
अन्दिहे मे न्याय अज़लोन ॥

नियि तस पयाम कुस म्योन ॥० ॥

लोल आमय यारि जानानु सुंद,
नियि तस पयाम कुस म्योन,
होल गोमय लोलु जिगरस ।
बोजि हाल कुस सना म्योन ॥
नियि तस पयाम कुस म्योन ॥० ॥

तँम्य् मदनवारन चॉवनस मय

दिथ मिज़राब अज़ लोलचन तारन,
तँम्य् मदनवारन चॉवनस मय,
मस बु चॉवनस खास्यव तु प्यालव ,
ह्यस व्यसरेयम रूदिम नु होश ।
दिथ मिज़राब अज़ लोलुचन तारन ॥
तँम्य् मदनवारन चॉवनस मय ॥० ॥

फ्वजि येलि संगरमालु गाह प्यव बालन,
 पोशनूल बोलुनि लॅग्य् लोलु बूल्य्,
 लोलु पॉगाम बूज़ सुलि गरि यारन ।
 दिलुचन तारन व्वतल्योख सोज़ ॥
 दिथ मिज़राब अज़ लोलु चन तारन ॥
 तॅम्य् मदनवारन चॉवनस मय ॥०॥

नेत्रय डीड्यवॉन्य् सुलि गरि सॉविम,
 दारि बर मनुसुय यल मे त्रॉविम,
 सोपनु मंज़ क्याह रंग तॅम्य मे हॉविम ।
 अवय छस खाबन पतु लारन ॥
 दिथ मिज़राब अज़ लोलु चन तारन ॥
 तॅम्य् मदनवारन चॉवनस मय ॥०॥

पानस निशि प्योम मस पॉन्य् पानय,
 वेसिये ज़ोनुम सु छु मस्तानय,
 दम दिथ खोरुम खास दुर्दानय ।
 तनु छसनु कुनि ति व्यचन ॥
 दिथ मिज़राब अज़ लोलु चन तारन ॥
 तॅम्य् मदनवारन चॉवनस मय ॥०॥

मँचुय ऑसुस गॅमुच प्रॉर्य प्रॉरी,
 कॅडिनमं अज़ सॉर्य मलालय,
 संसारुक्य् ब्रम दूर कॅरिनम सॉरी ।
 करुनावनस लोलु दमॉली ॥
 दिथ मिज़राब अज़ लोलु चन तारन ॥
 तॅम्य् मदनवारन चॉवनस मय ॥०॥

तंबुलॉविथ पतु थामि हय कॅरनस,
 छितु बो कॅरनस व्यसुनुय मंज़,
 ब्रोंह कुन वॉत्ति अँहर थँहर कॅरनम ।
 तनु बिमु होशि छेनु यिवान ॥
 दिथ मिज़राब अज़ लोलु चन तारन ॥
 तॅम्य् मदनवारन चॉवनस मय ॥०॥

दिथ मिज़राब अज़ लोलचन तारन,
 तॅम्य् मदनवारन चॉवनस मय
 मस बु चॉनस प्यालव तु प्यालव ,
 ह्यस व्यसरेयम रूदिम नु होश ।
 दिथ मिज़राब अज़ लोलु चन तारन ॥
 तॅम्य् मदनवारन चॉवनस मय ॥०॥

✱

सोज़ दिलकुय बोज़ वेसिये

सोज़ दिलकुय बोज़ वेसिये,
 तथ शहारस चुय नितय,
 येतिहय फौल्युमत्य् पोश रंगु रंगय ।
 मालि आसनय कुनि वुस्युमतिये ॥
 येतिहय फौल्युमत्य् पोश रंगु रंगय ।
 मालि आसनय कुनि वुस्युमतिये ॥

सोन सुय बुलबुल बेयि पोशिनूल,
 लोलु बूल्याह ऑस्य् करान,
 सुलि वॅथित स्व टॉठ कुकिल ।
 लोलु नादाह ऑसुस दिवानय ॥
 येतिहय फौल्युमत्य् पोश रंगु रंगय ।
 मालि आसनय कुनि वुस्युमतिये ॥

अज़ हय तिम स्वंदर जानावार,
 मॅशरॉविथ ज़न छिय बोल बोश,
 ज़न तिम वारिल्य्व ऑस्य् रटिमत्य् ।
 ऑस्य् व्वन्य् मोतुक सोम्बरान सामानय ॥
 येतिहय फौल्युमत्य् पोश रंगु रंगय ।
 मालि आसनय कुनि वुस्युमतिये ॥

रॉछदर यिम ऑस्य कोह तेंताल्यन,
 आरन आबुशारन हुंछु आगर,
 युस तनु मनु ओस रॉछ करान अथ ।
 तस गुलि लालस छु रंग डोलमुतय ॥
 येतिहय फोल्यामत्य् पोश रंगु रंगय ।
 मालि आसनय कुनि वुर्यमुतिये ॥

क्याज़ि अँम्य् वॉन्सि हुन्दी हमसायन,
 व्वतलोव वुहनोव दुयि हुंद नार,
 अछिनय पचि फ्युर क्यथु गव यिमनुय ।
 यिनु ज़ांह सरुहव तिय कोर यिमुवय ॥
 येतिहय फोल्यामत्य् पोश रंगु रंगय ।
 मालि आसनय कुनि वुर्यमुतिये ॥

आरुनय प्यठ आरुक्वंडलाह त्रावान,
 आरु कँर्य कँर्य आसु आर्वलु नचान,
 ओर ऑस ज़ून योरु शमु ऑस ग्यवान ।
 हेरु ओस मुशताक लोलु ग्रज़ तुलान ॥
 येतिहय फोल्यामत्य् पोश रंगु रंगय ।
 मालि आसनय कुनि वुर्यमुतिये ॥

कॅम्य सना यि कौछ अति नार व्वपदिन,
रंगु मंदोर्यन हून्य अति वूगिन,
सुह अति शाल बॅनिन त्युथ सपदिन ।
पज़र बिचोर अडुकोल येति सपदिनय ॥
येतिहय फोल्त्युमत्य् पोश रंगु रंगय ।
मालि आसनय कुनि वुर्यमुतिये ॥

हायि तय ज़ायि गॅछिन माय कैम्य योछ,
कॅम्य योछ लूकन गॅछिन निफाख,
अख अँकिस कित्य् शाहमार बॅनिन यिम ।
अथ शहारस म्यॉन्य् यि आवाज़ नितय ॥
येतिहय फोल्त्युमत्य् पोश रंगु रंगय ।
मालि आसनय कुनि वुर्यमुतिये ॥

वादु ओस येति प्रान्यव यिय कोरमुत,
यकसानुक यिकुवट लसनु बसनुक,
तस रफीकस तस शफीकस ।
तस निसारस कवु नियत डॅजी ॥
येतिहय फोल्त्युमत्य् पोश रंगु रंगय ।
मालि आसनय कुनि वुर्यमुतिये ॥

कर सना बेयि व्वथि ग्रज़ पांचादरन,
जानावार करन बोलबोश,
कर बनि मायि मिलचारुक व्यवहार ।
द्यवु बिमस'नेरि यँचकोल अर्मानय ॥
येतिहय फोल्यामृत्य् पोश रंगु रंगय ।
मालि आसनय कुनि वुस्यमुतिये ॥

✱

वावेला (नज़्म)

वन क्याह तनु प्यठु सन लोगमुत छुम,
यनु प्यठु वति प्यठु पेमुच छस,
हर्दन्य् वावन क्युथ ज़ज़ुर चोननम,
दुननि सुत्य् थँव्यनम नु पनु तुल्य् ताम,
हर्दु छटि सॉर्यसुय दिचनम दुनन,
लंग लंजि वँस्य् वँस्य् पेमचु छम,
परदेसन मंज़ परछेन्य् गॉमुच,
पखु मेय पेमच हुति येति छम,
छांडँख कति कति लबख बु कति व्वन्य्,
वुड हा वुफु हा पखु हय फुचम,
वनु क्याह तनु प्यठु सन लोगमुत छुम ।
यनु प्यठु वति प्यठु पेमुच छस ॥०॥

अंगहीन गॉमुच लंग लंजि रोसतुय,
 नंग छस गॉमुच, वति प्यठ पेमुच
 न्यथुनोन पान ह्यथ सख मंदछेमुच,
 वठ छुम गोमुत वस छम शिठेमुच,
 सीरु बोज वुछिहन सीर तस बावुहा,
 बोस लोचरावुहा छस त्रॅहरेमुच,
 लोलस ग्रख छम सथ छम नु सोरान,
 फोरान छुमनु कैह बो छस कलेमुच,
 ज़ून रॉचन मंज़ पूस्य तैलि त्रावान,
 ज़ंगु छम नटेमचु छस लंगेमुच,
 वन क्याह तनु प्यठु सन लोगमुत छुम ।
 यनु प्यठु वति प्यठु पेमुच छस ॥०॥

पथकालि ऑस्य् मे वनान स्वखमाल,
 शूबान हटि ऑसुम मे सोन्य् माल,
 अख अँकिस रॉछ ऑस्य् पानु वॉन्य रोज़ान,
 अथु लागिहे कांह ओसु मजाल,
 अँछ अज़ बदलेयि पनुनि आंगनु मंज़,
 थफ दिथ स्वखुमालि ह्यथ गॅयि माल,
 म्वख्तुमालि पन छ्योन म्वखतु आव छँकरुनु,
 थपलन जेफ्न्य दिच थरु थरु चायम सपदेयस बेहाल,

अँछन गँयम अनिगटु येलि डँचूठुम,
 ज़न बास्योम आम पानु महाकाल,
 वनु क्याह तनु प्यठु सनु लोगमुत छुमु ।
 यनु प्यठु वति प्यठु पेमुच छस ॥०॥

दौहँ अकि म्वख्त फोला अख अथि आम,
 हाशि ओस गोमुत शकलि होल कोल,
 दौपमस वलु बेह हालि दिल बावय,
 लागान क्याज़ि ललुवुन बु चयतस पावय,
 वनखना यथ क्याज़ि गव गटुज़ोल,
 दौपनम क्वसु छख छुसथ नु ज़ानान,
 छाल दिचुन तु कोत तामथ च़ोल,
 'बिमला'वावेला करान रूज़,
 पॉर्यज़ान राँव क्याज़ि इन्सान डोल,
 वन क्याह तनु प्यठु सन लोगमुत छुमु ।
 यनु प्यठु वति प्यठु पेमुच छस ॥०॥

हॉरी यितम तु दारि बेहतम

हॉरी यितम दारि बेहतम दमाह,
 कारि हय लोगमुत छुम थमाह,
 दोद गुलसुंद छुम वॉलिंजि सन्योमुत ।
 सुय बावनुक छुम तमाह ॥
 हॉरी यितु दारि बेहतम दमाह ॥
 कारि हय लोगमुत छुम थमाह ॥० ॥

क्फरेमुत्य् छिम यिम अँछटॉरी,
 ओश कोताह छुम जमाह,
 छस दपान खुलडुलु छट्टहा बाखा ।
 खबर सु कृष्ण बोजिमा ॥
 हॉरी यितु दारि बेहतम दमाह ॥
 कारि हय लोगमुत छुम थमाह ॥० ॥

वारि बागुक पोश मे फ्वजोम ,
 आदुनुचि कोरि हुन्दिस दामनस,
 अर्मान थोवनम बोल बोशुक ।
 छाल ज़ाह सु मार्ख्यम ना ॥
 हॉरी यितु दारि बेहतम दमाह ॥
 कारि हय लोगमुत छुम थमाह ॥० ॥

चुहय छख वुडान कोहव वनव पैठ्य,
 मगर मे मा छु वुफनुय तगान,
 म्यानि बदलय करनस ज़ारुपाराह ।
 बालु कृष्णय अनतम ॥
 हॉरी यितु दारि बेहतम दमाह ॥
 कारि हय लोगमुत छुम थमाह ॥० ॥

बु प्यालु बरुहस अमि प्रेयम मसुकी,
 खास्यन बु बरुहस वॉलिंजि हुंज वस,
 वुज़नाविहम सुय लालस गुलालस ।
 ह्यसुक तु गोशुक छु यस नु बाश ॥
 हॉरी यितु दारि बेहतम दमाह ॥
 कारि हय लोगमुत छुम थमाह ॥० ॥

अज़ गव मे कनन हारि चुर्य ग्युशुय,
 बुलबुलन हुंद बोलबोश,
 बिमस आशवासन द्युतनय कृष्णन ।
 आशवासन करुस मोदुर बोलबोश ॥
 हॉरी यितु दारि बेहतम दमाह ॥
 कारि हय लोगमुत छुम थमाह ॥० ॥

कृष्ण अज़ ज़ून डबि प्यठ आमय,
अमि कुय तु ओसुम तमाह,
शोंगमुत लालु तँम्य वुज़नोवनम ।
द्वखन कोरुन जम जमाह ॥
हॉरी यितु दारि बेहतम दमाह ॥
कारि हय लोगमुत छुम थमाह ॥०॥

✱

दूरि बुलबुल आव (नज़्म)

दूरि बुलबुल आव ब्यूठ म्यानि पैंजे,
बु द्रायस अथुनय क्यथ बानु ह्यथ,
दोपुम ख्यावन कैह ब्वछिहोत आस्यम,
बुथि सुय ड्यूंठुम गमगीन यिथय ह्युव,
अँछिवुय ओश ओसुस वसान दारे,
वुछान ओस बागुचि यँम्बुरज़लि,
पँत्य् ब्रूँद्य थलि थलि,
अँछिन मंज़ अँश्य् बुकु
दिलस अन्दर दग,
यँम्बुर ज़ले त्वलि ललुवान ऑस,
होल कोल पोशाह,

ओसुस बु चूरि पॉठ्य फॉंफलनु आमृत,
 गोमुत सुय ज़न हाशि ओस,
 मगर तोति यम्बुरलल ललुवान ऑसुस,
 ऑसुय ल्वलि ललुवान,
 दग दिलची
 मै रूद दानु बानु अथसुयु क्यथ

०

ओसनु बुलबुलस मॉलाह कुनिकुय,
 तुजिन दव पोत खोरि
 वुफि द्राव कोहन तु बालन कुन
 नालु दिवान ओस च्वापॉरी
 बु सुय छांडन छम्बन तु छारन
 खूच मा वति हुंघ्न वॅहशी वन पशिनय
 सुहन तु शालन वायि मा बोरुन
 रॅट्थि ओनुन कमि ताम कशालय
 दौपनस चॅय रक्षपालय छुख
 चुय दया सागर चुय कृपालय
 चुय वुनिति मारान छालय छुख
 द्वख द्युतुथ कवु म्यानि यॅम्बुरज़लि लालय
 तस वसान राथघन छय अँश्य च़ालय
 हालय अमि कडुन हाव तु कमालय
 त्राविय नॉल्य् खॉल्य् मालय स्वय

अदु व्वथि ग्रज़ प्रथ अंदु च़वापॉरी
 सॉरी वननय छुख त्रज़गथ पालय
 नज़र कॅरुस कृष्णन, द्रास मलालय
 दोपन छुख आमुत मूर्खु मौंड ज़न्मस
 बूगुन छुस यिय बूगुनि छि आमुच़
 यॅम्बुरज़लि लीखिथ ओस यिय कपालय
 वादु म्योन यिय छुय बोज़ चुय बुलबुलो
 कर यॅम्बुरज़लि यिय जल जल गोशान
 दवि दवि गछ़तो गोशान मंज़
 ग्राव बुय थवुमा पय छुम हालय
 ख्वश बु करन स्वय कडस मलालय
 सोज़नस तूरुय असुवुन गुलि लालय
 गिंदुवुन गुलालय जल सोज़नस
 'बिमस' माजि यमॅबुरज़लि शर नेरि
 मारि अदु पानय लोलु तालय
 सोंतस अनि स्वय पतु सालय.

✱

मे चलि हे मलालय

वला यितुमो सालय चुय हा यूस्च कालु कालय
 मे चलिहे मलालय, मे चलि हे मलालय,
 चु हा यूस्च सालु यितमो,
 बालि दर्शुन मे दितमो,
 शोकु बैस्च मे मस प्यालय,
 तला यितु सोन सालय ।
 त्रॉविथ दुय मलालय ॥
 मे चलिहे मलालय, मे चलिहे मलालय ॥०॥

यिहा सोंतुवाव आमो,
 पोशन फुलय लॅजमो,
 चावु टेकुबटन्यु संबालय,
 यियम ना लालु सालय,
 त्रॉविथ दुय मलालय ॥
 मे चलिहे मलालय, मे चलिहे मलालय ॥०॥

बु हा पोशिनूल सोज़यो,
 गोसु त्रावतु बोम्बूरो

वारु बूज्यज़ि पोंगामय,
सखर कॅर्यज़ि कुनि हालय,
त्रोंविथ दुय मलालय ॥
मे च़लिहे मलालय, मे च़लिहे मलालय ॥०॥

हच़र ज़द बु बर्नॉवथसो,
मच़र आम ल्वच़र द्युतथो,
तच़र लोलुक कॅह् च़ालय,
बावु हय बु अहवालय,
त्रोंविथ दुय मलालय ॥
मे च़लिहे मलालय, मे च़लिहे मलालय ॥०॥

बरबुकु छु लोलु प्यालो,
क़ेशान छसय यॅच़कालो,
नज़रि चानि छस बे हालय,
जोशि फ़वलिहे शबाबय,
त्रोंविथ दुय मलालय ॥
मे च़लिहे मलालय, मे च़लिहे मलालय ॥०॥

फ़ोलिथ आयि संगरमालो,
कौहव दिच़ लोलु नालो,
यिनु चानि चुलन ग्रावय,

छस जुवान कशालय,
त्राँविथ दुय मलालय ॥
मे चलिहे मलालय, मे चलिहे मलालय ॥०॥

नेन्दुर मोत्राव लालो,
मयखानकि कलु वालो,
रूबेरू चे मस प्यालय,

बोज़तम मे लोलु तालय,
त्राँविथ दुय मलालय ॥
मे चलिहे मलालय, मे चलिहे मलालय ॥०॥

यितमो छमहा कलो,
थलि थलि चुछि ह्य बो,
बोजु कोस्तूरुय तालय,
'बिमस' निश छयनु गालय,
त्राँविथ दुय मलालय ॥
मे चलिहे मलालय, मे चलिहे मलालय ॥०॥

वला यितुमो सालय चुय हा यूरुय काल कालय
मे चलिहे मलालय, मे चलि हे मलालय, ॥

नेन्द्रि सॉविख

थोद व्वथु साहिबो योत कोत लॉगिथ,
 येति दुर्दानु हो नेन्द्रि सॉविख ।
 अँन्यूसारि दांदु बॉर्य बोर सारु नाविख ॥
 येति दुर्दानु हो नेन्द्रि सॉविख ॥० ॥

अनि गटि चीर्य सुलि गरि ऑस्य् नेरान,
 दोह द्यन बॅरिथुय वापस फेरान ।
 कारुबारस येति कुलुफ करुनॉविख ॥
 येति दुर्दानु हो नेन्द्रि सॉविख ॥० ॥

ग्रटबलु यारुबल सॉर करनॉविख,
 छलु छलु आबु ग्रट फिरनॉविख ।
 कॉशिरिस तोमलस ओट पेहॅनॉविख ॥
 येति दुर्दानु हो नेन्द्रि सॉविख ॥० ॥

रंगु बॅंगलन तति हून्य् वुंगनॉविख,
 वुम्बरि हुंज सॉन्तुनथ त्रावुनाविख ।
 जंदु खुमनुयमंज गरु करुनॉविख ॥
 येति दुर्दानु हो नेन्द्रि सॉविख ॥० ॥

गन्डु आस्य् गरुबार ब्योन करुनॉविख,
बॅर्ग बॅर्ग पोशिक्य् पॉठ्य पुचुनॉविख ।
नारु त्य्वंगलन प्यठ पानु बुजुनाविख ॥
येति दुर्दानु हो नैन्द्रि सॉविख ॥० ॥

गृहस्तुच राज़ फुटुज मुच़रावनॉविख,
चु वॅतिस प्यठ हय ननु करुनॉविख ।
हटिकुय म्वख़्तुहार स्र्वगि कुनुनॉविख ॥
येति दुर्दानु हो नैन्द्रि सॉविख ॥० ॥

शाह-सवारन असि शाह लोसुनॉविख,
रिलीफ कमीटियन पतु फिरुनॉविख ।
लटु लठु तु यितु गछ़ करुनाविख ॥
येति दुर्दानु हो नैन्द्रि सॉविख ॥० ॥

कमु कमु मसुवल बरु करनाव्यख,
डयकु कतुरॉविहख तु वदुनाव्यख ।
लूख गरुनुय मंज़ छ़थ्रपु दिवुनॉविख ॥
येति दुर्दानु हो नैन्द्रि सॉविख ॥० ॥

वतुनस रतुछेपि अँस्य् दिवनाँविख,
छाँर्य छाँर्य तोमलु मंज़ु कनु छाँरिख ।
शमहस पोपुस्य गथ करुनाँविख ॥
येति दुर्दानु हो नैन्द्रि साँविख ॥० ॥

वीदन मंज़ ओस यी वखुनाँविथ,
रुत रुत करनु हैकिव रुतुय प्राँविथ ।
रुत रूद अँतिथुय अँसी खकुनाँविख ॥
येति दुर्दानु हो नैन्द्रि साँविख ॥० ॥

अँहिंसा वाँदी बटु चलुनाविख,
लूठ मारु कँस्य कँस्य खोचुनाँविख ।
बस बकोलि बिमलाँ अँस्य् दकुनाँविख ॥
येति दुर्दानु हो नैन्द्रि साँविख ॥० ॥

✱

मेहय बूज़ लालु यियि सालस अज़

शोकु कोर मे ज़ूलाह देवान खानस,
बूज़ुम ज़ि लालु यियि सालस अज़ ।

ह्यसु छस डॅजिमुच होश छुमनु पानस ॥
मे हय बूज़ लालु यियि सालस अज़ ॥० ॥

प्रंग मे वथरिमस डबि डालानस,
गाशि तारुख यियि त्रावान गाह ।
नूर बरॅच हूर ह्यथ पोशि दसवानस ॥
मे हय बूज़ लालु यियि सालस अज़ ॥० ॥

रंगु रोगन कोरुम हेरिब्वनु मकानस,
खासुल खासस बु वंदु जुव तु जान ।
आलथ शूब्य्स लालु मवहुर थालस ॥
मे हय बूज़ लालु यियि सालस अज़ ॥० ॥

छांडुनि द्रायस बो गुलिस्तानस,
लालु गुलि लालु ऑस्य् पान पौरान ।
सखरान तिम ति ऑस्य् इस्तेकबालस ॥
मे हय बूज़ लालु यियि सालस अज़ ॥० ॥

मीठ्य बो करुसय र्वनि दामानस,
कदमन मदथ तसहय मंगु अस्तानस ।
ग्वण छिय लछि बॅघ् जानि जानानस ॥
मे हय बूज़ लालु यियि सालस अज़ ॥० ॥

चीन्य् मून्य् नॉविम गछि कुठि पानस,
 फर्शि फोरुशि करनोवमस खास ।
 मोरु छलु हय करस सुबु तु शामस ॥
 मे हय बूज़ लालु यियि सालस अज़ ॥०॥

लालु ओस फेरान मंज़ पॅरिस्तानस,
 विगिनि वनुवनुनय कॅडनस कल ।
 तॅहन्दि यिनु लय ब्वथि साज़ सेतारस ॥
 मे हय बूज़ लालु यियि सालस अज़ ॥०॥

नारहय लौगमुत लोलु गासु डारस,
 रेह नॅन्य् द्रायस तु बुछिमस सूत्य ।
 अर्मान वलनु आयि मनुकिस दारस ॥
 मे हय बूज़ लालु यियि सालस अज़ ॥०॥

हमखूर रूज़िथ नम नावि रोटनम,
 हम गोम यीरु तय ब्रम गोम दूर ।
 ज्ञान करुनॉवनम ज्ञॉन्य् मस चॉवनस ॥
 मे हय बूज़ लालु यियि सालस अज़ ॥०॥

नूर मेय बुछिमय पशपान लालस,
 ज़ोतान, प्रज़लान, गाह त्रावान ।

सासु बॅद्य सिरियिज़न खॅत्य् असमानस ॥
मे हय बूज़ लालु यियि सालस अज़ ॥० ॥

‘बिमलायि’ लोल बोर राथ दोह यारस,
दारा बनौवुन नु स्वय ऑस खाम ।
यव्हय छुय सीर तय ब्रुय बाव आमस ॥
मे हय बूज़ लालु यियि सालस अज़ ॥० ॥

शोकु कोर मे जूलाह देवान खानस,
बूज़ुम जि लालु यियि सालस अज़ ।
ह्यसु छस डॅजिमच होश छुमनु पानस ॥
मे हय बूज़ लालु यियि सालस अज़ ॥० ॥

व्वलगतुन

वक्तन यि द्युत क्युथ व्वलगतुन,
कति ऑसुस कोत दॅरिथ दिचुनस
मर्चु पिपिनि हुन्दी पाठ्य नचुनॉवनस
खबर वुनि कोतह बाकुय नचुन रूद
राज़ु हेन्जियाँन्य् ऑसुस तमि वतनुच

फ़्वलान, गाह त्रावान, ज़ोतान,
 मेंहफिल शुबरावान
 अज़ येलि येलि द्राव कोतताम कुन
 मेति त्रॉवुख थफ नरि
 बुति रज़ि गॅन्डहस,
 अँथ्यू दकुदकि मंज़ ब्रॉह कुने आयस
 अँन्यू दांदसुंद ह्युव कुस्मत ह्यथ
 गाह ब्रॉह लमान, गाह पथ वुछान

०

वक्तुक ग्रटु फेरान अनुवारे
 डखि बीठस अँकिस कॅहँ थॅन्सिस
 पथकुन तति प्यठु नज़राह त्रॉवुम,
 अति डीठिम सासु बॅद्य लूख च़लान
 व्यसुरेमुत्य् तंबुलेमुत्य् त्रॅहरेमुत्य्
 अति डेंशुम अडुदज़ु लरि महारेनि
 तिमु महारेनि
 यिमन शवंगरफ ओस पशपान
 लोलुक तु तीज़ुक नूर छटान आसु आसान
 तैलि ना येलि ओस टोठ सु वक्ताह

०

तैलि येलि तति ओस रेशमाल्युन स्यज़र
 तैलि येलि तति ओस स्यदुमाल्युन पज़र
 तैलि येलि तति ओस लल निलुवठ च़ालान
 तैलि येलि तति ओस र्वपि खिरस बागनय
 तैलि येलि तति ग्रज़ान अँरिणि हुंघ् व्यदाख
 तैलि येलि तति ओस लल द्यद तु नुन्दु स्योश
 तैलि येलि तति ओस यिमु महारेनि शूबान
 अज़ छि तिमु नारु ज़द छिख कलु छैन्य् छैन्य
 ज़न तिमु अडुच़चि बैशूब तय शर्मन्दु
 अति बूजुम गोल्यन् हुंज़ गगुराय
 अति सब्र ज़न प्रायि छु ब्यूठमुत
 सारिनय चपुचार लुख छिवुरेमुत्य्
 थॉन्थरेमुत्य् छिय तंबुलेमुत्य्

०

वैथि तय आरन वसान ओस शीन वोन्य्
 तिमनुय वसान अज़ आदुम्य् रथ योत
 मोतु मोकल तति कोचि कोचि फेरान
 अति लावॉरिस लाशि पेमच़ ओरु योर
 कैह नरि च़ँट्य, कैह ज़ंगु च़ँट्य छि पेमुत्य्
 कैच़न तिमव छि अँछ कूरिथ कजिमच़ु
 अति बासान ज़न यमछु पानु नच़ान

च्वशवुन्य् तर्फन शुमशान बासान
 पोज़ अति दोहली शाल छिय वूंगान
 अति जिंदु लाशि छि पकान होर योर
 लुख खोचान तिमन अथु ताम लागनस
 छिय गॅन्ज़रान पान पनुन तिम लाशन मंज़
 अति छुय कालन ज़गत कॉपु नोवमुत

०

बुति ऑसुस अमिय वतनुच बाशिंदु
 वक्तन चॅटनस दकुविथ कॅडुनस
 कश मे कोडनम छेचनस दूर
 ठॉसनस कोहन तु बालन मूर
 यिं क्युथ द्युतय वक्तन व्वलु गतुनुय
 लारुक्य दार लॅग्य दारुक्य लार
 सुति ओस वक्ता स्वखु ऑस्य् सॉरी
 अख अँकिस ऑस्य् अँस्य् पलज़ान
 तैलि ऑस बिमला कॉतिहन ख्यावान
 अज़ तस हिंव्य् कॉत्याह बेछान अथुदारान
 यिम तति बजाह ऑस्य् येति तिम वॉरान
 य्वहय तु द्युत वक्तन व्वलगतुना
 कति ऑस बिमु'कोत दिचुन स्व दॉरिथ
 अर्मान वट्स्य् सपुद्द वछिसय मंज़

अख दमा यिखना

हा यारु मे चोनुय छुम तमाह,
चु अख दमा यिखना ।
मनि लोल च़ेय क्युत छुम जमाह ॥
चु अख दमा यिखना ॥०॥

चु रोगि रोगे बांगि यिखना,
ज़ागि हा च़े रोज़य बो ।
चान्यून वतन बो च़ेश्मु वंदहा ॥
चु अख दमा यिखना ॥०॥

शालुमॉर गोशन गाह यि प्यव,
बालादस्य फ़ोल्त्य रंगु रंगु पोश ।
शेरि च़ेय लागुहय पोशि गौंदा ॥
चु अख दमा यिखना ॥०॥

निशातु बागस मॉलु लोगना,
मॉलु मत्यो यिखना ।
शिकारि सॉलस नावि रठतु नमा ॥
चु अख दमा यिखना ॥०॥

छुय हरनु चेशमन मस चे बैरिथुय,
 चॉन्य् अँम्य शबाबन नयूनम होश ।
 बे होशी मंज़ डेशहिा सोपनाह ॥
 चु अख दमा यिखना ॥०॥

व्वलु लोलु बापारुक खातु अँस्य् खोलव,
 अख अँकिस ह्यमव हिसाब ।
 कँम्य् कूत खरचोव, क्याह छु व्वन्य् जमाह ॥
 चु अख दमा यिखना ॥०॥

फँकीरी कँरुम वॉन्सि खरचावनस,
 बॉगरुम नु कॉन्सि खुलु पॉठ्य ।
 च़ेय क्युत 'बिमलायि' सोर थोव जमाह ॥
 चु अख दमा यिखना ॥०॥

हा यारु मे चोनुय छुम तमाह,
 चु अख दमा यिखना ।
 मनि लोल च़ेय क्युत छुम जमाह ॥
 चु अख दमा यिखना ॥०॥



बासान छु अज़ यियि यार

सोंतन यि द्युत सब्ज़ार,

बासान छु यियि बालुयार ।

चावु फोल्य् गुल तु गुलज़ार ॥

बासान छु यियि बालुयार ॥०॥

वादु कोरमुत सोंत यिनक ओसुन,

तनु अँछन मै ज़ून लँज प्रारान ।

च्यतस पावुस तु ह्यस यकरार ॥

बासान छु यियि बालुयार ॥०॥

लोल मा करि मै ठँहराव,

रंगु कुठि कर प्रंग पौराव ।

मनु वारि फोल्य् गुलि अनार ॥

बासान छु यियि बालुयार ॥०॥

गुल फोलिम गिलि दूस्चन,

रूचनि वज़ान आबशारन ।

गोल शीन लँज ज्वयन दार ॥

बासान छु यियि बालुयार ॥०॥

निगारो अख नज़र त्राव,
कावु तस शैछ वातुनाव ।
वावु निस ग्रावु बिसियार ॥
बासान छु यियि बालुयार ॥० ॥

क्याह कोरुम खता क्याह छुम,ति
हितनुय सु ज़ागान छुम ।
दिल कोरनम मे बे करार ॥
बासान छु यियि बालुयार ॥० ॥

बु कोताह काल प्रारस,
रोज़ कूत इन्तिज़ारस ।
पर मसु गोम सु फरार ॥
बासान छु यियि बालुयार ॥० ॥

लोलु अफसानु पँस्य मस,
शोकु पयमानु बँस्यमस ।
तोति मा छुस यिवान आर ॥
बासान छु यियि बालुयार ॥० ॥

दोह डोल शाम हय आव,
कति सना वति ठँहस्याव ।

कॅरनस हय बुय वरफतार ॥

बासान छु यियि बालुयार ॥०॥

ज़ूनि चलिहे मे ग्रोनुय,

नेरिहे नोन सिरियि म्योनुय ।

कासिहेम सुय शिठिन्यार ॥

बासान छु यियि बालुयार ॥०॥

हुसन छुन कॉन्सि पोशान,

यावुन माछु सोर नेरान ।

‘बिमलायि’यॅच छु अमार ॥

बासान छु यियि बालुयार ॥०॥

बु हय छस प्रारान बालु यारस

शेछ बोज़ कथ रठ निशिहय पानस,

बु हय छस प्रारान बालु यारस ।

ज़ॉल्य् वॉन्कन लॅजिसग्रायॅ बुय मारुनस ॥

बु हय छस प्रारान बालु यारस ॥०॥

मे हय यावनस अज़ फुलया द्रायम,
 रंगु रंगु पोशिवारे पोश द्रायम ।
 यिनय सीर बावख कॉन्सि गॉरज़ानस ॥
 बु हय छस प्रारान बालु यारस ॥०॥

होरु सोंतुक म्यूठ म्यूठ वाव आमय,
 कनु तैल्यु द्राम लोलु शेछ बावानय ।
 म्वरख्तु जौरमस पानु लोलु जॉन्पानस ॥
 बु हय छस प्रारान बालु यारस ॥०॥

अँम्यु वावु मॉल्यु कॉत्याह मीठ्य दितिनम,
 शीर्यनम तय बेयि रुम रुम पुर्यनम ।
 अँतुर छकुनॉवनस अँतरे दानस ॥
 बु हय छस प्रारान बालु यारस ॥०॥

मे हय यावुन अज़ व्वलसुनस आमय,
 य्वहय अमार वाश कँडिथुय द्रामय ।
 ग्रख हय लँजिमय लोलु सिरु बानस ॥
 बु हय छस प्रारान बालु यारस ॥०॥

कांछाह बाविहे तस मदन वारस,
 रेह कुच तेज़ेयि मे लोलु नारस ।

यिनु तँहन्दि गुल फवलन सैकि सँहरावस ॥
बु हय छस प्रारान बालु यारस ॥०॥

श्र्वन्य श्र्वन्य गोमय र्वनि दामानस,
वेलु वोत खसु बु ऑनु ज़ॉन्पानस ।
वुद तय यिसबन्द ज़ॉल्युतोम शानस ॥
बु हय छस प्रारान बालु यारस ॥०॥

यामथ जबाना ग्रज़नस आयम,
ताम ज़ैवि यारस मे आलव द्रायम ।
व्वथि बिमय मुच़राव दशि अस्तानस ॥
बु हय छस प्रारान बालु यारस ॥०॥

शेछ बोज़ कथ रठ निशिहय पानस,
बु हय छद प्रारान बालु यारस ।
ज़ॉल्यु वॉन्कन लँजिसग्रायँ बुय मारुनस ॥
बु हय छस प्रारान बालु यारस ॥०॥

✱

हा चु मो लाग बे आर

हाव्वलो छुख हा टोठ यार,
हा चु मो लाग बे आर ।
चॅय छुख म्योन राज़दार ॥
हा चु मो लाग बे आर ॥०॥

कुत्य् लॅग्य मे जिगरस चाख,
चलनु चानि अडवते ।
लोलु छटि द्राम अमार ॥
हा चु मो लाग बे आर ॥०॥

कॅम्य् सुन्ज़ चे बडेयिय पछ,
कुस चे यूत टोठ बास्योय ।
ताँवीज़ु कॅर्यनय बिसियार ॥
हा चु मो लाग बे आर ॥०॥

पोत फेर यितु योर कुन,
वर चलिहे मे लान्युन ।
आमु तावन ह्यतु शुमार ॥
हा चु मो लाग बे आर ॥०॥

ब्रॉट्य् मे हा चॉनी गछान,
छायि गित्य् क्याज़ि छुख करान ।
वुछ कोरुम मे साज़ु सिंगार ॥
हा चु मो लाग बे आर ॥०॥

ज़्वल याम छम मे गछान,
खाबन मंज़ छिहम यिवान ।
खॉब्य यिथ दिवान दीदार ॥
हा चु मो लागू बे आर ॥०॥

क्याज़ि व्वतल बुजि करिथम,
क्याज़ि कॅरथस परेशान ।
छा छ्यवान अँशकुन नार ॥
हा चु मो लाग बे आर ॥०॥

लोलुच ऑस्य् अँस्य् मिसाल,
थ्यकुवुन ओस लोलु व्यवहार ।
मॉर्यमॉंद तु बेयि शुबिदार ॥
हा चु मो लाग बे आर ॥०॥

छिपि न्यूख कॅम्प कॅडुय कल,
तन छस गॅमुच बु पागल ।
वुछ सितम मे बेशुमारय ॥
हा चु मो लाग बे आर ॥०॥

यनु चोलुख च टाठि यारय,
चोल क्याह मे कोताह वनय ।
यावनस गव मे पुचुपार
हा चु मो लाग बे आर ॥०॥

क्रूठ पज़र बिमु छै ज्ञानान,
युस गछान सुना छुन यिवान ।
होल छुम रटन नालु यार ॥
हा चु मो लाग बे आर ॥०॥

हा व्वलो छुख हा टोठ यार,
हा चु मो लाग बे आर ।
चॅय छुख म्योन राज़दार ॥
हा चु मो लाग बे आर ॥०॥

•

यियिना म्याने राये ज़ांह

वॅजिनस यॅम्बरज़ल येमिसुन्ज़ि माये,

यियिना म्याने राये ज़ांह ।

कोत द्राव जानानु लौत लौत छ़ाये ॥

यियिना म्याने राये ज़ांह ॥०॥

बॅस्य-बॅस्य मै ऑसिम मसकी प्यालय,

क्याज़ि बे हालय त्रॉवनस बो ।

मस प्यालु कॅहन्ज़ि ग्रायि छॅकरुनु आये ॥

यियिना म्याने राये ज़ांह ॥०॥

वुछ़तोन छ़ु कपॉस्य छ़ालु मारानय,

कॅम्य् गिलुव मॉस्यमॉद जानानय ।

बोजिना म्याने दिल दुबराये ॥

यियिना म्याने राये ज़ांह ॥०॥

चूरि कति रूदुम आलव दीतोस,

हालि दिल बावुहस ल्वति हेम बोस ।

ललवुन थोवनम अज़लुन न्याये ॥

यियिना म्याने राये ज़ांह ॥०॥

यावन राय सुय ओस म्यानि आये,
 वादस क्याज़ि डोल कॅम्य द्युतुस ब्रम ।
 कमि सबु कॅरनम वुम्बरा ज़ाये ॥
 यियिना म्याने राये ज़ांह ॥०॥

फुलया लॅजिमुच छम लोलु बागस,
 बुलबुल तु कौस्तूर्य छि बोलि करान ।
 अमि हालु गछमा हॉर बो ज़ाये ॥
 यियिना म्याने राये ज़ांह ॥०॥

कॅर्यूतव विगिन्यव अमिकुय पाये,
 बिम छस प्रारान अँछ लोसस ।
 यिय छा शायान मॅशरुन्यू माये ॥
 यियिना म्याने राये ज़ांह ॥०॥

चलवुन यावुन

चलवुनि यावुन दिलन मे व्वठ कॅड,
 बु बैयि छावस बहार कौत्याह ।
 हना चु ब्रोंह पख मे व्वलसनस अन ।
 मे हय छि वुनि कॅह अमार बाकुय ॥
 चलवुनि यावुन दिलन मे व्वठ कॅड ॥०॥

फ़व्लुवुन सु ल्वकुचार वुनि छावुनय रूद,
 फेरुन सु विरिवारन शालुमारन ।
 बु शानु मस्तस कॅरिथ पेठ्य आबशारन ।
 बु ज़ून रॉचन नज़ारु वुछिहा ॥
 च़लुवुनि यावुनु दिलन मे व्वठ कॅड ॥०॥

में लाग डलकाव चु म्यॉन्य कथ बोज़,
 छि श्रावुनन्य आर वुनिति ग्रज़ वुन्य ।
 व्वलु पखतु वॅल्य वॅल्य चु दितु मु कांह थख ।
 बु साज़ करुहय चॉनिस शबाबस ॥
 च़लुवुनि यावुनु दिलन मे व्वठ कॅड ॥०॥

वज़ुनि लजम लोलुचे तारु वाह वाह,
 वुज़िन्य लॅजिम लोलुक्यन् नागरादन ।
 चु कन थवखना यिमन ताज़ वचनन ।
 मे तार वायतम दिलकिस रबाबस ॥
 च़लुवुनि यावुनु दिलन मे व्वठ कॅड ॥०॥

अमि चानि लिलय वठ गोम सीनस,
 यनय बु लॅजिसय यथ सेकि शहारस ।
 दिलु अँन्दरिमुय माय हनाह न्यबर छठ ।
 सु लोलु गुलज़ार छावुन छु बाकुय
 च़लुवुनि यावुनु दिलन मे व्वठ कॅड ॥०॥

मे अज़छु आमुत व्वन्दि लोल अज़ सख,
 रटुहथ बु नालुमति गमन दिथुन टख ।
 व्वलु अँस्य् ज़मानस लथ दिथ निमव दव ।
 चमव तिम जाम यिम चेन्य् छि बाकय ॥
 च़लुवुनि यावुन दिलन मे व्वठ कँड ॥०॥

हुत्य्न सरलायि वौनुय यि तोशस,
 तलय मे पौराव बुनय छस होशस ।
 हुमिस ति लोलस ग्रख अज़ छे लँजमुच़ ।
 'बिमस'यवहय शार वनुन छु बाकय ॥
 च़लुवुनि यावुन दिलन मे व्वठ कँड ॥०॥

✱

छि कौत्याह शाह मे बाक़ुय

ज़गत ज़नुनी भवौणी राजरौनी,
 चु वनयम वुनि छि कौत्याह शाह मे बाक़ुय,
 बु होशि अज़ व्यसुरेमुच लूसमुच ।
 छु बासान वेलु वोत गरि नेरान ॥
 ज़गत ज़नुनी भवौणी राजरौनी ॥०॥

मे द्युतमुत ओसथम मॉज लोलु बागाह,
 मे कॅरमस बागवौनी बाग सगुवुम,
 फुलय द्रायि बागुसुय च़ेय नाद द्युतथम ।
 सु त्रौविथ छावनय आयस दवौनी ॥
 ज़गत ज़नुनी भवौणी राजरौनी ॥०॥

चु छख ज़गि पालुवन्य् माता भवौणी,
 च़े कॅडथन नॅन्य् यि कायनात सौनी,
 चु छख असि पादुनय तल रछिवौनी ।
 मे दितु म्वहलथ बु छावुहा ज़िंदुगौनी ॥
 ज़गत ज़नुनी भवौणी राजरौनी ॥०॥

मे वनतम यि कति आयि वावगिलन यिछ,
 डुविथ न्यूनम बहार यि फोलमुत,
 पत्थर पेमुच च़मुठिथ ही बागुच ।
 वुछिन ति गुल म्यॉन्य छि बरु गछॉनी ॥
 ज़गत ज़नुनी भवॉणी राजरॉनी ॥०॥

छिम गॅज़रिथ मील्युमत्य् यिती शाह,
 चु राजरॉनी कबूल असि छख,
 मे मॉज बोज़तय व्वन्य् ज़ारपारा ।
 च़े आलमस प्यठ छय हुकुमरॉनी ॥
 ज़गत ज़नुनी भवॉणी राजरॉनी ॥०॥

बु पॅश्य सुन्ध् पॉट्य मरुन्य् गॅछुसनु,
 मे शुस्य तय बॉच़ मशिन्य् गॅछिमनु,
 मे च़ठतु मायायि हुंद ज़ाल पानय ।
 मे थवतु कॉयिम स्मरण पनॉनी ॥
 ज़गत ज़नुनी भवॉणी राजरॉनी ॥०॥

मे डींठ्य अज़ताम येति कुत्य् नेरान,
 त्रॉविथ चमन येत्य् गछान अथु हावान,
 मगर मे येलि वेलु वोत पनुनि नेरनुक ।
 योछुम गॅछिम बेयि कैह शाह भवॉणी ॥
 ज़गत ज़नुनी भवॉणी राजरॉनी ॥०॥

यि कूठ द्वख मेय सन्योम सीनस,
 छु ल्वकुचार यार चलुवुन मे बासान,
 मंगान अनुग्रेह छय यि बिमला च़ेय ।
 सुब शाम् स्वरनाव राम नाम भवौनी ॥
 ज़गत ज़नुनी भवौणी राजरौनी ॥०॥

मे छे च़ौन्य आश

फ़वलनु ब्रौठव अडुफ़वलि हा गुलो,
 च़ूरि कोत च़ोलहम मे छम च़ौन्य आश ।
 छुखा कुनि वारि च़ुय या मंज़ सौबुलो ॥
 व्वला म्यानि बुलबुलो मे छम च़ौन्य आश ॥०॥

च़ु हा म्यानि बागुक अख टोठ गुलो,
 च़ु हा म्यानि बागुक छुख पोशिनूल ।
 होश न्यूथम करार कोरथ नु बोलबोशो ॥
 व्वला म्यानि बुलबुलो मे छम च़ौन्य आश ॥०॥

मे च़ानि कँज वठ गोमुत छु सीनस,
 तौगुम नु सगुवुन लागुन मे बागवान ।

फोलुय नु बाग हा लोगुस ज़जुर गुलो ॥
व्वला म्यानि बुलबुलो मे छम चॉन्य् आश ॥०॥

कवय आयि नॅन्य् त्रठ वॅसिथ नॅब्य् सख,
तु न्यूनम प्रॉटिथ येमि वारि हुंद गुल ।
आरु हॅच प्रारान बोलुवन्य् कोस्तूर गुलो ॥
व्वला म्यानि बुलबुलो मे छम चॉन्य् आश ॥०॥

चै मा दव कॅडथम कोहन बालुनय कुन,
चु खोचान मा छुख सुहन शालनय मंज़ ।
मॅतिस सोंतुसय मंज़ हरुद कॅरिथ च़ोलहम ॥
व्वला म्यानि बुलबुलो मे छम चॉन्य् आश ॥०॥

बिहिथ चु छुख चूरि निगीन बागस,
बु छस दूर पेमुच़ रोक़ि सॅहरावस ।
बु काठु बबुर दॅज़सा नारु म्याने गुलो ॥
व्वला म्यानि बुलबुलो मे छम चॉन्य् आश ॥०॥

✱

पोत फेरतो जानानो

छम नो मशान माय चॉनी ।

पोत फेरतो जानानो, पोत फेरतो जानाना

यामथ च थनय प्योहम,

क्रख गॅयि दोयुम गोबुर ज़ाव,

क्रख गॅयि दोयुम गोबुर ज़ाव,

रामस पतु लक्ष्मण ज़ाव

च्युतस पावतो जानानो ॥०॥

छमनो मशान माय चॉनी,

राम येलि द्रायोव वनवास,

लक्ष्मण ति सुत्य् सती द्रास,——२

तति ति तिमन रूद अथवास ।

च्युतस पावतो जानानो ॥०॥

ओसना मैति बोनि शोहजार,

छोवुथ चैति कोताह काल,—२

आयि कति तिहा तेज़ वावमाल ।

मूल प्रॉटिनस जानानो ॥०॥

लंजि लंजि पोश ऑस्य् फोल्म्युत्त्य्,
 लोलु बाग ओस शोलु मारान,
 वक्त्तन त्रॉव वुलट नज़र ।
 डोठ त्रोवनस जानानो ॥०॥

कमि मसवलि मस चोवनख,
 ह्यस निथ नेन्द्रे सोवनख,
 आय रुमरेशनुय सूज़िनय ।
 मासि चानि हुन्दि जानानो ॥०॥

लोलु बतु थाल छसया शेरान,
 रायि चानि हुन्दि जानानो,
 तुरनॉविनम कमि यिम साल ।
 मासि चानि हुन्दि जानानो ॥०॥

याद छुम प्यवान सुहा लोल प्रोन,
 गिंदुन तय गिंदुनावुन प्योम ।
 कति मॅशरोवुथ सु श्रेह प्रोन ॥
 याद पेयतनय जानानो ॥०॥

कॅम्य् कॅरनय जाय पिंज़रन,
 माय चॅटनय ज़ायि कॅरनय ।

बिम तोति मंगि आय चोन ॥
 पोज़ नीस्चनय जानानो ॥०॥
 छमनो मशान माय चॉनी ।
 पोत फेरतो जानानो ॥
 पोत फेरतो जानानो ॥०॥

✱

तैलि ओस शूबान माल्युन म्योन

तैलि ओस शूबान माल्युन म्योन,
 येलि तति ओसुय टोठ बब म्योन ।
 शोलु मारुवोन तय गाह त्रावुवोन ॥
 तैलि ओस शूबान माल्युन म्योन ॥०॥

तमि वॅरियिव ऑस न्यर्ज़ला काह,
 लोसुन ह्योतनख वारु वारु शाह ।
 तॅथ्य् सुत्य् दूरान गव बब सोन ॥
 तैलि ओस शूबान माल्युन म्योन ॥०॥

पोशि बागाह ओसुस तय फोलमुत,
 लंजि लंजि आसुस फुलयाह लॅजमुच ।

अफसूस रूद छाविहे पानु बब सोन ॥
तैलि ओस शूबान माल्युन म्योन ॥०॥

शुस्यव दिच क्रख अज़ हय चोल असि मोल,
माजि वोद रोव तस वुमॅबरि हुंद ओल ।
सॉरी यिय वनान यियिना बेयि बब सोन ॥
तैलि ओस शूबान माल्युन म्योन ॥०॥

द्वशवय बॉच यिकुवटु गॉमत्य छा,
तैलि मा छांडिहे अख अँकिस कांह ।
वांगुज वोर येति छुन गरु पनोन ॥
तैलि ओस शूबान माल्युन म्योन ॥०॥

माजि वौनुनम बोज़ि कूस्य बिमय म्योन,
मेति ओस शूबान तैली राजरेनि तोन ।
प्रज़लान हय ओसुम मेय ड्यकुलोनि ।
तैलि ओस शूबान माल्युन म्योन ॥०॥

विष्णु भवनस मंज़ तोह्य मॅग्य तोस जाय,
स्वय गॅयि आसुन्य पॅज़्यकिन्य माय ।
युस योर आव तस छुय येति नेरोन ॥
तैलि ओस शूबान माल्युन म्योन ॥०॥

तेलि ओस शूबान माल्युन म्योन,
 येलि तति ओसुय टोठ बब म्योन ।
 शोलु मारुवोन तय गाह त्रावुवोन ॥
 तेलि ओस शूबान माल्युन म्योन ॥०॥

✱

त्योगलनार

वुह्योम अज़ दिलस बैयि त्योगलनार
 यिहय प्योम बैयि च्यतस प्रोन गरुबार,
 सु रंगु कुठ, गछि कुठ शालुमार ।
 चोकु दारि प्यठ शूबुन सु समावार ॥
 वुह्योम अज़ दिलस बैयि त्योगलनार ॥०॥

ल्वकुचारु ग्युंदमुत ओस मे यथ आंगनस,
 महारेन्य् पौरावहस मंजयथ डालानस ।
 मैय क्युथ नु रूद तति जायि व्यस्तार ॥
 वुह्योम अज़ दिलस बैयि त्योगलनार ॥०॥

निगीन बाग, झीलि डल तु चार चिनॉरी,
 शूबुन्य् क्याह पकान छटु शिकॉरी ।

छिम च्यतस प्यवान तिम शीनु अंबार ॥
वुह्योम अज़ दिलस बैयि त्योंगलनार ॥०॥

दीवी आंगनुच स्व बादाम फुलय,
बाछि बरनि अँचिथय गणेशि विहार ।
छ्वरु छ्वरु छस करान करु प्रक्रम हज़ार ॥
वुह्योम अज़ दिलस बैयि त्योंगलनार ॥०॥

सु निशान शालुमार तय दौछ गाम,
शुहुल शेहजार छावुन सु सुब शाम ।
व्वखुर लोगुम जिगरस तछुन बिसियार ॥
वुह्योम अज़ दिलस बैयि त्योंगलनार ॥०॥

स्व मालिन्य् बागुच हँज दछि रँन्ठ,
वौरिव्य् बागुक्य अम्बुस्य चुँठ्य अनार ।
कौत्याह औस्य् मोदुस्य कुत्य् रसदार ॥
वुह्योम अज़ दिलस बैयि त्योंगलनार ॥०॥

स्यठाह काल गव यनु गरु पनुन त्रोव,
रामुचँन्दुन वनवास पथ त्रोव ।
बरबुक आयस वुछिहा पनुन अयोध्या द्वार ॥
वुह्योम अज़ दिलस बैयि त्योंगलनार ॥०॥

बु क्वसु छस कतिछस यीरु कति छस,
 'बिमलायि' प्रॉन्य् पॉर्यज़ान गॅछस ।
 देंज़स नार च़ालान छस त्योंगल नार ॥
 वुह्योम अज़ दिलस बैयि त्योंगलनार ॥०॥

वुह्योम अज़ दिलस बैयि त्योंजलनार
 यिहय प्योम बैयि च्यतस प्रोन गुरुबार ॥

ओर मय आव बॉलिये

मलालु क्याह रौटुन तु द्राव,
 ओर मय आव बॉलिये ।
 तोर नय आव, तेलि कपॉर्य द्राव ॥
 ओर मय आव बॉलिये ॥०॥

नेरि वेसिये छॉडव चु लाग,
 कथ दोरि चूरि रूदये ।
 स्वनि म्याने मय सु तम्बल्याव ॥
 ओर मय आव बॉलिये ॥०॥

ल्वकुवार म्यानि चुय च्यतस पाव,
 कूत लोल बोर मे तँमिये ।
 क्याज़ि रूठुम व्वन्य मे बूज़ द्राव ॥
 ओर मय आव बॉलिये ॥०॥

शालुमॉर गोशन सु मा गव,
 पोशि थरिनय चूरि मय रूद ।
 आबशारन वुछिनि मा द्राव ॥
 ओर मय आव बॉलिये ॥०॥

बाग सगुनि लौत मा द्राव,
 ग्वड बरुने कुलिनय ।
 छा पताह कति करि ठँहराव ॥
 ओर मय आव बॉलिये ॥०॥

मोत कस दिवान येति फुर्सथ,
 वारि प्यठ निवान लौतुये ।
 जामु पुर्य पुर्य छुय चलान वाव ॥
 ओर मय आव बॉलिये ॥०॥

कति छि यिवान गछान कोतये,
छुन यि कॉन्से तामुथय ।
बिमुह्ल वनतय कस करख गाव ॥
ओर मय आव बॉलिये ॥० ॥

लॅतिये बोज़तय तिहुंघ् विलज़ार

अज़हय टॉक्य पनुन्य् आयम सोपुन्य तॅतिय,
दोपहम अॅस्य् क्याज़ि त्रॉविथ येतिये ।
लॅतिय बोज़तय तहिंघ् विलज़ार ॥
मायि हुचु तिमु करनि लजि जारुपार ॥
लॅतिये बोज़तय तिहिन्घ् विलज़ार ॥० ॥

पापु सॉब,टाठि सॉब,काकु सॉब तॅतिये,
मुछहम क्याज़ि द्रॉवु पेयवु बांबुर,
असि तोरनु फिकरि क्याह आंस छंबुर ।
अॅस्य् हय येति सॉरी रूघ् नेन्द्रि हॅतिये ॥
लॅतिये बोज़तय तिहिन्घ् विलज़ार ॥० ॥

प्रुछहम सारिवुय पोन्क् छुना तँतिये,
 योतये सॉरिय छिव द्रामतिये,
 तति छिवा छकुरन सॉर्य आमृतिये ।
 केशान टाढ्य अँस्य त्रेशि दादि तँतिये ॥
 लँतिये बोज़तय तिहिन्द्य विलुज़ार ॥०॥

टॉढ्य सॉबन नियस बागातु पँतिये,
 वौनुनम यि ओसना तुहुंद गुलज़ार,
 अँथ्य ज़न व्वपदेयि कँड्य तय खार ।
 यिम व्वज़ुल्य गुलाब ज़न रूद्यमुत्य् छेतिये ॥
 लँतिये बोज़तय तिहिन्द्य विलुज़ार ॥०॥

ललद्यद रवपु द्यद,तु रेशयमोल तँतिये,
 ब्रोंठ कनि रुचु द्यद,तु बैयि अरिनिमाल,
 सारिवुय प्रुछहम अख कुनुय सवाल ।
 तोह्य द्रॉव तोत तय नियाज़ सॉन्य् कतिये ॥
 लँतिये बोज़तय तिहिन्द्य विलुज़ार ॥०॥

पापु सॉबन प्रुछनम 'बिमु'कूर्य हेचिये,
 वूर्य वूर्य छय यिवान सॉनी मेचये,

यिमव असि दाह दित्त् तिम शूरुय बॉच्च कतिये ।
 गतु ग्यूर कोहम ब्रूँट्य तय पॅतिये ॥
 लॅतिये बोज़तय तिहिन्द्य विलुज़ार ॥०॥

अज़हय टॉट्य पनुन्य आयम सौपुन्य तॅतिय,
 लॅतिये बोज़तय तिहिन्द्य विलुज़ार ॥०॥

✱

तनु रोट मे पानय स्वमनु श्रु राम

यनु गोम कनुनय छुस आव आवय,
 तनु रोट मे पानय मनि श्रुरामय ।
 ज़ारु पारु कोरमस यिनु थवख पामय ॥
 तनु रोट मे पानय मनि श्रुरामय ॥०॥

छ्वकुलद सीनु गोमुत प्यट्य बानय,
 शनु शनय गॅजमुच्च अनशनि ज्यनय ।
 वसान अँश्य चालय छम क्षण क्षणय ॥
 तनु रोट मे पानय मनि श्रुरामय ॥०॥

स्व बुलबुल टॉठ कूर ऑसुय दूरि दूरय,
कनन तमि कौरनम यवहय ख्वशनामय ।
मे च्यूनम स्व व्यसुरेमुच ऑस हना पानय ॥
तनु रोट मे पानय मनि श्रुरामय ॥०॥

मे राथ दोह तु सुब शाम पोरुम श्रुरामय,
तु ललनोवुम ख्वनि ख्वनि घनश्यामय ।
मे अशिवानि गोड द्युतमस तनु मनय ॥
तनु रोट मे पानय मनि श्रुरामय ॥०॥

मे सोपनस मंज़ आमय बबु भगवानय,
दोपनम कथ प्यठ छख चु व्यसरानय ।
बु हय सोज़नय चे निश टोठ दुर्दानय ॥
तनु रोट मे पानय मनि श्रुरामय ॥०॥

अथस क्यथ द्युतनम नवीद नाबद,
वोननम मुचर म्वठ चु गछख हर्षस ।
सु अर्शस खारि येलि पेयि थनय ॥
तनु रोट मे पानय मनि श्रुरामय ॥०॥

मे नवदुर्गा आयम गाह त्रावानय,
कोरि हुन्द गरु स्व चायम ऑस शोलानय ।

द्वख दूर कॅर्यनम तमि मेय प्रथ क्षणय ॥
तनु रोट मे पानय मनि श्रुरामय ॥०॥

तु नवदुर्गा चोरम हर्ष प्यव थनय,
गटु चज असि तु गाश आव ज़ाव नन्दनय ।
'बिमलायि' शाफ चॅल्य हर्षनि ज्यनय ॥
तनु रोट मे पानय मनि श्रुरामय ॥०॥

यनु गोम कनुनय छुस आव आवय,
तनु रोट मे पानय मनि श्रुरामय । ॥०॥

✽

प्रभात हो आव

प्रभात हो आव नेन्दुर मो त्राव,
चु यथ वक्तस नेन्दुर-मो त्राव ।
मे दिचमय जीर तु च्यतसुय थाव ।
नेन्दुर मो त्राव, नेन्दुर मो त्राव ॥
प्रभात हो आव नेन्दुर मो त्राव ॥०॥

स्वरान प्रभातु छु युस दयि नाव,
 पकान ब्रोंठकुन तसंज़य नाव ।
 छु नो डालान तस वर्जुन वाव ।
 पकान ब्रोंठ नाव छुसनु ठहँराव ॥
 प्रभात हो आव नेन्दुर मो त्राव ॥०॥

चु मो लाग गॉफिल यथ वक्तस,
 व्वथ कॉफिलस सुत्य कदम पकनाव ।
 अँज्युक मा छुय पगाह रोज़ान ।
 छु नॅव्व् नॅव्व् रंग वक्त बदलान ॥
 प्रभात हो आव नेन्दुर मो त्राव ॥०॥

प्यवान नेन्दुर छे यस मूर्खस,
 बनी क्याह तस कर्म हीनस ।
 सु ब्रह्मण नु रोज़ान सतज़नय ।
 गछान अर्पण मोह मदु मायाये ॥
 प्रभात हो आव नेन्दुर मो त्राव ॥०॥

प्रभातस लक्ष्मी बेहान तख़्तस,
 छि नेरान बाँगरनि छय बख़्तस ।

सुली व्वय दारि बर मुचराव ।
 हलम माजि ब्रोंठुकनि वहराव ॥
 प्रभात हो आव नेन्दुर मो त्राव ॥० ॥

कुकिल कोस्तूरुय तय पोशिनूल,
 ग्यवान मेछि बोलि छिय प्रभातस ।
 वज़ान मंदरन छि घंटाये ।
 छि पूज़ान माजि अम्बाये ॥
 प्रभात हो आव नेन्दुर मो त्राव ॥० ॥

च्युतस थोवथम च़े च़यथ दिच़थम,
 च़े नेन्द्रे म्यानि हा नाश कोरथम,
 बु मस नेन्द्रे हा वुज़नॉवथस ।
 फोलिथ द्रायम मनुचि संगरमालय ॥
 प्रभात हो आव नेन्दुर मो त्राव ॥० ॥

बु ऑसुस माता कर्महीनुय,
 लछुल डोलथम कोरथम ज़ीनथ ।
 'बिमस' वुज़नोवुथ वुद्युगु बल ।
 डेडि तल आशायि छसय प्रारान ॥
 प्रभात हो आव नेन्दुर मो त्राव ॥० ॥

✱

अन्तः करण ग्वडु नावुन छुम

मे हय छुम शिवनाथ मनस मंज़ वालुन,
अन्तः करण ग्वडु नावुन छुम,
श्रोचि श्राणि श्रानाह ध्यानाह दोरिथ ।
पनुन पान तँस्य् पुशिरावुन छुम ॥
अन्तः करण ग्वडु नावुन छुम ॥० ॥

शिव शंकरस छुम पान आलुनावुन,
मन पनुन रत्नदीप ज्ञानुन छुम,
श्वद भावनाये, श्वद वासनाये ।
रत्नचौनिजि तस आलुनावुनि छुम ॥
अन्तः करण ग्वडु नावुन छुम ॥० ॥

शिव छु बिहिथ कौलासु कोहस,
छारुन पोहस तु हारस छुम
थपि छिपि न्युन तय त्वलि ललनावुन ।
पूजा तु अर्चनायि दय रंजुनावुन ॥
अन्तः करण ग्वडु नावुन छुम ॥० ॥

मल तय अज्ञान गालुन तु ज़ालुन,
 अथ काठ बबरे नार छुम द्युन,
 अहंकारुक्क्य् कोह तु थँग्य् पत्थर पावन्य ।
 ठासुन्य् ब्वन लोहरावुन छुम ॥
 अन्तः करण ग्वडु नावुन छुम ॥०॥

छांठ छम वायिन्य् मनुसरु सोदरस,
 बंड तय कॅदुल ग्वड छारुन्य् छिम,
 कनि तय पल, वठ छिम अँलुरावुन्य् ।
 सर्फन वथ हय डालुन्य् छम ॥
 अन्तः करण ग्वडु नावुन छुम ॥०॥

ज़ाल तय कॅड्य़ज़ाल छिम च़टुनावुन्य्,
 खूँखार सुह शाल मारुन्य् मे छिम,
 शिव नाथस वतन पोश छिम वथुरुन्य् ।
 मनु वाटिकायि मंज़ तिम च़ारुन्य् छिम ॥
 अन्तः करण ग्वडु नावुन छुम ॥०॥

छेचर मनुकुय छुम हय श्रोचुनावुन,
 यज्ञ तय हवन करुनावुन छुम,

अहंकार काम क्रूध, मद हमनावुन ।
 तैत्तिथय मे दयि बजर मानुन छुम ॥
 अन्तः करण ग्वडु नावुन छुम ॥०॥

हेर छम शेरेनि नवि सरु लरिनुय,
 चूरिमिस पोरस लागुनि छम,
 नूर बुथिसय तस पूर छुम वुछुनुय ।
 पतु स्वनु प्रंगस बेहनावुन छुम ॥
 अन्तः करण ग्वडु नावुन छुम ॥०॥

कठिने वति हुंद त्रटु तूफानाह,
 पनुनिस पानस चालुन छुम,
 शंकराचारु अमरनाथु अमरीश्वर छांडुन ।
 आनन्दु फल 'बिमलायि' प्रावुन छुम ॥
 अन्तः करण ग्वडु नावुन छुम ॥०॥

मे हय छुम शिवनाथ मनस मंज्र वालुन,
 अन्तः करण ग्वडु नावुन छुम ॥०॥

छु वक्तन क्युथ मे पानस डास कोरमुत

यि क्युथ कायायि म्यानि वथुवार गोमुत,
 गोमुत नीरिथ छुय वख पोत यियिन फीरिथ,
 लोबुम क्याह, क्याह रोवुम वन कस बु बावय ।
 अनन कति सुय रँटिथ युस कन मे दास्यम ॥
 छु वक्तन क्युथ मे पानस डास कोरमुत ॥० ॥

अँछन छुम गाश गोमुत अन्युव वोथमुत,
 मे हँस्य् पान वँस्य् प्योमुत तुर फँटमुच,
 पेमुच होकुन पथर मद पान वोथमुत ।
 सु पान म्योन मदहोस शेमिथ प्योमुत ॥
 छु वक्तन क्युथ मे पानस डास कोरमुत ॥० ॥

वुछुम ऑनस अंदर अज़ पान यँच कॉल्य,
 अँछन छिम ख्वड गौमुत्य् कुहुन्य् कुटुकाल,
 पछुय आयम नु पानाह छा यि म्योन बुथ ।
 वुछुम रूपस तु तीज़स गोमुत लुर पार ॥
 छु वक्तन क्युथ मे पानस डास कोरमुत ॥० ॥

छु कोत गोमुत सु सर्वकद छुम कोब मे द्रामुत,
 अथन क्यथ लूर व्वन्य् छम मातुह्य छस,
 कनन ग्वब्यर छि गाटुजारु रोस्तुय मेचिमून्य् ।
 मे ज़ेठुन अज़ छु बासान ब्रेठुन गोमुत ॥
 छु वक्तन क्युथ मे पानस डास कोरमुत ॥०॥

मे पानस च्यथ दिचुम वह्य ति क्याह गोम,
 बु ममताये यि ऑसनस कौदस बॅरमुच,
 द्युतुम अज़ ममतायि हुंज़ि लंकायि मे नार ।
 मे ज़ोलुम पौन्य् पानय पनुन राज पाठ ॥
 छु वक्तन क्युथ मे पानस डास कोरमुत ॥०॥

कोरुम संकल्प द्रढ वसु द्यान धारणाये,
 बु फाटुनाव पान पनुनुय दयि लोलु क्वलि मंज़,
 वसस चॅकिस अन्दर चूरि छिपि दिमस थफ ।
 कडन नोन लाल वदंस जुव जान तय ह्यस ॥
 छु वक्तन क्युथ मे पानस डास कोरमुत ॥०॥

वनस सोरुम पनुन गुदरुन तु चालुन,
 दपस गोम भ्रमु बौज्यगार दूर शुर्य बौच कॅल्मि,

प्यमस पादन रटन जिगरस अंदुरय खटन व्वन्य् ।
 वनस सोरुय मे रोवुम वॉन्स रॉवुम ।
 मगर व्वन्य् पॅतिमि गरि दयि नाव प्रोवुम ॥
 छु वक्तन क्युथ मे पानस डास कोरमुत ॥०॥

छु मा रोज्ञान रूप तय तीज़ मनष्यस,
 फटान मोहॅ मायायि कायायि डुबडास सपदान,
 सु आसान अँन्दुर्य मूमुत दीह जिंदय,
 पज़्य्स पायस प्योनुय ल्वकचारु सुय मंज़ ।
 पज़्यस लागुन चोन यूग द्दुहन ॥
 छु वक्तन क्युथ मे पानस डास कोरमुत ॥०॥

गॅयम गट दूर वुछिमस नूर बर पूर,
 लगस वॅन्दिथ फोलरोवनम होशि पोशिनूल,
 मे ऑस व्वद नेन्द्रि अज़ताम शॉंगिथ बिहिथ,
 चॅजिम नेन्दुर'बिमस' सपदुम मे कल्याण,
 वुज्य्व दयि लोल मे मनि भक्त् बावसान ।
 छु वक्तन क्युथ मे पानस डास कोरमुत ॥०॥

मे मा ह्योतमुत ओस दयि नाव अज़ताम,
 अवय कायायि ओसुम गोमुत मे वथुवार,
 अवय कायायि ओसुम गोमुत डुबडास ।
 अवय कायायि ओस गोमुत मे लुरपार ॥
 छु वक्तन क्युथ मे पानस डास कोरमुत ॥०॥

✱

कृष्ण लीला

नन्द गूरुय वोननय जसुदायि पानय,
 असि ल्वलि ललुनावुन छु घनशामय ।
 वादु पँतिमि जन्मुक पूर करनि आमय ॥
 असि ल्वलि ललुनावुन छु घनशामय ॥०॥

हतय जसुदायी कन थव चु कथन,
 अथन क्यथ ललुनावुन छु घनशामय ।
 यिनय लूक कथनुय कन दारख चुय ॥
 असि ल्वलि ललुनावुन छु घनशामय ॥०॥

असि गुरु आव अज़ पानु भगवान,
 अथव हय ललुनावुन छु पान भगवान ।

वासुदीव ह्यथ आव असि भगवानय ॥
असि ल्वलि ललुनावुन छु घनशामय ॥०॥

जन्मस आव दारि बर मुचरिन काँदखानस,
शेछ वाँच कंसस ह्यसु रोज़ काल ओय जन्मस ।
कूर च़जिस अथु मंज़ वोननस असमानय ॥
असि ल्वलि ललुनावुन छु घनशामय ॥०॥

हुति काँदखानस मंज़ दीवकी माँजी,
त्रटु तूफान आँस मनि मंज़ ललुवाँनी ।
बुथि आव नन्दुगूर वासुदीव राज़सुय ॥
असि ल्वलि ललुनावुन छु घनशामय ॥०॥

अथन क्यथ ह्यथ आव कृष्ण भगवानय,
बूजुन कृष्ण ज़ाव थर चायि कंसस ।
हुकु द्राव च़खि सान वोत दोरानय ॥
असि ल्वलि ललुनावुन छु घनशामय ॥०॥

पूतनायि द्वदु बबन ज़हर बोरोनुय,
दोपनय चावन बु नवनिहाल शाम ।
जुव तैम्य कोडनस बस कुनी दामय
असि ल्वलि ललुनावुन छु घनशामय ॥०॥

मथरायि तु गूकलुक्क्यू लूख आयि सॉरी,
 फ़कहँत्त्यू दोरान आयि ननुवॉरी ।
 वोन हय जसुदायि हावुन मुरॉरी ॥
 असि ल्वलि ललुनावुन छु घनशामय ॥०॥

गूकल तु मथरा वॉसियव यैलि वुछ,
 दोपहस छु सासुबँद्य भासकर प्रज़लान ।
 नन्दुराजुन गरु बन्यव बोड घामय ॥
 असि ल्वलि ललुनावुन छु घनशामय ॥०॥

शिव शंकर ति हय आव छारान तु लारान,
 वोनुन जसुदायि हावुन मे नन्दुलाल ।
 छुसय तम्बल्योमुत वुछिहन बु रंबुवोनय ॥
 असि ल्वलि ललुनावुन छु घनशामय ॥०॥

दोपनम शंकरन होल चली चै प्रोनय,
 छुय हय ल्वलि ल्वलि ललुवुन चै भगवान ।
 वोनुनस जसुदायि छुमनु कॉन्सि हावोनय ॥
 असि ल्वलि ललुनावुन छु घनशामय ॥०॥

वॉलिंज़ि मंज़ छुम खँटिथ थावोनय,
 वछि सुय मंज़ रटुन छु कृष्ण गूपाल ।

हावुन नु साधु संतन छुम खटोनुय ॥
असि त्वलि ललुनावुन छु घनशामय ॥०॥

गूपियव तु गूर्य बायव वौनुस कुस खटहन,
सुहय छुय ननि ख्वत नोन भगवान ।
सृष्टी हुंद कर्ता छु कष्ट हरवोनुय ॥
असि त्वलि ललुनावुन छु घनशामय ॥०॥

सुहय छुय म्योनुय इष्ट भगवान,
'बिमलायि' अर्पन कौरुस मन तु प्राण ।
सातु सातु कृष्ण नाव स्वय छे स्वरानय ॥
असि त्वलि ललुनावुन छु घनशामय ॥०॥

भवसागरस तैम्य नावि नम रोटनस,
फटनु भय कोसनस सुय दियस तार ।
पंजिकिस लोलस दय छु टोठानय ॥
असि त्वलि ललुनावुन छु घनशामय ॥०॥

शांदुगॅन्ड्य तोतु

बु लोल बरान चु डोल दिवान,
 चु वन पानय यि छा शायं ।
 बु प्यार करान चु रछ नु सनान ॥
 चु वन पानय यि छा शायं ॥०॥

बु लोल देवारन चीन्य मून्य खारान,
 गाह बोर करान गाह डख थावान ।
 चु तोति कैसरि तॅल्य छुख पोन्त्य अनान ॥
 चु वन पानय यि छा शायं ॥०॥

बु रंगु कुठि प्रंग छेसय पौरान,
 नवि नवि दोहँ नौव सिंगार करान ।
 चु छुख माजि हुन्द नु दौलुय त्रावान ॥
 चु वन पानय यि छा शायं ॥०॥

बुतिमाजि पनुनि हुंज छस खानुमॉज कूर,
 वोननम अँन्यज्योन गरि पैठ्य यूस्य ।
 चु बूजिथ क्याज़ि ज़ोर लागान ॥
 चु वन पानय यि छा शायं ॥०॥

बु शांदु गॅन्ड्य तोतु छसय लागान,
हुम्य् सुंज येम्य् सुंज खंड छसयना वनान ।
चु खबर कथताम छुख कन थावान ॥
चु वन पानय यि छा शायं ॥०॥

बु माजि हो छसय टॉठ हिश कूर,
चु व्वथ शेरी स्व सतिसिनि दूर ।
चु नय वर्गुलावथ गळ्छ्यम नु वादु पूर ॥
चु वन पानय यि छा शायं ॥०॥

बॅ मॅच मीरा चै पतुलारान,
प्रथ शाह म्योन चोनुय नाव स्मरान ।
चु तोति राधायि हुंद ध्यान धारान ॥
चु वन पानय यि छा शायं ॥०॥

बु बिमला'बस चै पतु लारान,
नतय कॉत्याह मे छिय प्रारान ।
चु डीशिथ क्याज़ि छुख ओन लागान ।
चु वन पानय यि छा शायं ॥०॥

बु लोल बरान चु डोल दिवान,
चु वन पानय यि छा शायं ।

बु प्यार करान चु रछ नु सनान ॥
चु वन पानय यि छा शायां ॥०॥

ग्वरु व्वपदीश

मे यँचकॉल्य् अज़ हय लोबुम पनुन पानय
बु राँवमुच ऑसुस फेरान कोहन तु वनुनय
बु राँवमुच ऑसुस वॉरानन बयाबानन
बु फेरान ऑसुस मंदरन तु शिवालयन
बु फेरान ऑसुस गिरजागरन अस्तानन
मे डँजिमुच ऑसुम वथुय अँन्य बु ऑसुस
अन्यूर ओसुम ऑसुस गाशि रोस्तुय



बु खेमुच ऑसुहस वते ग्रदव तु नूलव
दिगि दिगि खेमुच बु गॉन्टव तु कावव
द्वपुनॉवमुच ऑसुस बिचव तु सर्फव
मे च़ोप्य् ऑस्य् दितिमुत्य् सुहव तय शालव
लिथुवमुच बु ऑसुहस होन्यव तु ब्रास्यव
मे पथ ब्रॉह सोरुय दँदवनु ओसुम
ओसुम नु वतुहावुका हाविहेम वथ

मे फ़ठ गव वुछिथ अज़ पनुनुय हाल
 क़ंज़ुय योत म्वच्योमुत मे बस छु अँडिजि त्रवंगुरा
 वँछुम दग मे ज़खमन च़जम क्रकु मे नीरिथ
 मे द्राव वछि वॉलिंजि ज़ेवि साई रामय
 मे प्यठ सायि बोसुम मदतस सु आमय
 दोपनम चु कति हटरि हटरि योर फेरान
 च़ म्वछि वठ तु अँछ जल ज़ल अंदर
 मोच़िथ बेह अँन्दुर मनि बँनिथ बिन्दु आकारय



गछुस अँन्दरी शरण प्यस चु पादन परन
 करुन्य् हेचु बँखती अँन्दुर्य रागु सुती
 व्वलसुनस अनुन लालु भावनायि सुती
 चु दिस अँन्दरय वँन्य् छंडुन व्वन्दि अँन्दरय
 लय बरान ओमस रोज़ चुय पॉन्य् पानय
 सतस प्यठ रोज़ पानु बन चुय सथज़न
 चु नोन कड़ पनुन पान पनुने प्रकाशय
 परुन्य लाग पानय गीता पुरानय



चै नय छुय च्यथ विषयन भूगन लागुन,
 चै नय छुय गरि पननि न्यबर नेरुन
 चै छुय सथ बावनायि साई नाथ ललुवुन
 परुन छुय हरे कृष्ण हरे रामय
 युसहय घनशामय सुय हय साई रामय
 यवहय ग्वरुशब्द छुय बिमय व्वन्य् चै पालुन
 चै हय छुय लबुन व्वन्य् पनुन पानय ।
 चै हय छुय वनुन साई राम साई शामय

✱

बालुयार आम यँचकॉल्य्

बालुयार आमय यँचकॉल्य्य वेसिये,
 वौनुनम नेरव डल सॉल्य्ये वेसिये ।
 कमि हीतु नीनस तँम्य् यॉर्यहय वेसिये ॥०॥

नीनस कमि शोकु तँम्य् पोशि बागन,
 वौननम छावव बागुच मँस्ती ।
 बौम्बरस यँम्बरजल रूज्जिथ ज़ागि तँतिये ॥
 कमि हीतु नीनस तँम्य् यॉर्यहय वेसिये ॥०॥

वोननम नेरव तु फेरव क्वंगु वारचन,
 दिमव तँत्य् डुलुगँन्ड्य प्यठ क्वंगु बेरन ।
 थ्वथ कोरनम मे कुकिल तय कोस्तूरिये ॥
 कमि हीतु नीनस तँम्य् यॉर्यहय वेसिये ॥०॥

वोननम तँम्य् व्वथ चलव कोहन तु बालन,
 छालु मारव पोशन नालुमँत्य् करव ।
 थ्वथ कोरनम आफताबन तु ज़ूने ॥
 कमि हीतु नीनस तँम्य् यॉर्यहय वेसिये ॥०॥

तँम्य् बु नीनस चूरि दूर आबशारन,
 वोननम व्वलु बोज़व सोज़ युहुंदुय ।
 यलु गँयि लोलु कँन्ड्य ज़ाल अमि हीतय ॥
 कमि हीतु नीनस तँम्य् यॉर्यहय वेसिये ॥०॥

वोनमस मे, अँस्य मा तोत दूरेय,
 येति आसि नु असि कांह रॉछ करनस ।
 बु ति बावु मे ति कूत लोलाह छुये ॥
 कमि हीतु नीनस तँम्य् यॉर्यहय वेसिये ॥०॥

तँम्य् वौनुनम व्वथ खसव असमानस,
 म्वखतु ज़ॉन्यानस मे चूनि जरिमस ।
 परदु तँल्य् जलवु वुछिमस मे तँतिये ॥
 कमि हीतु नीनस तँम्य् यॉर्यहय वैसिये ॥०॥

नादनुय म्यान्यन तँम्य कन थोवनम,
 नचुनॉवनस वॉजिनस लोलु यारु बलनुय ।
 हुकु नियम'बिमु'बु वॉजिन लोलु गंगाये ॥
 कमि हीतु नीनस तँम्य् यॉर्यहय वैसिये ॥०॥

✱

तनु प्यठु प्रथ कोरि चोलुये

यनु प्यठु कूर द्रायि मालिनि गरे,
 तनु प्यठु प्रथ कोरि बस चोलुये
 प्यठयबानु चोलुनय पोंपुरचि लॅलिये ॥
 तनु प्यठु प्रथ कोरि चोलुये ॥०॥

शुर्य पानु बीमु तयु भयि सुत्य चालान,
 बडि पानु बॅड्य बॅड्य कार व्यतरावान ।
 द्दछि-द्दछि पछि लोल बॉगरान स्व छये ॥
 तनु प्यठु प्रथ कोरि चोलुये ॥०॥

यामथ यावनस छस फुलय नेरान,
तामथ गरु त्रावुनुक वेलु छुस वातान ।
सोरि सामान, ह्यथ डोलि प्यवान खसुनये ॥
तनु प्यठु प्रथ कोरि चोलुये ॥०॥

व्वपरन ताम छय लोल वरतावान,
नविसरु पनुनी ज्ञान करुनावान ।
ल्वकचारुचि बालु बाशि तस मशान छये ॥
तनु प्यठु प्रथ कोरि चोलुये ॥०॥

साज़ सिंगार कॅरिथ लालु रंजुनावान,
कायायि पनुनि हुंज माया छे वुछान ।
तोति कनन छस गछान होशदार नये ॥
तनु प्यठु प्रथ कोरि चोलुये ॥०॥

कॉन्सि लालु नेरान अडुवति छुये,
कांह गछान डम्बि वेरि कलु क्रेरे ।
गुदरुनु छे हेछान छु तस व्यतरुनये ॥
तनु प्यठु प्रथ कोरि चोलुये ॥०॥

ल्वकचारु बूज्युमुत्पु ऑसिम व्यदाख,
बेयि ललु माजि हुंदी ललु वाख ।

चाख लॅगिम ललदेदि बाख छॅट मेतिये ॥
तनु प्यठु प्रथ कोरि चोलुये ॥०॥

यसहय व्वदुरस आसि नार वुहुवुनये,
तस बेनि क्याह करि बोनि शोहजार ।
‘बिमलायि’ल्वलि ललुवुन छु हुनु द्रुनये ॥
तनु प्यठु प्रथ कोरि चोलुये ॥०॥

यन प्यठु कूर द्रायि मालिनि गरे,
तनु प्यठु प्रथ कोरि बस चोलुये ॥०॥

✱

दया करतम दितम मे बॅखती

मे बाबा छम स्यठा सखती,
दया करतम दितम मे बॅखती ।
दयाये चानि बन्य्म मुक्ती ॥
दया करतम दितम मे बॅखती ॥०॥

मे मोनुम छस बु कर्म हीनय,
तवय सुमरनि छमनु वथ यिवानुय ।

चु अथु वथ दिम अदु चल्थ्म सखती ॥
दया करतम दितम मे बॅखती ॥०॥

मे मा छुम कैह ति येति डेरस,
बनावतम त्रख मे चुय सेरस ।
मे बर छैन्य् बानु छिम छॅर्य् तु वॅथी ॥
दया करतम दितम मे बॅखती ॥०॥

मे छम केवल अख चाँनी आश,
अनान नेत्रन अन्य्न् छुख गाश ।
प्रकाशि पनुनि गाशिरान अनिगॅटी ॥
दया करतम दितम मे बॅखती ॥०॥

जवॉनी छम पेमुच सूरिथ,
न्युमुत ज़न छुख मे जुवुय मूरिथ ।
दितम होश कासतम बे ह्यकती ॥
दया करतम दितम मे बॅखती ॥०॥

मे मनुचे तारु वुज़नावतम,
तु लोलु सेतारु ग्रज़नावतम ।
बु येछि पछि कीर्तन करय चाँनी ॥
दया करतम दितम मे बॅखती ॥०॥

बु पादन हुंज़ गर्द चॉन्य् बस,
मलय शेरस तु यथ बदनस ।
बु लागय पोश च़ेय लवुहँती ॥
दया करतम दितम मे बँखती ॥०॥

चु छुख साई नाथ हे साई,
कृष्ण चुय राम चुय साई ।
बु चानि श्वब दर्शनु प्राव गँती ॥
दया करतम दितम मे बँखती ॥०॥

मे साई दिजि सोबूरुक दान,
बु च़ालय अदु खस्यम नतु हान ।
दि ताबुक लाभ मे सबरु सँब्ज़ी ॥
दया करतम दितम मे बँखती ॥०॥

चु पानय वतुहावुक मे बनतम,
मे शिरडी वातुनुक नाद सोज़तम ।
मनस तेलि यियिहेम बँड तृप्ती ॥
दया करतम दितम मे बँखती ॥०॥

सफर क्रूठ छुम चु छोटरावतम,
दितम पय वातु किथु हैछिनावतम ।

अथु रँटिथ पकुनाव मे वति वती ॥
दया करतम दितम मे बँखती ॥०॥

शौंगिथ बेह्यस छस ह्यसु फिरसौं,
मे आदि प्रभातस वुज़ुनावसौं ।
दितम पनुनि रागुची मँस्ती ॥
दया करतम दितम मे बँखती ॥०॥

बु सूहम सू सोदरस छांटु वायि हौं,
भजन चोन न्यथ सुबु शामु करहौं ।
पूज़ि बो लागुहय पोशि फोती ॥
दया करतम दितम मे बँखती ॥०॥

दितम द्रडता बु स्वरु चोन नाव
मे पानुसुय अँन्ध् अँन्ध् चुय नचुनाव,
मनि बसावतु शिरडी हुंज़ बँसती ॥
दया करतम दितम मे बँखती ॥०॥

मे 'बिमलायि' ज़पुनाव साईं साईं,
स्वरुनाव साईं राम, शाम साईं ।
नाव चोन भवसरस बनि मे कशती
दया करतम दितम मे बँखती ॥०॥

वनतम वुनि कूत च़ालुन छुम

हता भगवानु पानय मे वनतम,
 वुनि कूत च़ालुन छुम ।
 बु कोताह वनय, बु क्याह वनय,
 प्यतरुम कूत, कूत प्यतरुन छुम ॥
 वनतम वुनि कूत च़ालुन छुम ॥०॥

प्यतरुन कूत प्योम, व्यतरुन कूत प्योम,
 कुनिस पानस कूत च़ालुन प्योम ।
 ओश कोताह मे श्रोपरावुन छुम ॥
 वनतम वुनि कूत च़ालुन छुम ॥०॥

कुन पान ह्यथ सोज़ोथस योर,
 नुँख्य तुलुम रिशतन हुंद गोब बोर ।
 बौरखरस गोब बोर सारुन छुम ॥
 वनतम वुनि कूत च़ालुन छुम ॥०॥

अँन्य दांदु सुंछ् पाँठ्य वुछान बु ओर योर,
 लमान अख छुम होर, अख छुम योर ।
 लटलटि कौरमुत ल्यठु लोर छुम ॥
 वनतम वुनि कूत च़ालुन छुम ॥०॥

चु वुछतु पानय यि क्याह गुदर्योम,
लूभुक यि क्युथ गॉज़्य् व्वदुराह प्योम ।
स्योद छुन थवान बस ओम ज़ोम छुम ॥
वनतम वुनि कूत च़ालुन छुम ॥०॥

यस सुत्य् छस करान येति सेज़ कथ,
सुय मे छुम कडान कथि मंज़ु क्वथ ।
वठ अख य्वहय ललनावुन छुम ॥
वनतम वुनि कूत च़ालुन छुम ॥०॥

संसारन येति बु कॅरनस कॅज
ज़न मे पोशि थरि सोंतय दुननलॅज ।
बोज़ि कुस मेय यि वेपरावुन छुम ॥
वनतम वुनि कूत च़ालुन छुम ॥०॥

च़ोलुम च़ोक तय मोदुर कोताह,
वह्य कथ म्वख्तस गोम फोताह ।
कूत काल यिय मे व्य़च़ारुन छुम ॥
वनतम वुनि कूत च़ालुन छुम ॥०॥

हर्दिनि छटि कैरिथ थोवुम डुबडास,

कॉन्सिय मा येति कोरनम पास ।

वनतम दर्दिल कुस व्यंदुन छुम ॥

वनतम वुनि कूत चालुन छुम ॥०॥

हचर लद आंसुस मचराह आम,

व्वथ वुन बेह्वुन छस रटान पाम ।

दकु ख्यथ पान पकनावुन छुम ॥

वनतम वुनि कूत चालुन छुम ॥०॥

द्वख ललुनावान सोर्योम दम,

स्वख बुधि ड्युंठुम नु यिय छुम गम ।

तिमनुय सीनु बुधि दारुन छुम ॥

वनतम वुनि कूत चालुन छुम ॥०॥

कुनि खौरथस कोह तेंतालिस,

कुनि क्वलि छुन्यथस लॅजिस चॅकिस ।

रबि लैम्बि ल्युथ गोम शीशस गॅयि रुम ॥

वनतम वुनि कूत चालुन छुम ॥०॥

तुलु नारन कॅर्यनम नारु तैत्य्,
 अंग मा आख, छिम येति ओस्य् तैत्य् ।
 अज़लस हाठ फुटरावुन छुम ॥
 वनतम वुनि कूत च़ालुन छुम ॥०॥

लशि हचि सुत्य् ज़न द्युतहम नार,
 वनुहॉ कस कति ओसुम वार ।
 फेरुन नु कोठ फुटरावुन छुम ॥
 वनतम वुनि कूत च़ालुन छुम ॥०॥

बेहतम ब्रोंठ कनि सीनु हावय,
 पनुनुय बनुन बॉनु बॉनु बावय ।
 अख अख छ्वख गँज़रावुन छुम ॥
 वनतम वुनि कूत च़ालुन छुम ॥०॥

‘बिमलायि’लॅग्य्मत्य् छ्वख सीनस,
 साई नाथु कर शिहिज नज़राह तस ।
 लान्युन न्याय अँज़रावुन छुम ॥
 वनतम वुनि कूत च़ालुन छुम ॥०॥

लोलु नार

अँन्दरी वुहान लोलु नार छुमा-यारो,
छँटनम रेह अज़ न्यबर टाठि यारो ।
रटथ नालुमति पेयि मे शौहलथ यारो ॥
अँन्दरी वुहान लोलु नार छुमा यारो ॥०॥

मे रूदना छावुनय यावुनुन बहारा,
मे ओसुम ललुवुन हा चोनुय अमारा ।
कँडिथ मूल वक्तन तु त्रॉवनस हा यारो ॥
अँन्दरी वुहान लोलु नार छुमा यारो ॥०॥

वते प्यठ मे त्रॉविथ चोलुम चूरि चूरे,
थँविथ दूरिरुक ज्यतु ललुवुन मे शूरे ।
मे न्यूनम तुफानन डुविथ गरु हा यारो ॥
अँन्दरी वुहान लोलु नार छुमा यारो ॥०॥

यि क्युथ कर्म लोना ह्यथ बो आयस,
दप्योम मारु छ्वह छेपि चूरि द्रायस ।
थोवनम मे क्रेशुनुय फकथ बालि यारो ॥
अँन्दरी वुहान लोलु नार छुमा यारो ॥०॥

प्यव क्युथ यि तावन यावनस म्यॉनिस,
 य्वहय वठ छु गोमुत सीनस म्यॉनिस ।
 बु मुचरिथ हावुहय पनुन सीनु यारो ॥
 अँन्दरी वुहान लोलु नार छुमा यारो ॥०॥

च बेहतु अख दमहा मे निश बालु यारय,
 चु आदुनुक वादु यिनु मँशरख दुबारय ।
 च्यतस थाव म्योनुय य्वहय अख इशारो ॥
 अँन्दरी वुहान लोलु नार छुमा यारो ॥०॥

मे जिगरस वँथ्य्मुत्य् वुछ खंजर छिम,
 मे रातुच नेन्दुर गँज चिहान दोह गछान छिम ।
 बु प्रारान छसय बोज़ु कर चोन गुफतारो ॥
 अँन्दरी वुहान लोलु नार छुमा यारो ॥०॥

यितम सालु बुय प्यालु लोलुक्य च़े बरुहय,
 चावुहथ मौदुर मस बर्य् बँर्य् बु थवुहय ।
 थवुहय नु पथ कुन व्वन्य् कांह मलालो ॥
 अँन्दरी वुहान लोलु नार छुमा यारो ॥०॥

‘ बिमर्स दाग जिगरस चानि दूरिरय लोग,
 यिना रोज़ि तस ति गम, पेयस वुम्बरियिनु द्रोग ।
 अवय बो गॅमुच छस वुफलवॉल्य् यारो ॥
 अँन्दरी वुहान लोलु नार छुमा यारो ॥० ॥

यिना रोज़ि छावनय यावुनुक बहारो,
 यिना दोह गछन कुंस्य् तु सोरि ल्वकुचारो ।
 करव कर सना ज्यूठ लोलु दर्बारो ॥
 अँन्दरी वुहान लोलु नार छुमा यारो ॥० ॥

✱

लोलु नार - २

लोल छुमय आमुत बर बुक् वेसिये,
 होल छुमय जिगरस बावु कस वेसिये ।
 यनु बो आयस यथ शहारस वेसिये ॥
 होल छुमय जिगरस बावु कस वेसिये ॥० ॥

होवथम नु रव्य ज़ांह करँथस बु फलवा,
 चूरि छेपि वुछिमय यावनस यि फुलय ।
 छावुनुक रूदुम हय तमना मे वेसिये ॥
 होल छुमय जिगरस बावु कस वेसिये ॥० ॥

फ़टु रोस वुछिहथ अकि लटि वेसिये ,
 कति थोवुन मोल तय मॉज म्यॉन्य वेसिये ।
 होवनम हय वक्तव यि तावन ति वेसिये ॥
 होल छुमय जिगरस बावु कस वेसिये ॥० ॥

शर्मदार श्रूच गरु हय बु त्रावुनॉवनस,
 कम्पन मंज़ वेंति प्यठ ज़न त्रावनस ।
 अथु गॅयि गरिची मंदोर वेसिये ॥
 होल छुमय जिगरस बावु कस वेसिये ॥० ॥

बुति बोवुलु चुति वोवुल गॉमुच,
 बु ति लाचार चुति नादान गॉमुच ।
 बेकस छसतु च़ालु कोताह बु वेसिये ॥
 होल छुमय जिगरस बावु कस वेसिये ॥० ॥

सोपनस मंज़ अज़ यॅचकॉल्य वुछिमख,
 न्यथुनोन र्वप पान गुलाब रोयि डींठमख ।

सनु लोगुम हय मे रॉत्य् रातस वैसिये ॥
होल छुमय जिगरस बावु कस वैसिये ॥०॥

मन छुम व्वतलान तय व्वडान हरदम,
अकि लटि चुय यितम दर्शुन हावतम ।
चेशमन मंज़ हय जायि शेरुहय बु वैसिये ॥
होल छुमय जिगरस बावु कस वैसिये ॥०॥

आसिहे त्युथ ददिर्लाह कांह तु वनिही,
बाविही लोलु म्यॉन्य शेछ वातुनाविही ।
पानु वॉन्य् बोस लोचरावुहव वैसिये ॥
होल छुमय जिगरस बावु कस वैसिये ॥०॥

कल चॉनी बिमस' बेकरार थावान,
मनु कुय सौकून तस छय रावुरावान ।
अँछ लजस दुरु प्रॉर्य् प्रॉरी वैसिये ॥
होल छुमय जिगरस बावु कस वैसिये ॥०॥

✱

पनन्य् कॅशीर

वॅथिव सखरिव अॅस्य् गरु कुन नेरव,
 अस्य् तॅत्य् छांडव पनुन कश्मीर ।
 मंजिमचु पनुने वतु बैयि गारव ॥
 अॅस्य् तॅत्य् छांडव पनुन कश्मीर ॥०॥

विजयेश्वर पंचांग अॅस्य् मुचरावव,
 रुत ह्रुव साथा अॅस्य् वुछिनावव ।
 रेषिमोल पनुनुय जॅगि अनुनावव ॥
 अॅस्य् तॅत्य् छांडव पनुन कश्मीर ॥०॥

नारु जॉल्य् मुत्य् गरु बैयि शेरव,
 लूटिमुत्य् खॉल्य् गरु बैयि बरुनावव ।
 नवि शौकु पननी गरु पॉरावव ॥
 अॅस्य् तॅत्य् छांडव पनुन कश्मीर ॥०॥

ज्यूठ तय कूठ वख अॅस्य् मॅशरावव,
 राम चॅट्टुन वनवास पथ कुन त्रावव ।
 शीतल नाथ, शिवालुन लोलु शोलुनावव ॥
 अॅस्य् तॅत्य् छांडव पनुन कश्मीर ॥०॥

कुनि माजि हुंघ् शुस्च ब्योन ब्योन द्रामुत्य्,
छँकरुनु आमत्य् कति कोत वॉत्यमुत्य ।
मालि हुंघ् मालि फॅल्य् अँस्य् सोम्बरावव ॥
अँस्य् तँत्य् छ्ण्डव पनुन कश्मीर ॥०॥

वादु येति कोरमुत तति याद थावव,
मिलुच्चार पनुनि पनुन यकुत रँछरावव ।
हिशरुचि नावि रँलिथ हमखूर वायव ॥
अँस्य् तँत्य् छ्ण्डव पनुन कश्मीर ॥०॥

सॉजिश यिमव कॅर अँस्य् गरि कडुनुच,
असि बे कौसूरन जलाय वतन करुनुच ।
वॉन्सन हुंज् ज्यनु जाय बेयि असि प्रावव ॥
अँस्य् तँत्य् छ्ण्डव पनुन कश्मीर ॥०॥

पनुने गरुच माय मा मँशरावव,
गरु वुजार गछुन मा अँस्य् ज़रुनावव ।
असली बाशंदु कडुन्य मा ज़रुनावव ॥
अँस्य् तँत्य् छ्ण्डव पनुन कश्मीर ॥०॥

‘बिमलायि’ र्वनि दामानु अँस्य् शेख,
 पोशिवॉर पनुनी छावुनि नेख ।
 ललि र्वपि रुचि हुंद बाग सगुनावव ॥
 अँस्य् तँय् छांडव पनुन कश्मीर ॥०॥

✱

सुय छुय टोठ शामस्वंदर म्योन

दीवकी तु वासदीवुन युस नुन्दबोन,
 सुय छुय टोठ शाम स्वंदर म्योन ।
 चोत्रबोज़ रुपु येम्य् द्युतुख दर्शोन ॥
 सुय छुय टोठ शामु स्वंदर म्योन ॥०॥

यशोदायि येम्य् म्वखु मंजु त्रवबुवन होव,
 येम्य् नन्दु बाब रास वुछिनोव ।
 गूपियव यस थँन्य् तु द्वद आपरोव ॥
 सुय छुय टोठ शामु स्वंदर म्योन ॥०॥

अर्जनस येम्य् दिव्य् दृष्टी दिचनय,
 ब्रह्मांड होवनस पानस मंजुय ।

अँछन छांफ काँसनस तु ज्ञान हेछिनोव ॥
सुय छुय टोठ शामु स्चंदर म्योन ॥०॥

अर्जन दीवस येम्य विकार रूप होव,
बँखत्यून येम्य बालु लीला होव ।
अर्जनुन रथु चलोव रथुबान बन्योव ॥
सुय छुय टोठ शामु स्चंदर म्योन ॥०॥

येम्य कर्म करुन फल छारुन नु हेछिनोव,
कर्मुक फल येम्य पानस अथि थोव ।
नेष्काम कर्म फल केम्य नसोँ प्रोव ॥
सुय छुय टोठ शामु स्चंदर म्योन ॥०॥

प्रह्लादस दोर येम्य नरसिंह अवतार,
मीरायि येम्य सर्फस बनोव पोशि हार ।
जहुर प्यालस अमरुथ येम्य बनोव ॥
सुय छुय टोठ शामु स्चंदर म्योन ॥०॥

कौली नाग येम्य कोरनय शांत,
दर्शुन होवनस तु काँसनस ब्रांथ ।
येम्य सुदामस महल ख्वपरि बनोव ॥
सुय छुय टोठ शामु स्चंदर म्योन ॥०॥

म्वरली शब्दु येम्य् गूपियन न्युव मन,
 राधायि सुत्प्युस रास छु गिंदन ।
 युस छु द्रोपदी हुंज़ लाज रछिवोन ॥
 सुय छुय टोठ शाम् स्चंदर म्योन ॥०॥

ऊदुव येम्य् ज्ञान धारनायि वोलनय,
 आत्म साक्षात्कार येम्य् करुन हेछिनोवनय ।
 यस वुछिथ शंकर पानु हर्षोव ॥
 सुय छुय टोठ शाम् स्चंदर म्योन ॥०॥

किसि प्यठ येम्य् खोर गोवर्दन,
 गौवन सायि कोरुथ चे गूर्य बालकन ।
 यि वुछिथ वरुण दीवताहति मंदुछोव ॥
 सुय छुय टोठ शाम् स्चंदर म्योन ॥०॥

युस छु कासुवुन ज्यनु मरनुक अतुगथ,
 युस हरवुन यम भय तय दुर्गथ ।
 सुय त्रुजगथ पाल छुय जगि रछिवोन ॥
 सुय छुय टोठ शाम् स्चंदर म्योन ॥०॥

‘बिमलायि’चावुनाव ज्ञानु अमर्यथ,
 चे वरॉय तस मा छि कॉन्सि हुंज सथ ।
 युस छुय दिलन हुंघ हाल ज्ञानुवोन ॥
 सुय छुय टोठ शामु स्चंदर म्योन ॥०॥

✱

जमानस लथ लॉयिथ चलव

(नज़म)

व्वथ जमानस अज़ लथ लॉयिथ चलव,
 व्वथ ज़ूनि तु तारुकन हुंद गिंदुन वुछव
 व्वथ शीनु आरुनय हुंद श्र्वन्य सदाह बोज़व
 व्वथ कुकिलि कोसतूर्य बूल्य् बोज़व कनव
 व्वथ शमहस पोंपूर्य सुंघ गथ करुन्य् वुछव
 बोम्बरस यॅम्बरज़लि हुंदिस लोलस सनव
 पोशिनूल सुंदिस बोलबोशस सज़व
 बुलबुल सुंदिस पिचिनस हज़ तुलव
 व्वथ जमानस अज़ लथ लॉयिथ चलव ॥०॥

विगिनि वनवुन तु ग्यवुन अज़ अँस्य् बोज़व,
 आरुवलि हुंघ नालु बोज़व अँस्य् कनव,
 व्वय ज़मानस अज़ लथ लॉयिथ च़लव
 संसार भ्रम मॉनिथ व्वथ अँस्य् च़लव
 वुडुवन्य्न जानावारन सुत्य रलव
 ताज़ु पोशन ताज़ु व्यूराह अज़ तुलव
 पनुन्यन अन्य्न अछन गाशाह अनव
 आरुबल यारुबलु श्रान द्यान करव
 सूंत्य् शेहजारा छावव अदु अँस्य् फ़वलव
 व्वथ ज़मानस अज़ लथ लॉयिथ च़लव ॥०॥

आलुच़ त्रॉविथ वुद्यूगाह करव,
 आत्म द्यान ज्ञानु औंकारा लबव
 लालु गुलि लालस लँल्य् लँल्य् करव
 रुतुय रुत करव, रुतुय रुत सरव
 रुच़रुक पाठा सुब शाम परव
 ज़गतस रुच़रुक व्वथ अँस्य् दरव
 पनुन्य्न तु परद्यन लोलाह बरव
 'बिमलायि' हुंज़ि रज़ि अँस्य्ति थफ करव
 व्वथ ज़मानस अज़ लथ लॉयिथ च़लव ॥०॥

मालिन्यन छम शॉद्य

गुल फोल्य् वारि तय सब्जी द्रायि,
अज़हय मालिन्यन मे शॉदी आयि ।
अंग ऑशनाव आयि अमिचे रायि ॥
मालिन्यन शॉद्यानस मुबारक ॥०॥

कॉसिद तति प्यठु शैछ ह्यथ आव,
वोननम रुतुये साथ हय द्राव ।
कॉसिद लगुयो च़ेय बु बलायि ॥
शादि शैछ अननस मुबारक ॥०॥

यैज़मन बाय सॉन्य् दपने द्रायि,
अतुगथ नून च्वचि ह्यथ तोरु आयि ।
अटुहॅरिस मारान छय क्याह ग्रायि ॥
दपनि नेरनस छुस मुबारक ॥०॥

प्वफु जिगुरा छायक करान आयि,
मायि ऑडुरॉवुन मॉनज़ाह जान ।
ज़ंगि तस म्वहरु दिचु यैज़मन बायि ॥
मॉन्ज़ लागुनस छुस मुबारक ॥०॥

यँज़मन बॉयी रोज़ मय छा़यि,
 मायि चानि पँछय हय आमृत्य् छिय ।
 आँही सूज़नय माजि शारिकायि ॥
 इसबन्द ज़ालुनस मुबारक ॥०॥

वॉर्य महाराज़स पॉरनुच आयि,
 नेरि वरनि पनुनि बॉर्ययाये सुय ।
 पोश तति लागुनस पोशि पूज़ायि ॥
 अथवासस छुस मुबारक ॥०॥

डींशिथ यि बेनि हुंद फवलुवुन बाग,
 मेहय व्वलुसनु आव दिलकुय राग ।
 दिल छुम मै करान ज़ोर दुबरायि ॥
 बेनि टाठि वॉतिन अज़ मुबारक ॥०॥

छय नच़ान 'बिमला' चाने मायि,
 चाने रायि छेनु कुनि ति व्यच़ान ।
 टेक्य् तालु लॉगिथ बजि यछायि ॥
 शूब यिनुसय छुय मुबारक ॥०॥

गुल फोल्य् वारि तु सब्जी द्रायि,
अज़हय मालिन्य् मे शॉदी आयि ।
अंग ऑशनाव आयि चाने रायि ॥
मालिन्य् शॉद्यानस मुबारक ॥०॥

✱

मुबारक कैस्यतव सॉरीये

लालस कैस्यतव प्यालु बरदॉरी,
मुबारक कैस्यतोस सॉरीये ।
मुबारक कैस्यतोस डेकि म्यूठ कैस्यतोस ॥
मुबारक कैस्यतोस सॉरीये ॥०॥

वेलुवोत सालुरव कैर तयॉरी,
बराँत्य् आयि सॅमिथुय सॉरीये ।
कारन मंज़ सवार सपदेयि सॉरी ॥
मुबारक कैस्यतोस सॉरीये ॥०॥

चूरि कति रूज़िथ छख च वनहॉरी,
बोज़तय कन दॉस्य दॉरीये ।

बागस फोलियय गुलि अनॉरी ॥
मुबारक कॅस्यतोस सॉरीये ॥०॥

यॅज़मन बॉयी हतय अछिदॉरी,
बाग चोन गाह छु त्रावॉनीये ।
सायि प्यठ थॅव्यज्यख हय रानि ब्रॉरी ॥
मुबारक कॅस्यतोस सॉरीये ॥०॥

लोलुसान मॉन्ज़ाह लॉगवि अथुनय,
मन नुय लॉग्यतोस शूभेदार ।
स्वनुहॉर सोज़्यस क्वंग चॉस्य चॉरी ॥
मुबारक कॅस्यतोस सॉरीये ॥०॥

शूबिदार पॅख्यदर डखि छिस सॉरी,
ख्वशबाश दिलदार सॉरी छिस ।
चूरि चूरि थॅक्यहय ओश हॉस्य हॉरी ॥
मुबारक कॅस्यतोस सॉरीये ॥०॥

पूजायि कित्य् छिय पोश चॉस्य चॉरी,
व्यनु पोश स्वनु पोश पूज़ि लागोस ।

बेनिटाठि सूज़िय पोशि अंबॉरी ॥
मुबारक कॅस्यतोस सॉरीये ॥०॥

‘बिमलायि’ रॅट्य हय मुर दॉस्य दॉरी,
दिचुनस ग्वडु अनुवॉरीये ।
यिथ्य् शाँद्यानु येति रूज्यतन जॉरी ॥
मुबारक कॅस्यतोस सॉरीये ॥०॥

✱

मे पगुहुच छे आशा (नज़्म)

मे पगुहुच छे आशा, पगाह तोशि दुनिया,
मे पगुहुच छे आशा, पहाग प्रज़लि सिरियाह ।
मे पगुहुच छे आशा, पगाह नेरि तमनाह ॥
मे पगुहुच छे आशा, पगाह तोशि दुनिया ॥०॥

पगाह नेरि सॉनिस बागस पोशि फुलया,
पगाह नेरि बंजर ज़मीनस ति फसलाह ।
ज्यवन हॉन्नुनय ताम शुरी शुस्य वाहवाह ॥
मे पगुहुच छे आशा, पगाह तोशि दुनिया ॥०॥

पगाह गेवि कोस्तूर कम गीत सुबहस,
 पगाह बेहे बुलबुल बेयि सानि डबि प्यठ ।
 पगाह पोशि नूल हावि नौवुय नौव तमाशा ॥
 मे पगुहच छे आशा, पगाह तोशि दुनिया ॥०॥

पगाह बेयि रोज़न स्वमि डन्जि गरुबार,
 पगाह ब्योन नेरी नु माजि निशि परिवार ।
 पगाह राम तु लक्षमण करन अथुवासा ॥
 मे पगुहच छे आशा, पगाह तोशि दुनिया ॥०॥

पगाह बोय बॉयिस आसिय नु दुशमन,
 पगाह बॉय बॉयी पुशि पनाह रोज़ान ।
 पगाह प्रज़लि सतुकुय च़वापॉर्य नौव गाह ॥
 मे पगुहच छे आशा, पगाह तोशि दुनिया ॥०॥

पगाह गछि भय दूर तु न्यर्भय रोज़व,
 पगाह फिकिरु ह्यन पोत तु ख्वशहाल सपदव ।
 पगाह बेडि फुटिथ प्यन तु कडव अदुकाडाह ॥
 मे पगुहच छे आशा, पगाह तोशि दुनिया ॥०॥

पगाह लोल व्वसि यियि लायि लोलु नादाह,
 पगाह बोस लोच़रव करव फ़ेरियादा ।

दिमव अख अँकिस पानु वॉन्य् पूरदादाह ॥
मे पगुहुच छे आशा, पगाह तोशि दुनिया ॥०॥

पगाह सारिनुय पाप तय शाप म्वकलन,
पगाह लूख सॉरी येति स्वख ति बूगन ।
पगाह ख्वनि मंज़ फवलि बिमस गुलज़ाराह ॥
मे पगुहुच छे आशा, पगाह तोशि दुनिया ॥०॥

पगाह नेरि असि शर तु अर्मान नेरन,
पगाह फ्वलि बबुर मुशिकुन्य् अदुफर फेरन ।
पगाह वज़ि आनन्दु कुय सोज़ साज़ाह ॥
मे पगुहुच छे आशा, पगाह तोशि दुनिया ॥०॥

पगाह मा येति रोज़ि लाचार कांह अख,
पगाह आसि मा येति नादार कांह अख ।
पगाह बेकसन लगि मा जांह ति फाकाह ॥
मे पगुहुच छे आशा, पगाह तोशि दुनिया ॥०॥

क्वतेकाव यस ओस कडि सुय वाशाह,
अथु दारुनस युस ओस लबि सु राशाह ।
अनि गोट पोत चलि फ्वलि नौव गाशाह ॥
मे पगुहुच छे आशा, पगाह तोशि दुनिया ॥०॥

मे पगुहच छे आशा - ॥

मे पगुहच छे आशा पगाह पोशि दुनिया,
 मे पगुहच छे आशा पगाह चलि ग्रहना ।
 मे पगुहच छे आशा, पगाह फवलि नूराह ॥
 मे पगुहच छे आशा, पगाह पोशि दुनिया ॥० ॥

छे आरुवल बिचौराह बरहम गॉमच,
 छु तस चूरि चोलमुत त्रॉविथ सुदिलबर ।
 पगाह यियि सु वापस नेर्यस अर्मानाह ॥
 मे पगुहच छे आशा, पगाह पोशि दुनिया ॥० ॥

पगाह नेरि शीरिथ तु परिथ स्वज़ूनाह,
 पगाह त्रावि गाह मारकन मंज़ यिज़ूनाह ।
 पगाह पामु म्वकलन नोन नेरि चॅन्दराह ॥
 मे पगुहच छे आशा, पगाह पोशि दुनिया ॥० ॥

पुणिम हुंद चॅन्द्रम छु क्याह शोलु मारान,
 छु अंधुकार तु अनिगोट जगतस मिटावान ।
 छु अंधुकार खूंखार सुह ज़न ग्रज़नाह ॥
 मे पगुहच छे आशा, पगाह पोशि दुनिया ॥० ॥

छु अंधकार वालान अन्यर नूरि चेशमन,
 छु होशी चलान ह्यथ कमन होशदारन ।
 छु बदमस्त करान बस य्वहय दोसदारन ॥
 मे पगुहुच छे आशा, पगाह पोशि दुनिया ॥०॥

यि बिचोर इन्सान ब्रोंह कुन पकान छुय,
 पगुहुचे आशि पेय पेय व्वथान छुय ।
 मनस मंज़ क्याहताम सु छुय ललुनावान ॥
 मे पगुहुच छे आशा, पगाह पोशि दुनिया ॥०॥

‘बिमला’ति वछि वॉलिंजि यी त्वहि वनान छय,
 पॅकिव ब्रोंठ-ब्रोंठ तोह्य तु ह्यमथ मु हॉरिव ।
 पगाह आसि शांदार, पगाह आसि सब्ज़ार ॥
 मे पगुहुच छे आशा, पगाह पोशि दुनिया ॥०॥

पगाह यिन बुलबुल बैयि सानि डबि प्यठ
 पगाह शोलु मारन बैयि सॉन्य् गरबार ।
 पगाह यिन पॉरावनु असि कित्य् जॉन्पानु ।
 पगाह अस्य् गछव लोलु पनुनिस शहारस ।
 पगाह नालुमति अँस्य् रटोन टोठ गरु प्रोन.
 मे पगुहुच छे आशा, पगाह पोशि दुनिया ॥०॥

चालुन प्योम

यिहय छुय वैसिये तावुननु दुनिया,
 तावन तु तोवून चालुन प्योम ।
 अँम्य लोलु नारन वारु वारु ज़ॉजनस,
 आमु ताव कोताह मे च़ालुन प्योम ।
 यिहय छुय वैसिये तावुननु दुनियाह ॥
 तावन तु तोवून चालुन प्योम ॥०॥

याम लालु आमय गुरु म्योन सालय,
 साज़ कॅरिथ मैति मॉल हावुन प्योम,
 पानस ब्वछि नय तोति प्योम ख्यावुन ।
 रसु रसु ख्योवुम तय चोवुम रंजनोवुम ।
 यिहय छुय वैसिये तावुननु दुनियाह ॥
 तावन तु तोवून चालुन प्योम ॥०॥

यावुन द्रामहय छल कॅरिथय,
 तिय नय यावनरॉय ज़ोनुम,
 हारस श्रावनस पोहस तु मागस ।
 ब्वछि होत लालु ख्यावुनावुन प्योम ।
 यिहय छुय वैसिये तावुननु दुनियाह ॥
 तावन तु तोवून चालुन प्योम ॥०॥

वैसिये यि हय छुय अपजुय संसार,
 व्वटु छुम तुलुनावान यि छु बॉज्यगार,
 लालन रज़ रॅटुम पनुनिस अथस मंज़ ।
 अँन्ध् अँन्ध् सु हय नचुनावुन प्योम ।
 यिहय छुय वैसिये तावुनुन दुनियाह ॥
 तावन तु तोवूनु च़ालुन प्योम ॥०॥

ब्योन ब्योन कर्मलोनु ह्यथ योर आमुत्प,
 तथु नय कॉन्सि अख प्यूत ति बदलोव,
 गरॅय बैन्ध् वुछमय अर्शस येति खसान ।
 राजकुमार फर्शस डुवुनावुन प्योम ।
 यिहय छुय वैसिये तावुनुन दुनियाह ॥
 तावन तु तोवूनु च़ालुन प्योम ॥०॥

असार संसार सरु मा असि कोर,
 असि मा फिकिरि तोर अमिकुय राज़,
 बिमु मा अथ सनेयि, अथ नु बुनियाद ।
 ज़ॉन्ध्कॉरी खॉतरु व्वन्ध् सनुन प्योम ।
 यिहय छुय वैसिये तावुनुन दुनियाह ॥
 तावन तु तोवूनु च़ालुन प्योम ॥०॥

सुय येमि भवसरु तरे अपोर

होशुक पोश यस सुलि गरि फ्वले,
 रामु रामु श्रुरामु द्वहदिश स्वरे ।
 सुय येमि भवसरु नावि तारु तरे ।
 होशुक पोश यस सुलि गरि फ्वले ॥
 सुय येमि भवसरु तरे अपोर ॥०॥

सतुचि नावि वॅसिथ श्वद च्यथ थवे,
 मोह अन्धकारुच कासि युस छांफ ।
 अज्ञानु शोरस सूर युस करे ।
 होशुक पोश यस सुलि गरि फ्वले ॥
 सुय येमि भवसरु तरे अपोर ॥०॥

पर व्वपुकारस युस लोल बरे,
 अँन्दर्युम लोलाह युस न्यबर छटे ।
 श्रु रामु धाम वाति त्रैटि वुजुंमले ।
 होशुक पोश यस सुलि गरि फ्वले ॥
 सुय येमि भवसरु तरे अपोर ॥०॥

युस ब्वद पनुनी होशि ह्यसु थवे,
 येन्द्रेय शेथरन काँद युस करे ।

पान सुय म्वकलावि दिहि भ्रमु निशे ।
 होशुक पोश यस सुलि गरि फ्वले ॥
 सुय येमि भवसुर तरे अपोर ॥०॥

अनिगटि नेहेगटि ध्यान युस दरे,
 न्यथ प्रभातस श्रुरामु नाव स्वरे ।
 संगलाख मन युस ति कुमलाव ।
 होशुक पोश यस सुलि गरि फ्वले ॥
 सुय येमि भवसुर तरे अपोर ॥०॥

ज्ञानकिस वानस तौस्य युस मुचरे
 तस जानानस गूर गूर करे ।
 ज्यनु मरनुक सिर युस च्यतस थवे ।
 होशुक पोश यस सुलि गरि फ्वले ॥
 सुय येमि भवसुर तरे अपोर ॥०॥

सोहम शब्दस युस प्रय बरे,
 रुम रुम रामु रामु स्मरण करे ।
 लछिनोंविस गछिकुठि प्रंग वथरे ।
 होशुक पोश यस सुलि गरि फ्वले ॥
 सुय येमि भवसुर तरे अपोर ॥०॥

‘बिम’ येलि पज़ि मनु दयि दयि करे,
 एकाग्र मनु स्वय दरे दान ।
 दयि पोशि पादन पूजाह करे ।
 होशुक पोश यस सुलि गरि फ्वले ॥
 सुय येमि भवसरु तरे अपोर ॥०॥

✱

दिलुक दोद (नज़्म)

बुधि आयम सख तेज़ वावु ग्रायाह,
 मूल नीनम प्रॉटिथ
 दुब फिरनस कोरनम तलुक प्यठ
 प्वख तय कारस सोखतु मे गोम,
 हटि कुय म्वख्तहार,
 वॅस्य् प्योम फलि फलि,
 ओमकिस पनुसुय वुरमुत्य् ऑसिम,
 येछि हुंज़ि पछि हुंज़ि त्रौप्य् सुचुने,
 वह्य क्याह वनु तॅथ्य गंड गोम ड्यौल,
 छेकरनु आयम लबु कति व्वन्य्
 यी गोम पानस ती वनु कस तय
 कुन्य् जॅन्य् छस तय
 बोज़्य्म कुस

✱

बावुहॉ यस बय सुछु पानु मस्तय,
 तस नय छु ह्यस होश
 तस नय छु श्रेह कांह
 तँस्य् मँन्दलुहुनिस बावय क्याह
 वावस लँजमुच छस बो दावस
 यिरुवुन्य् नाव छमनय यीरय
 हमतुल अडवति वीर्य
 अडवति नाव छम
 पानु अडवति छस
 अमि वावु मालि मे
 ग्युन्दनम फुटबालि
 ठिल मे कँडनम
 कति कोर वॉचुस
 न छु कुनि गरु तय न छु कुनि गाठ
 फ्रँट्य छस गॉमुच
 छस त्रँहरेमुच
 दम फुट्य गॉमुच
 यी गोम पानस ती बावु कसतय
 दोह लोग दरि मे
 सिर्ययि गोम अस्तस

वुन्य् वुन्य् ओसुम क्युथ ह्युव बहारा
 वारिल्य् ज़न बुलबुल थपि न्यूम
 गॉन्टि हुन्ट् पॉठ्य दिचुन
 मति सोंतु बोनि ज़न
 पन प्योम हँस्य हँस्य
 ज़न हर्द छटि मॉर थाह
 गोम प्राह
 सख खूचुस व्यसरेयस
 अँन्दरिम शाह गोम अँन्दरी पानस
 थरि येलि लँज दुनन
 नन्गु बुय सपज़ुस
 कॉन्सि मा मेय प्यठ
 रछ आव आर
 क्रख गँयि हुत्क् किन्य्
 इन्साफुय रोव

*

पान पनुन छुम बासान बेबस
 आब अँछन मा रूद इन्सानन
 वुठ छिम फोरान, हाल तिम वनुहन
 बुलबुल्य् मे फोरान, व्वंदु बावुहन
 आरुवलि, मसवलि बेयि तस यँमँबरज़लि
 हालु होश रोवमुत

पशान छि सारेय, ज़न छख अनुस्यय
 पोशिनूल बैस्य बैस्य प्याल तति चथ गव
 वनतय वैस्य बिमुन' याद कुस पाव्यस
 तस डॅज पॉस्य ज्ञान
 तस गॅज स्मरथ

✱

माजि कॅशीरि आलव

कॉचाह द्रायख संगदिल मॉजय, -
 ज़ांह नय पतु च़ेय खबरय गेच़थम ।
 ज़ांह नय द्युतथम तनु पोत आलव ॥
 ज़ांह नय आलवन कन च़ेय दोरथम ॥
 ज़ामुच़ ऑसुस च़ेय बु मॉजय ॥०॥

च़ेय नॅख्य पॅख्य माल्युन वॉस्यव ओसुम,
 गरु ओसुम मातामाल तॅत्य ओसुम ।
 हंगु मंगु माल्युन वॉस्युव न्यूहम ॥
 आलवन कन चु दारतम मे मॉजय ॥०॥

अडवति कॅडहस सनु छुम लोगमुत,
छावुनय रूदम पनुन गरुबार ।
तचि सैकि छुनिनम स्यख लोलस ज़न ॥
बोनि शोहजारा सोज़तम मॉजय ॥०॥

मै हय छुय आमुत सख लोल मॉजय,
नालुमति रटुहथ मनि मंज़ थवुहथ ।
या दितु ओर नाद नतु योरु बोज़तम ॥
लोलुक्य आलव बोज़तम मॉजय ॥०॥

ज़ंगु त्रैयि मॉलिनि ज़ंग ह्यथ नेरुन,
रामुचॅन्दुन तय शिवालुन दोरुन ।
सोंतु नवरैहे थाल बरुन,बुथ वुछनावुन ॥
रुत रुत ऑसुख कांछान मॉजय ॥०॥

गण च्वदुश वातुन गणपतयारस,
लॅङ्य तु पूर्य बॉगरावुनि गुन मॅहलस ।
कति सु गणपतयार ज़ीठ्य यॉर मॉजय ॥
आलुवन दारतय कन असि मॉजय ॥०॥

ज़ेठु ऑठम दोह अनि गटि नेरुन,
तुलमुलि आंगुन माजि शोलुनावुन ।

कंद तु द्वद, व्यनु पोश नागस बावन्य ॥
अर्मान दिलुकुय कडतम मॉजय ॥०॥

ब्रसवारि ज़ीठ्यार ज़िष्टायि वातुन,
चोट तय तेंहर माजि ज़िष्टायि खारुन ।
बटुवारि शारिकायि गछुन पबत मॉजय ॥
हार च्वदुश ख्रुव गछुन ज़ालायि मॉजय ॥०॥

श्रावण पुणिम खसुन शंकराचारस,
अमरनाथ अमरेश्वरस शिवधामस ।
ब्यल तय व्यन पोश शिवजियस लागुन्य ॥
बायन बेनि गंडनावुनि राखी मॉजय ॥०॥

शीतल नाथुन हवनु क्वंड श्रूचलिवनावुन,
नदुस्य म्वंजि लूचि हलवाय बनावनान्य ।
पोशिगोंछ् शैवआश्रम यिशिबॅर निन्य मॉजय ॥
डलुकी पम्पोश शंकरस लागुन्य मॉजय ॥०॥

प्रभातस वेंथिथु द्याना दॅरिथुय,
खरुयार बबु भगवानुआश्रम वातुन ।
धोनि हुंद भस्मा ड्यकस मलनावुन ॥
स्वख तय आनन्द प्रावुन मॉजय ॥०॥

कोताह वोनमय वुन्युकताम मॉजय,
 सिलु छुम वॉलिंजि पछकरि मॉजय ।
 'बिमलायि' लॉग्यज़िन वोरुचय मॉजय ॥
 कौंचाह द्रायख संगदिल मॉजय ॥० ॥
 पतुनय हेचथमनु खबरुय मॉजय ।
 आलुवन दारतमि कन म्योन्य मॉजय ॥० ॥

साई नाथु मो रोज़ दूर दूर

फोल मै लोलु बागस पोशि दूर,
 साई नाथु मो रोज़ दूर दूर,
 दूरिरन मै चॉनी कोरनम सूर ॥
 साई नाथु, मो रोज़ दूर दूर ॥० ॥

प्रारान रूज़सय राथ तु दोह,
 छारान मै हारस सपदुम पोह ।
 होवथम मै दर्शुन फोलमानूर
 साई नाथु, मो रोज़ दूर दूर ॥० ॥

चानि डेडि तल यनय आयि सय,
 लोलस यॅचकॉल्य् हुबाब द्राम ।
 ललुवथ ख्वनि करय गूर गूर ॥
 साई नाथु, मो रोज़ दूर दूर ॥०॥

वुछिमय थलि थलि च़ेय म्वखस,
 तम्बुलॉवथस अथ प्रॅनिस र्वयस ।
 लोलु दाम चोवथस पूर पूर ॥
 साई नाथु, मो रोज़ दूर दूर ॥०॥

लोसम मे अँछ प्रॉस्य प्रॉस्य च़ेय,
 कोसम वतन वथुरय बु च़ेय ।
 फोलमा बुथिस मेय नवि नोव नूर
 साई नाथु, मो रोज़ दूर दूर ॥०॥

छुख चुय अज्ञानस नाश करान,
 ज्ञान तॉस्य बॅखत्यून खोलुनावान ।
 मे छुतुथ मुरिसुय च़ेय सोबूर ॥
 साई नाथु, मो रोज़ दूर दूर ॥०॥

बॅखति बाव ह्यथ अथि आयिसय,
 शक्ती दिम अन्दवातु नावनसुय ।

ह्यस होश दिज्युम मे पूरि पूर ॥
साई नाथ, मो रोज़ दूर दूर ॥०॥

वुछिमय समाधि चानि थलि थले,
ब्रोंठुकनि आयम चॉन्य् काह वचन ।
कांह छा सु यस नु गव वचन पूर ॥
साई नाथ, मो रोज़ दूर दूर ॥०॥

रुचि कामि तुलथम दस पानु च़ेय,
वातनॉवथस आश्रमस च़े पानय ।
आभास सतुक'बिमन'च्यून पूर ॥
साई नाथ, मो रोज़ दूर दूर ॥०॥

फोल मे लोलु बागस पोशि दूर,
साई नाथ मो रोज़ दूर दूर, ॥०॥

दिलबरो कोत चोलहमो

अडफलि यावनय करया बैयि सालो,
 हा व्वलो दिलबरो कोत चोलहमो ।
 शर थोवुथ जिगरस छेवुम नु लालो ॥
 हा व्वलो दिलबरो कोत चोलहमो ॥०॥

नॉल्य् येलि लॉगिम जामु ज़रकॉरी,
 हटि मेय गोन्डमय म्वखतय हार ।
 अँतुलासु क्यमखाबु नर्यन नॅर्यवॉरी ॥
 हा व्वलो दिलबरो कोत चोलहमो ॥०॥

कनुनुय लॉगिम स्वनु कनुवॉली,
 श्र्वनिदार र्वनि ग्वडु कॉरीये ।
 सेंजि सुमि बरतम व्वन्य् बैयि गुलालो ॥
 हा व्वलो दिलबरो कोत चोलहमो ॥०॥

यावनस बरजस्तु फुलुया लेंजिमो,
 लंजि लंजि द्रायमो मुशक अदुफर,
 हा गुलो अडुवति त्रॉव्यज्यम नु बुलबुलो ॥
 हा व्वलो दिलबरो कोत चोलहमो ॥०॥

बोम्बरो यँम्बरज़ल मायि प्रारान छय,
पोशन गौँद्यु तु मालु करान छय ।
प्रारान छसय च़ेय अछिवलु सोलो ॥
हा व्वलो दिलबरो कोत च़ोलहमो ॥०॥

सोपनस मंज़ यिथ रंगुकुठ्य हौँव्यथम,
ताज़ु ताज़ु ख्यौँवथम राज़ु वाज़वान ।
यितु अकिलटि ख्यावुहथ बु रसगुलो ॥
हा व्वलो दिलबरो कोत च़ोलहमो ॥०॥

बिम् छय वतु वुछान म्यानि बुल्बुलो,
दु मे अँछ लजम छुय नु इन्साफ ।
पँतिमि प्यारि र्वय हावु मोयि रौँबुलो ॥
हा व्वलो दिलबरो कोत च़ोलहमो ॥०॥

फेशिल महारेन्य्

सोथं येलि आव माजि मे कनन कोरनम,
 वौननम च़ेहय छय पगाह मॉन्ज़िराथ,
 व्यसु पनुनि आयम तु शोकु पॉरॉवहस ,
 अथु तय मॉन्ज़ि नम शुबरॉव्य्हम ।
 नॅव्य् नॅव्य् वरदन नॉल्य् लॉगिहम तिमव ॥
 व्वला म्यानि दिलबरो छमनो मशान माय ॥०॥

ल्वलि ल्वलि ललुवमुत ओसुम ल्वकुचारु प्यठु,
 अकि दोहॅ यियि महाराज़ु बॅनिथ आफताब,
 शीरिथ तु पुरिथ साज़ु सिंगार कॅरिथुय,
 रंगु कुठि प्रंगस प्यठ थवहस बेहनॉविथ ।
 यिसबंद तु वुद ज़ोलुम व्यसव तु सॅदरव ॥
 व्वला म्यानि दिलबरो छमनो मशान माय ॥०॥

लोलु चानि जामु व्वज़ल्य् पुर्यमुत्य छिम,
 नूरि नूरानु अज़ मे व्वलुसॅनस आव,
 तान्यथ यि क्रख गॅयि सुनय यियि महाराज़ु,
 सुहय च़ोल कोतताम छुनय कॉन्सि पय

यि बूज़िथ मे नूरे नूर दोदमा दिलबरो ॥
व्वला म्यानि दिलबरो छमनो मशान माय ॥०॥

दोहें अकि वन्योथम छख पुणिम हुंज़ ज़ून,
नूर बुथिस छुय च़े क्युथ नूर पशपान,
क्याज़ि मॅशरुथ सु लोल तु कोत च़ोलहमो
क्याज़ि मंदछॉवथस बय मारकन मंज़
तारकन ताम छु ओश वसान छिय छारानो
व्वला म्यानि दिलबरो छमनो मशान माय ॥०॥

यि नो छुय ज़ांह रवा अडवति त्रावुन,
येम्बरज़ल छे आरुहॅच़ बाकु छटान
शोकु चानि पॉरॉवमुच़ मॅच़ लॉला छय
ज़ूनि हा गुहुन लोग क्रुहुन कटुकाल ।
साज़ु सोज़ छावुनय रंगस गव मे बेरंगो ॥
व्वला म्यानि दिलबरो छमनो मशान माय ॥०॥

वादु ओस वुम्बरि वॉन्सि सुत्य् सुत्य् रोज़व,
वादस डोलुख हॉवथ पनुन्य मिलटन्ट ज़ाथ,
कूत काल मॉजय बु अथु ह्यथव्वं प्रारय
बु कोबूल कॅरहस नु छस फेशिल महारेन्य्

रोशि रोशि चोलहमो, होशि डॅजसो दिलबरो ॥
व्वला म्यानि दिलबरो छमनो मशान माय ॥०॥

✱

तॅम्य् ओरु हॉव्य्न्म नज़ारु कॉत्याह

सु अकि दोहें आव मे ब्रोंठकने,
मे योरु बॉव्य्मस मलालु कॉत्याह
बु बुकु आयस बरबुक आयस,
अँछव वळम मे अँश्य च़ालु कॉचाह

मे योरु वोनमस दिच़थम कन्यायि तारय
द्युतथम नु गोबराह युथ क्वल ति पकिहे
तॅम्य् अख नज़र तुज तु ओरु हॉव्य्न्म
हॉन्ठन माजनुय हुन्ध् नज़ारु कॉत्याह,

योरु वोनमस द्युतुथ मे गोबराह
दोहय सु बेमार छुम अडल्योकाह बस
तॅम्य् अख नज़र तुज तु ओरु हॉव्य्न्म
मे अडुफ़ल्यन हुंघ् नज़ारु कॉत्याह

मे योर वोनमस द्युतुथ चे क्याह मे
 नै बोड गरुबारा न ज़र ज़मीनाह
 तँम्य अख नज़र तुज तु ओरु हॉव्यनम
 वति प्यठक्यन हुन्द् तमाशि काँत्याह

मे योर वोनमस दिचुथ मे ज़िन्दगी
 मे शोक छुम ख्यमहा सति सिनि दूराह
 तँम्य अख नज़र तुज तु ओरु हॉव्यनम
 ब्वछि हत्यन हुंद् अयाल काँत्याह

मे योर बाँव्यमस मलालु काँत्याह
 तँम्य तोरु हॉव्यनम इशारु काँत्याह
 मे ग्रावु करिमस शुमारु रोसतुय
 तँम्य तोरु सबब कैर्य इज़हार काँत्याह

मे योर वोनमस दिम शांत शबनम
 तँम्य तोरु वोननम ग्वडु कास पनुन भ्रम
 मे योर वोनमस चे रोस बावु कस गम
 तँम्य तोरु वोननम बे गम नु कांछाह

मे योर वोनमस हावुहय सीनु मुचरिथ
 सँनिथ मे काँत्याह द्वख दाँद्य वुछतम

तँम्य अख नज़र तुज तु ओरु वोननम
नँमिथ 'बिमय' रोज़ शँमिथ च हर दम

मे योरु बॉव्यमस गम गोसु वाराह
तँम्य तोरु हॉव्यनम इशारु कौत्याह
सवाल कौत्याह मे योरु प्रछिमस
तँम्य तोरु दित्यनम जवाब मे कौत्याह

✱

परु जुव रामु रामय

मोकर पानु पानय, परु जुव रामु रामय
करु जुव रामु रामय , परु जुव रामु रामय

लछि बज़व यूनियवपतु, आमुत चु मनशि ज़न्मस,
करतु येति रुत्य चु कर्मय , छाव शुहुल शौहजारय
करु जुव रामु रामय , परु जुव रामु रामय ॥०॥

यि छु संसार ब्रोमरान, छल करान छँलरावान
चठ यि ज़ाल शनु शनय , म्वक्ती लबख दमु दमय
करु जुव रामु रामय , परु जुव रामु रामय ॥०॥

संसॉर्य क्रुमनुय खोर , रँटिमुत्य हो चें छिनय,
इन्द्रिय वश करतो , तारन वोले तारि पानय
करु जुव रामु रामय , परु जुव रामु रामय ॥०॥

येलि मालदार आसख , शुस्य बॉच ललुनावनय
पामु पामु पिलुनावनयु क्रंज़ हो चें मोचरावनय
करु जुव रामु रामय , परु जुव रामु रामय ॥०॥

शाह येलि हेयि नेरुन , शुस्य बॉच दून्य दिनय
पनुनि पनुनि गुंठरि छारुनय , यितु गछ हो लागुनय
करु जुव रामु रामय , परु जुव रामु रामय ॥०॥

प्राण येलि हो नेरनय , दर्भि प्यठ चेंय त्रावुनय
च्यन्तायि येलि खारुनय , सूर म्वठ तँती त्रावुनय
करु जुव रामु रामय , परु जुव रामु रामय ॥०॥

वापस येलि फेरनय , श्रोचि श्रानि गोड करनय
रिशतुदार होंछ वुछिनय, त्रेशि गोल नु गरि चैनय
करु जुव रामु रामय , परु जुव रामु रामय ॥०॥

यिमनुय दर्दिल चु ओसुख, तिमय पतु च़ेय खोचनय
 अँस्त्रुकु तिनो गरु च़ानुनय , मंदरन तिमु त्रावुनय
 करु जुवु रामु रामय , परु जुवु रामु रामय ॥०॥

मीरायि त्रोव गरुबार , त्रोव तमि राज़ु दर्बार
 कोर हा तमि शाम शामय , मँच़ मीरा स्व द्राये
 करु जुवु रामु रामय , परु जुवु रामु रामय ॥०॥

च्यतस थव पँतिमय गँर , स्वर तु जुव पनुन पानय
 ती ज़ान तँथ्य़ थव द्यान, 'बिमलायि' मूक्ष्य दिवानय
 करु जुवु रामु रामय , परु जुवु रामु रामय ॥०॥

कृष्ण लीला

कृष्ण हय मे ललनोव अज़ ख्वनि ख्वने,
 सुहय आम पानय अज़ ब्रोंठ कने
 मथरायि तु बिन्द्राबनु नीनस न्यथुनने
 सुहय आम पानय अज़ ब्रोंठ कने ॥०॥

वोननम कोत छख फेरान अस्तानन
पाद छिय लूस्यमुत्य फीर्य फीर मंदरन
क्रीडा करान छुसय चाने मने
सुहय आम पानय अज़ ब्रोंठ कने ॥०॥

मनु वाटिकायि अज़ फुलया द्रायम
थरि थरि द्रायम रंगु रंगु पोश
तिमय श्रु कृष्णस लॉगिम स्व मने
सुहय आम पानय अज़ ब्रोंठ कने ॥०॥

मेहय ल्वलि ललनोवुम पूर पूरय
मायि पुनि कोरमसना गूर गूरय
यशोदायि सोबूर द्युत नूर द्राव नोनये
सुहय आम पानय अज़ ब्रोंठ कने ॥०॥

टॉर्य कृष्णन वौनुम करुम गूर गूरय
अदय चु वुछख कोताह यि स्वखय
अजपा ज़प शरू करुम स्व मने
सुहय आम पानय अज़ ब्रोंठ कने ॥०॥

संसारस मंज़ ऑसुस लाचारय
तोति कृष्णन पानस पथ कर्नॉवनस

वोननम पोंपुर तु शमाह रटुन च्यथे
सुहय आम पानय अज़ ब्रोंठ कने ॥०॥

येलि सु आमय मेति ब्रोंठकने
मे हय वुछ तेंम्यसुंद चोत्रबोज़ रूप
शरण गॅयि बिमु पेयि चरणन तते
सुहय आम पानय अज़ ब्रोंठ कने ॥०॥

कृष्ण हय मे ललुनोव अज़ ख्वनि ख्वने,
सुहय आम पानय अज़ ब्रोंठ कने ॥०॥

पाटिव पूच

दोहं अकि प्रुछुम तस निराकारस,
वन सॉ बनावन वालि यि कथ ।
लालु म्योन बनोवथन येलि यूत संगदिल ॥
बु क्याज़ि बनॉवथस पाटिव पूच ॥०॥

तेंम्य तोरु वेंनिनम बस अख कुन्य् कथ,
लोल गछिनु हावुन बावुन अथस क्यथ ।
वेंडुरावुन गछि मनु सोदरस मंज़ ॥
हावुन गव रावुरावुन म्वल तथ ॥०॥

दोहें अकि बेयि वोनुम तस लालस,
लोल हो आम चुय नालुमति रटुहथ ।

हावुहय तु बावुहय क्याह छुम व्वंदस ॥
द्यवु कैह त्रावख मे चंदस करख मुरुवथ ॥०॥

श्रेह चोनुय छुम गन्योमुत जिगरस,
अवय बनेयस पाटिव पूच ।
लूकव कॅडहस रंदि रेछि तुजहस ॥
कनु डोल अथक्कथि द्युतुम त्यूत ॥०॥

लोलु चूरन हय दिचनम सन तय,
थपि तॅम्य् न्यूनमय दिलुकुय करार ।
प्रॉस्य प्रॉस्य फॅटमय अँछिनुय लाय ॥
स्वनस गॅयम सरतल सपज़ुस फरार ॥०॥

लोलु नावि वॉजिनस छलु ब्रोमुरॉविथ,
अडवति त्रॉविथ चोलुम बाज़्य्गार ।
लोलुचे फुटजे गंड ड्योल गोमय ॥
छॅकरुनु आम हय सरि बाज़ार ॥०॥

वनु क्यथु यारस कूत प्योम च़ालुन,
 लोलु वठ अँन्दरी प्योम ललुनावुन ।
 लोलु ग्रैकि आमय पिसिथ मे बानस ॥
 च़कि 'बिमला' आँस पाटिव पूच ॥०॥

✱

मे छु तस लोल बरुनुय

वैसिये वुनि नय छुय मेय मरुनुय,
 मे हय छुय ज़ख़मन मरहम करुनुय,
 मे छुय अँछिनुय ओश व्वथुरुनुय ।
 अथु छेनिनुय छुय मे अर्थुरोट करुनुय ॥
 वैसिये वुनिनय छुय मेय मरुनुय ॥०॥

मेहय छुय आशुन गिन्दुन वुछिनुय,
 आशुन बोलबोश छुय मेय बोजुनुय ,
 आशिन्य् ख्वख़ुज तय पकुनुय वुछिनुय ।
 वतनि गुरिस पतु पतय दवुनुय ॥
 वैसिये वुनिनय छुय मेय मरुनुय ॥०॥

मेहय वुछुन तँम्यसुंद असुन तय लसुनुय,
 कौठ यिथ महँलस सालाह करुनुय,

प्यालन बरुनुय मलालु कडुनुय ।
 मे छुनय पानु तस मेखलायि वनुनुय ॥
 वेसिये वुनिनय छुय मेय मरुनुय ॥० ॥

मेहय छुय वुनि तस लोलाह बरुनुय,
 मेहय तस छायेन तु ग्रायन वुछुनुय,
 मे हय छुय वुनि तस शाह तोसु वलुनुय ।
 मेहय वुछुन आशुन पकुन दवुन गिन्दुनुय ॥
 वेसिये वुनिनय छुय मेय मरुनुय ॥० ॥

मे हय छुय अँमिसुन्द परुन लेखुन वुछुनुय,
 वर्दी लॉगिथ चाटुहाल गछुनुय,
 इमतिहान पास करुन नवि जमॉच खसुनुय ।
 परनु पतु थदि थोद ओहदा रटुनुय ॥
 वेसिये वुनिनय छुय मेय मरुनुय ॥० ॥

‘बिमस’ आश छय लालु सुन्ज मने,
 मे हय सुय छुय रंगु शिकारि कडुनुय,
 मे हय छुय सुय तुलमुल माजि निशान्युनुय ।
 मे हय छिय लूस्यमत्य अर्मान वुजनावुन्य ॥
 वेसिये वुनिनय छुय मेय मरुनुय ॥० ॥

आरस मंज़ हय अचुनुय प्योम

वैसिये तोरय नादा आमय,
 ग्वरु दारस हय अचुनुय प्योम ।
 अचुनुय हय प्योम ग्वरुदारस मंज़ ॥
 आरस मंज़ हय नचुनुय प्योम ॥०॥

छांडुनि द्रायसस कोहन तु बालन,
 बुथि हय आमय शिवशंकर ।
 दौपनम नेरु खरयार थानस ।
 बबु भगवान आश्रम बुथि प्योम ॥
 आरस मंज़ हय नचुनुय प्योम ॥०॥

बुथि हय वुछमय बबु भगवान,
 नूरा तस ओस त्युथ प्रज़लानय,
 मुरिसुय मंज़ हय रटुनुय प्योम ।
 श्रूचि श्रानि कौरिथ आश्रम चायस ॥
 आरस मंज़ हय नचुनुय प्योम ॥०॥

खरयार आश्रम अँचिथ ग्वरु दारस,
 बबु भगवानुस रँटिमय पाद,

शाद गोम मन तय वादु पूर गोमय
 वछि वॉलिंजिलोल डालि पिलुनावुन प्योम ॥
 आरस मंज़ हय नचुनुय प्योम ॥०॥

अँचिथय ग्वरु दारस मंज़ अँचिथय,
 ग्वर कदमन प्यठ नचुनुय प्योम,
 हैति मस लागुन्य अस्तु अस्तु पोश ।
 लोलु पोशिगौंद पिलुनावुन प्योम ॥
 आरस मंज़ हय नचुनुय प्योम ॥०॥

सन्य्च्यथ युस लोल थोवमुत ओसुम,
 मान अवमान त्रॉविथ भावु बोवमस,
 होशुक बुलबुल जोशस ओनुनम ।
 मनुसरस पोश फोलुरावुन प्योम ॥
 आरस मंज़ हय नचुनुय प्योम ॥०॥

ल्वति ल्वति ह्योतमस मे ति पनुन बावुन,
 पनुन गुदर्योमुत सोरुय वोनमसु
 बबु कँर्यजि पनुन्यन् बँखत्यन् हुंद पासा ।
 कर्म भूगचि कँज आयोस, बुथ हय वुछुनुय प्योम ॥
 आरस मंज़ हय नचुनुय प्योम ॥०॥

यूताह मेति योरु बोरमस लोलाह,
 तैम्य तिमेय लोल तोर बोरनम त्यूताह,
 गॉलिनम अपराध ज़न्मु ज़न्मन हुंद् ।
 संसारु सँदरु ख्यल ज़न नेरुन प्योम ॥
 आरस मंज़ हय नचुनुय प्योम ॥०॥

बानु तैम्य ज़ोननम बुथि हय आमय,
 वौननम व्वलु खस कुठ्य पोरस,
 दून्या तति क्याह ऑसुय दज़ानय ।
 नपु नपु वारु वारु वुछुनुय प्योम ॥
 आरस मंज़ हय नचुनुय प्योम ॥०॥

डीशिथ स्व ज्यूत्य् बबु भगवानय,
 सास भास्कर ओस पानु प्रज़ालान,
 थफ कॅरिथ अथुस ब्रोंठ पकुनॉवनस ।
 अथवासस बिमस अथु दारुन प्योम ॥
 आरस मंज़ हय नचुनुय प्योम ॥०॥

वैसिये तोरय नादा आमय,
 ग्वरु दारस हय अचुनुय प्योम ।
 अचुनुय हय प्योम ग्वरुदारस मंज़ ॥
 आरस मंज़ हय नचुनुय प्योम ॥०॥

चुपैद्य

(अख हथ चुपैद्य)

बिमला ऐमा मिसरी

(१)

द्यानु ब्योल ववुन गछि मनु किस डूरिस
ज्ञानु गंगाये ग्वतु लायुनुय
मल तय अज्ञान द्वबि कडुन्य् छलनय
माल लोचरिथ ल्वति ल्वति पटुकुनुय

(२)

काम क्रूध तय मद गछि छलुनावुन
अंहकार त्रावुन अहम मॅशरावुन
ल्वति ल्वति श्रुराम मनु ललुनावुन
स्वति स्वति सफर ब्रोंह पंकुनावुन

(३)

कर्मुक भग गछि वछि ललुनावुन
पथकुन नु त्रकुबोंद थावुन जमा
छवख ज़िन्दुगी हुन्द् सख व्यतरावुन
अन्द वातुनावुन प्रारब्द न्याय

(४)

कर्मस कस क्याह छु कुस ज्ञानानय
अनिगटि कूठरि मंज़ बसुनावान
कर्मिनि रज़ि छु द्रसु द्यावानय
बोंज़गार व्वट छुय तुलुनावान

(५)

पनुनुय सीर गछि नु बावुन गॉरस
 अँन्दरिम कथ गछि अन्दुरय थावुन्य्
 सुय गोव मन लागुन मंज ध्यानस
 अन्तःकरण दयि नाव ज़पुनावुन्य्

(६)

द्यानु ब्योल ववुन गछि मनकिस बागस
 रॉछ गछ्यस रोजुन मागस त्रागस
 मनुकिस सरस फ्वलन पम्पोश
 पूजि तिम लागुन्य् गछन शेरि आगस

(७)

दयि नाव वछस मंज गछि ललुनावुन
 पूजुन्य गछि रामनावुच खाव
 पाम यिन मॅल्य् ह्यख असथ वरतावख
 धर्मतु कर्मच यिनु रोजी गाव

(८)

सुलि वॅथिथय गछि लालयाद पावुन
 मायाजाल गछि पनु पनु करनावुन
 छा़य मनुसॉविथ छा़यि गॅछिनु रोजुन
 अपजयुक भ्रम गछि फुटरावनावुन

(९)

कृष्ण दानस मंज पान बोडरावुन
सुय गव प्रावुन शिव दर्शुन
मनु मंदरस गछि रँत्नदीप ज़ालुन
गूविन्दु गू गू मन ग्यवनावुन

(१०)

ज़िंदय दिह गछि च्यनतायिं खारुन
विषयन तु लूभन दाह द्यावुन
गीतायि हुंजु अध्यायि परनावुन
सार तमि कुय गछि पलि पावुन

(११)

हंगु मंगु तु नाहकय गछि मा खमनुय
वारु वारु लोलु सोज़ बोज़नावुन
हनि हनि मनि पनुनि गछि श्रेह वुज़नुय
शनु शनु मन शान्त करनावुन

(१२)

मायायि मंज गछिनु मस ज़ांह गछुनुय
ह्यस तय होश गछि रँछरावुन
होशन पनुन्यन पय नु रावुरुनुय
मूलन द्रोत पँतरनु सग नु द्यावुन

(१३)

दय गछि छारुन पनुनिस मॅरिसुय
फॅरिसुय मंज़ करुन तस आसन
ठॉन्ठर वानु ठन्य् ठन्य् कॅरिथुय इरनि खारुन
गॅरिथ चॅरिथ नोन कडुन शिलुवासन

(१४)

अॅन्दरी वॅन्य् दिन्य् पनुनिस मकानस
लोलु सान वातुन थानस तान्य्
गुलज़ार तैलि फ्वलन कुलि जहानस
परमु प्रेयम सुत्य् खसख व्यमानस

(१५)

ग्वडनी पानस लछुला डालुन
च्चशवय तर्फव वालुन्य् हाय
मनु ऑयीनस बुथ व्वथुरावुन
काठु बबरु सुत्य् ज़ालुन्य् काय

(१६)

बेकलो युथनो बाम्बुर लागख
बाम्बुरि सुत्य् प्यवान छाम्बुर छय
स्वति स्वति ल्वति ल्वति लय अथ लागख
पोत फेरुनुच ज़ांह राय नो छय

(१७)

हनु आमुत इन्सान यथ हनुरस
हनुरूक क्योम ह्युव छुय सु मरान
कॉत्याह जाय तय कॉत्याह मूदी
ती छा कॉन्सि चयतस रोज़ान

(१८)

वॉन्स गॅयिय शुरिनय पतु ब्रोंठ वुछान
सोंचान छुख वछस तल रटहख
चलवुन वख रोज़ि गांगल करुवुन
पथ कुन त्रावी ज़नतु शालु थ्वख

(१९)

ग्रन्द कर दयि नावुचि म्वखतु माले
हाशि गोमुत हौल कोल कड ब्योन
फोतु छुन त्राँविथ दयि ब्योल गाले
थव सॉबूर वसि बुथिस श्वंगरफ नोन

(२०)

लालो मेहा लोल आमुत सख छुम
वनतम किथु कॅन्य करय सालो
आवुसनु ऑमुत तन तय मन छुम
बरुहय तु बरय किथु मस प्यालो

(२१)

लोगमुत लोलु नार छुम वुछिनि यितमो
लॅग्यमुत्य् कौत्याह आमुताव मे छिम
प्रेयम सोंज़ छुम वज़ान बोज़नि यितमो
नतु वज़ वुन्य् साज़ बंद गछुनम

(२२)

छवपु गछि साज़स श्रवकुनय यिनुमो
लोलकिस मालस कदुर वसिमो
वक्तस येलि नु ज़ांह म्वल मे खसियो
कुननम बे म्वलु मंज़ बाज़ुरस तो

(२३)

ओमकारु रुवय मनि मंज़ यियिहाम
मेहा वॅथ्य् थौव्यमुत्य् छि दारि तु बर
अकि लटि अँचिथुय शेहजार दितमो
लालो लोल म्योन पानु सरु कर

(२४)

दोह तारु मे निशि ति ठँहराव करतो
कासतम यमु भय बेयि वसवास
वासुनायि प्रक्रेञ्च न्यंगलिथ छनतो
दिलस तु शिलस बनि अथवास

(२५)

ह्यसु पावतम किथु खसु ह्योर हेरे
सबरु सब्जी खसि बेरे बेरे
पावि पावि ह्योर वातु चानि अकि ज़ेरे
ओंकारस बु पोश लागय शेरे

(२६)

थँचमुच छस नॅच्य नॅच्य फीर्य फीरी
द्वारु अँचिथ म्वचहा ब्यंद आकार
ओंकारुक आकार युथ मे बासी
श्रूच माज़न दिमु तु यियि व्यस्तार

(२७)

गतु गीरिस मंज़ ह्यनु छस आमचुय
नाव लँजमुचुय त्रटु तूफानन छम
यीरु छस गॉमुच संसॉर्य सँदरसुय
राज़ु होन्ज़ बॅनिथुय तारु तारतम

(२८)

लालस ज़ारुपारु कौरुम त्रावतु मलालय
गँछ्यतनय गोशान म्योनुय हालय
रसु रसु मसु सुत्य् श्रेह व्वतलावय
रचि रचि मछि माज़ आपरावय

(२९)

लालन वोनूनम चानि बर कोत अचय
अति हँस्य् मदु मँत्य् छिम यल गौमत्य
ठासान कलु तय लायान व्वट तिमहय
लरु फुटराँविथ छि अँहुरनेमुत्य्

(३०)

बरु चानि अँचिथय खूँखार सुह छिय
ऑस वाहराँविथु पंज़ि मुचरिथ छिय
तिम हय छिय बैँखत्य्न पाप न्यवारान
नरकुनि नारु म्वकुलावान छिय

(३१)

बाछि कर यिमन सुहन लरु फुटराव
अँहकार तु मद त्राव कथ पलिपाव
सेज़ि प्रक्कँच तिमन रज़ गंडनाव
बाग अछ भावु पोश चार सोम्बराव

(३२)

लोल येलि बुख करि दुयी व्यसरी
ब्यन बदलिथ म्युल गछि पानय
मन येलि श्वदि अद छलनु मल नेरी
ह्वछिमचन ज्वयन नौव पोन्त्य् फेरी

(३३)

मनुकिस कुठिसुय दारि बर मुचराव
होशि डोलमुत पान होशि अनुनाव
दयि लोल सत् संग संज करनाव
दयि संजि स्मरनि श्वब फल प्राव

(३४)

चन्दु छोन करि क्यथु सबु तय सालय
ओन क्याह गटि मंज हावी गाश
धर्मु दानु रौस्तुय क्याह वनव हालय
म्वक्ती हुंज कति थॅव्युजि कांह आश

(३५)

द्राति वुद्युगकि खन तु सोमिराव डूरुय
कर्मु यटु फुट दिस तु करुन हमवार
यैछि हुंद ब्योल वव शाँती डूरिस
पजि साधनायि नेरन बेशुमार ओंकार

(३६)

वख मु रावर गॅन्जुस्य गॅन्जुस्य लछ तु सास
यिम लछ तु सास करनय नु यॉरी
चूरि छेपि वख कड स्मरण फिरनस
दयि दयि ज़फ दय करी यॉरी

(३७)

कन थव च्वन तर्फन श्वब नादन
मीठ्य तय म्वनि करुस दून पादन
अथ कथि थफ कर डल मसॉ वादन
ब्यदु आकार लबख छुय आदन

(३८)

द्रढ संकुल्प कॅरिथ लालस फिर मालय
हवालु कॅर्यज़ि गवरु दीवस पान
वथ सुय हावी बनाविय च़ेय शिवालय
तॅत्य् लॉग्यज़्यसै नॉल्य् पोशि मालय

(३९)

कल कर पानो अदु कुन वातख
कलि कॅहरि नेरी रुति रुत फल
आलुच छु सेज़ि वति ठोर, कोत वातख
कर वुद्यूग है मु पथ कर हलु बल

(४०)

प्रभातु वॅथिथुय गछ शरण माजे
बनुनस राजे छय नु तेलि तॉर
तन मन नॉविथ प्राणायाम कर
श्वज़ि वासनायि वुछख दर्शनदॉर

(४१)

अंहकार छु मनशस अंधकार वालान
लूभ मद रुचि वति डालान छुस
दुय दौगिन्यार छुय वुन तस बालान
हॅर नार अँन्दरी ज़ालान छुस

(४२)

व्वदरस विहुन छुम वोथमुत त्यूत
यूत तुलि दँद्यमतिस नूनु छिरकाव
काम क्रूध मोह छुम अँछन करान अनिगोट
छल छिदरि फल छुय वर्जुन वाव

(४३)

कर्म फल भूगने सूज़थस योरय
इन्द्रैयि चूरव ओनहम व्वलाम
नय छस योर तु नय छद तोरय
हंगु मंगु पापव कॅरहस ग्वलाम

(४४)

अज्ञान अन्धकार काठकोन दौदमो
दिलि ऑयीनस लॅजमो खय
अन्ताह करण मेय मलु सुत्य् वोलमो
ध्वरु दानस मा बॅरमो प्रय

(४५)

सतुची भावना वुज़म यनु मने
आत्मा स्वरूपन ह्योत यि प्रज़लुन
मन छुमनु डंजि सुय चु सिथुर करतम
सोरुय तन मन शिवुय सॉपुन

(४६)

परुनावतम गायत्री परुनावतम
ॐ भूः भवः स्वः परुनावतम
रामु रामु श्रु राम स्वरुनावतम
रामु संज पादुका पूज़नावतम

(४७)

सोम सोम ख्यनु सुत्य च्यड च़लियो
ख्यनु ख्यनु करनय ह्यस डलियो
बेयि सुंद हक ख्यनु बदली नियथ
छ़ेति अन्न सुत्य पॉर्य ज़ान गलियो

(४८)

क्वकरन म्वखतु छकुनु क्याह नेरी
बेकलन व्यद बावनु कैह नु नेरी
पानु कॉन्यू नोमराव अदु वेचि बेयिसुय
पानु कर अथु दय लोन शेरी

(४९)

लालन वोन दिनु लाल लबुहन
सोदरस थाह मार दुर खारुहन
हरकेंच छे बरकथ वथ अज़माव
परमु पद पानय अदु प्रावुहन

(५०)

दयि बेंखती मंज़ छु आनन्दु रस
सोहम सोस्य सोस्य शॉन्ती प्राव
भगवत भजन कर न्तथ सुबहन
व्यतरनु शक्ती हुंद पय थाव

(५१)

मनुसर लोलु युपि फटनस आव
छठ कंडुन सॅस्य पेठ्य सॅहलाब आम
मंज़ बाग ओमकार नचने द्राम
लोलु रंगु जामय रॅन्गिथुय आम

(५२)

यूग नेन्द्रा ज़न पैयि मे शूरे
सोपनस मंज़ राम आमहय हूरे
दोपनम चानि श्वज़ि भावनायि आये
थफ दि ग्वरु शब्दस चोंग दज़ि ज़ूरे

(५३)

ग्वर छु अनिगटि मंज़ चोंगा हावान
वति रॉव्यमतिनय वथ सुय हावान
वावस तु तावस मंज़ करान साये
ग्वर छुय बीज़ु मन्त्र हेछिनावान

(५४)

क्रूधस तु अहमस गासु नार दियि ग्वरु
दुयी तु वॉरस करि मिसमार ग्वरु
कूफ कौसिथ लागि वति सुय अठकल
अज्ञानु छाफ नेत्रन छु कासान ग्वरु

(५५)

मान तय अवमान होर कुन त्रावुन
कावु सुंद ह्युव टाव टाव मशरावुन
यूग मायायि हुंद भूग ललुनावुन
ललुवुन गछि ॐ ल्वलि ललुनावुन

(५६)

ओमकारु रुप्य खहस न्यन्दु कर वारय
शांत स्वभावय सगुनाव डूरुय
धर्मीकि ट्वंगरि सुत्य् चूरहन दीज़्यस
कर्मिकि द्राति सुत्य् फल लोन पूरय

(५७)

गोब बोर तुलनु किन्यु लोचरुन प्योम
चोक मोदुर ट्योठ लॅजीज़ ह्युव ज़ोन
चूरि पॉठ्य लोत पाठ्य पोश लॉग्यु लालस
काचु ज़ूनि पानु तॅम्यु कोसुम ग़ोन

(५८)

संसार मॉन्यजे मै बॉज्यु तय छल
दयि कृपा बन्यस युस गछि दिथ यल
मनि कामन गछ्यस स्यद जल जल
पूज़ि लागि युस शिवस मदल तु ब्यल

(५९)

मायायि हॉन्कुलि दियि युस टख
ज़िद तय नफरथ त्रावि रुश तु च़ख
न्यर्मल मन बन्यस शॉन्ती यियस
वॉन्सि बूगि आनन्द छावि सुय स्वख

(६०)

हारुन्यु गर्मु क्राय, हर्दुन्यु छठ
चॉज येम्यु मागुन्यु तुरि नुठ नठ
तापुनि नारु बस्तु नारुतत्यु वठ
नारु द्राव स्वन बन्युव च़जिस छूट छूट

(६१)

धर्मकिस शमहस करि युस गथ
कर्म यात्रायि तस यियि अथवथ
युस मनुश नु क्रेयायि रोजी पथ
सुय प्रावि श्वबु दर्शुन गछ्यस सथ

(६२)

ग्रटु जोरि मंज बाग पेहनय आस
कर्तुव्य् पोलुम नु गोम डुबडास
सौर्य मा द्रायम बेनि ड्वफ तु मास
ग्रटु अनुवारे नेरि आम तु खास

(६३)

येन्दरस सुथर मेति कतनुय प्योम
येन्दरुक गुं गुं बोजनुय प्योम
सथर तय तोस प्योम ब्योन ब्योन करुनुय
लछि नौविस गछि कुठि वथरुन प्योम

(६४)

अंजस मंजस कंजस बरँहस
मंजस मुहल्युव दल दित्यहम
मुन्य् मुन्य् छँट्य छँट्य चौरिथ कँडहस
रँनिथ पाकुविथ लालस आपुरहस

(६५)

लोल प्योम पाकुवुन तचि नारु बछे
 दानु च़ास्यन प्यठ वारु रनुनुय प्योम
 बतु लैजि लरि लरि छावु प्योम अनुनुय
 सति सिनि लालु ख्यावुनावुन प्योम

(६६)

लालु च़ाव म्यानि दारु शम दम न्यूनम
 दाम छुतुन यिथु ब्वछि होत शुर द्वदस दिवान
 प्रैयमच़ रेह नॅन्य़ द्रायि बर मंदिन्य़्स
 श्रेह वुज्योम येलि ब्रोंठकुन वुछुम् यिवान

(६७)

जोग्या हा म्यानि जूग्य़रायो
 शौक गोम बुति लागु जूग्य़ वस्त्र
 दयि रंग म्याँन्य़ वस्त्र ति रंगुनावतो
 जूग्य़ बायिति शूबनम जूग्य़ वस्त्र

(६८)

वौननमअँम्य़ जूग्य़ हतय बकेली
 गीर्य़ वस्त्र लागुन्य़ हय छुनु सख
 वस्त्र रंगुनावनु नेरि मा मुदा
 तन तु मन दयि रंगु रंगुन्य़ छु सख

(६९)

मन ति छुय तेलि सॅन्य्याँस्य बनावुन
इन्द्रीयि शोमरुनि मल ज़ालनावुन
वॉन्स गॅयि गरु गरु अरुसर करान
जूग्य बननस छु ग्वडु गरु त्रावुन

(७०)

व्वथ अकि लटि दि लथ लोहॅलंगरस
वापस फेर पतु रंगु तु तन तु मन
कर्म म्यकुराज़ वाय मोहॅ ज़ोलानस
त्याग कर श्वडुनय अन्ताह करण

(७१)

संसॉर्य रिशतु व्यंद ओमी पन
ज़ेरि अकि छुय गछान तिमनय छ्यन
यिथ्य बंधन छि फॅसरावान मनुशन
धानु दारनायि च़ठतु यिम बंधन

(७२)

मनु छेड्य कौत्याह हून्य छि वुंगान
यॅड धादि यस बु तस च़ेपिसुय यिवान
पाप कर्मवु ब्वछि त्रेशि त्रेशि करान
वासना मॅलच़ छख द्वख छि बूगान

(७३)

ज़ीवु रठ मन कचि डलुमु ओर यिर
ब्वदु ब्रोर नख छुय लॉगिथ चोर
दयि नावु स्मरणि यियि बजाह बोल
क्षण, क्षण, दान कर यलु गछिय तोर

(७४)

इन्सान डॅल्युमत्य् छुखनु कांह होश
इन्सॉन्य् ख्व्य मोठुख इन्सॉन्य् रोश
सॉरी पॅशय् बनेयि हलकॉल्य् हून्य्
प्रक्रॅच ग्राय कड हरनय दोश

(७५)

मनशि जन्मस यिथ कॅर नु कांह क्रय
पापुय पाप कॅर्य् मॅल्य् ह्यौत भय
व्यॉज़व तु व्यपदायव वोल नाल
पपुनु फसलस गव अवय रय

(७६)

मायायि ज़ोलानु चटवुन छु ग्वरु
म्वुकुजार सुय लबि युस रट्यस ख्वर
बखॅतिस यस रोज़ि ग्वरु लादन
तस छुय नखि डखि रोज़ान ग्वर

(७७)

पज़ि मनु पुशरि युस ग्वरुसय पान
तँस्य् ग्वरु छु कासान ज़न्मुच हान
येछि पछि ग्वरु पाद पूज़ि लोलय
गांगल कास्य्स कस्यस कल्यान

(७८)

दयि दर्शुन असि कासान ब्रांथ
द्वख दौद्य म्वकलान नँख्य् वसान बार
अनिगँटिसुय दय छुय करान गाश
हुद हुरान मनुशस छु बड़ान व्यकार

(७९)

ज़ॉन्य् हुंद अमस्यथ चनु यियि बाश
छाफ चलि अज्ञानुच, नज़रि नेरि वाश
मनु नागरादु वुज़ि प्रेयमुच दारा
लोलु सतुसंगु यियि अथि बोड राश

(८०)

सेज़ि वति पकुनु मेलि मंज़िल जल
पज़ि कँज पज़ि क्रेयि बनि रुत फल
संतापुचि क्रायि दज़ि यस ताल
मल पेयि दैज़िथ बनि मन न्यर्मल

(८१)

ग्वरु सुंद छुमहु कुम ग्वडन्यथ पालुन
मदहोस मन गछि अमि मदु वालुन
भावु चन्यचल गगुर गछि बरुन टिडंस
नतु गछि धर्म दुपु दुह दिथ गालुन

(८२)

वस अन्दर अँन्दर छुय शुहुल शोहजार
नय कुनि यकरार नय छु इन्कार
मनु संदरस मन्ज छांट छांठ कर
शँमिथुय दम दिथ लालाह खार

(८३)

सँदरस मंज वस चुय मँदरख
नतु कति बैठिसुय प्यठ अँदरख
ग्वडु ग्वडु बासिय हारुन्य ग्रख
सबरु सब्जी बनिय द्यवु शोहलख

(८४)

सनि ख्वतु सँनिसुय सनिरस वस
मेहनतस छय मौजूस्य दुर ह्यथ खस
जुव जान गालुनस छु आनन्दु रस
ह्यस कर कर्मस कँर्यजिन बस

(८५)

संतोषि बागस गुमु दितु सग
वश कर विषयि तु तमुहन दि छग
बैखती सुत्यु लगिय स्वखुनुय लग
चौरिथ अदु ह्यकख प्रोन तय जग

(८६)

स्वमनु निष्कल भावनायि न्यर्मल
ज्ञानु यारुबलु ▼बिमय * कर बी श्रान
मल त्राव ग्राय कडु कर पौराव
यिकुवटु मिलनाव मन तय प्राण

(८७)

शीनु मानि हुंघु पौठ्य पान युस गाले
कोह चैटिथुय सुय द्वद क्वल वाले
ओमसुय क्वमु कर पर सोहम
स्वन बनि कुन्दन बछि प्रचर युस चाले

(८८)

अँन्दस्युम लोलु आगुर वुजनावुन
अमस्यथ नैठ्य नारि चावुन यार
मनु मँज्जय रामुरामु रामु परुनावुन
त्याग करुनावुन भ्रमु संसार

(८९)

कल कर पानो दयि सुंदि दानुच
अदु चुय प्रावख ज्ञानु प्रकाश
ज्ञानु किन्यु क्रेयि हुंज व्यद नॅनिरावख
पतु नो रोज़ी चे कांह अभिलाश

(९०)

शिव छुय अन्तर्योमी आसुवुन
यमु भय कासुवुन सुय महादीव
लज़ा तु बॉच भखुंत्यन छुय कासुवुन
युस येछि पछि करान तॅम्यसुय सीव

(९१)

दोपमस बु ख्यावुहथ म्यवु फलि फले
चावुहथ श्वद द्वद चय गलि गले
दोपनम फेरान हटरि हटरि पानु छख
अलर वुनिस कति ललुनावहम ल्वले

(९२)

मय गछ द्वलाबन हु कुस तु यि कुस
अॅभ्य हुम्य तु येम्य कुस तोर अज़ताम
पनुनी नाव छय पानु तारु तारुन्यु
रामु नाव हमुतुलि यियी अंजाम

(९३)

अज़ताम छॉड्यथख रिशतुदार पॅख्यदार
अज़ताम सौर्यथख शुस्य तय बॉच
वॉस गॅयि नीरिथ व्वन्य् गॅयख बेदार
अॅथ्य् छूट छूटि मंज़ राव्यय रॉच

(९४)

थोद व्वथ गंड होल थफ कर वुद्धूगस
कुंस्य् गछुनय दोह व्वन्य् स्वर तु पान
सोम्बरुन त्राव व्वन्य् प्रय बर संतोषस
बस रटुन खॉलिस अख भगवान

(९५)

सज़ि युस साधनायि मेछर प्रावी
सनिरस वॅसिथय मूल प्रज़नावी
ग्वरु शब्दस करि मनि युस जाय
तॅस्य् सुय लान्युन न्याय अँज़रावी

(९६)

मो लाग बेकुल पनुनी ज्ञानकर
लछि बज़व यूनियव पतु मनुशिय
व्वन्य् ज़न्म पनुनुय रथि नय खारख
अलोन्दुय रोज़ख बॉरखरु पोशी

(९७)

रिन्दु सुंदि आयि ज़ाल ज़िंदय पान
ज़ीरख छि पानस शव मानान
विषयन तमुहन दाह गछि द्यावुन
लगज़िशि म्वकलिथ शिव बनि पान

(९८)

वथि दिलु दान द्यू संकूच त्राव
सन्त्युत्य कथ करुन खुलु खरचाव
युस येति दियि तय सुय तति प्रावे
चेनवन छय ज़ीव चयतुसुय थाव

(९९)

यिथु क़ाल मेच मॉड्य मॉड्य नरमावान
तिथय पॉट्य बेंखुत्य नरमावान कॉन्य
बछि ताव छुय पयान काया पनुनी
नारु पानि नीरिथय वुडान अस्मॉन्य

(१००)

वाखन सॅन्य सॅन्य वाख तु वचुन गोम
येथ्य नु बु पचुहा तैथ्य पचुन प्योम
पानस गुदरिथ सोरुय सुरगोम
बिमलायिह अद पज़राह प्रखट्योम ।

जीव सोज

किताब कति मेलि:

१. श्री शिभन कृष्ण ऐमा

७२-ई-सेक्टर, भारत नगर, तालाब तिल्लू, जम्मू

दूरभाष : २५५४५६९

मोबाईल : ६४१६१६७६४६

२. श्री कंवल विशाल कौल

द्वारिका, सेक्टर-६-डी.५०२

प्लॉट.२६,

टू फ्रेंड्स अपार्टमेंट, नई दिल्ली

मोबाईल : ०६६६६६८२३१३

०६८६६६७६७४६

३. किताब घर

अकादमी आफ आर्ट कलचर एण्ड

लंगवेजिज़, जम्मू

निकट जुव्यल चोक-कनाल रोड़ जम्मू

४. वीर हाऊस, सरवाल चोक, जम्मू







नोव सोज

"NOAV SOZ"

A collection of Kashmiri Poems.

By : BIMLA AIMA MISRI



- नाव : बिमला ऐमा मिसरी
- पति देव : श्री शिवन कृष्ण ऐमा
- पिता जी : स्व. जानकी नाथ मिसरी
- तालीम : एम. ए.
- मलाज़िमत : रिटायर्ड बैंक ब्रांच मनेजर
पंजाब नैशनल बैंक।
- असली पता : 105, आज़ाद बस्ती
नटीपोरा, श्रीनगर, कश्मीर
- जेम्यक पताह : 72, सेक्टर-ई, भारत नगर
तालाब तिल्लू-जम्मू।